

IKINYARWANDA



**IGITABO CY'UMUNYESHURI
GAHUNDA Y'ABAFASHA
B'ABAFOROMO**

© 2024 Urwego rw'Igihugu rushinzwe Uburezi bw'Ibanze,
Iki gitabo ni umutungo wa Leta y' u Rwanda
Uburenganzira bw'umuhanzi w'ibikubiye muri iki gitabo bufitwe n'Urwego
rw'Igihugu rushinzwe Uburezi bw'Ibanze (REB)

IBIMENYETSO N’IMPINE BYAKORESHEJWE

NCDC	National Curriculum Development Center
REB	Rwanda Basic Education Board
CTLRD	Curriculum Teaching and Learning Resources Department
USSD	Unstructured Supplementary Service Data
MTN	Mobile Telephone Network
SMS	Short Message Service
RFI	Radio France Internationale
WWW	World Wide Web
Gov.	Government
Rw	Rwanda
Ltd	Limited
FRW	Franc Rwandais
VISA	Virtual Instrument System Architecture
nt.	Inteko
GR	Ingombajwi y’indagi
D	Indomo
J	Inyajwi
C	Igicumbi
Co	Igicumbi kirimo inyajwi o
Ce	Igicumbi kirimo inyajwi e
Z	Umuzi
Zo	Umuzi urimo inyajwi o
Ze	Umuzi urimo inyajwi e
RT	Indanganteko
RS	Indangasano
Rkzn	Indangakinyazina
+	Ukwiyunga kw’inyajwi cyangwa ingombajwi.
→:	Ihinduka, bibyara
∅:	Iburizwamo, ibura ry’akaremajambo gateganyijwe muri uwo mwanya.

IJAMBO RY'IBANZE

Munyeshuri wiga mu mwaka wa kane muri Gahunda y'Abafasha b'Abafaromo, iki gitabo ni wowe kigenewe.

Iki gitabo ni imwe mu mfashanyigisho zigomba kugufasha kwiga isomo ry'Ikinyarwanda, cyanditswe gihereye ku nteganyanyigisho y'Ikinyarwanda ishingiyeye ku bushobozi yateguwe n'Urwego rw'Igihugu rushinzwe Uburezi bw'Ibanze (REB) mu mwaka wa 2021.

Iki gitabo kigabanyijemo imitwe irindwi. Buri mutwe ufite insanganyamatsiko wubakiyeho. Izo nsanganyamatsiko ni kubungabunga ubuzima, uburinganire n'ubwuzuzanye, uburezi n'uburere, umuco nyarwanda, kubahiriza uburenganzira bwa muntu, ikoranabuhanga n'itumanaho no kubungabunga ibidukikije. Insanganyamatsiko zigaragara mu myandiko inyuranye.

Mu mitwe imwe n'imwe harimo ikibonezamvugo kizagufasha gucengera imikoreshereze y'ururimi rw'Ikinyarwanda. Buri mutwe usozwa n'isuzuma rusange rizagufasha gusuzuma ubushobozi ukuye muri uwo mutwe. Ibyo bigamije kugutegura kugira ngo ugire ubushobozi buzagufasha mu mirimo iboneka mu muryango nyarwanda no gukomeza amashuri muri za kaminuza n'ibigo by'amashuri makuru bitandukanye.


Iki gitabo kirimo imyandiko inyuranye izagutoza umuco wo gusoma no kuvugira mu ruhame ushize amanga. Imyandiko izagufasha kumva ibyo wasomye usubiza ibibazo byo kumva umwandiko, kwiyungura amagambo no gutekereza byimbitse ushakisha ibisubizo by'ibibazo byo kuyisesengura. Imyandiko izanagufasha kwiyungura ubumenyi ku nsanganyamatsiko zitandukanye, bityo ubashe guhanga imyandiko y'ubwoko bunyuranye.

Iyo wiga hari byinshi wigira kuri bagenzi bawe mu ishuri. Ni yo mpamvu imyinshi mu myitozo ikubiye muri iki gitabo igusaba kujya impaka wungurana ibitekerezo na bagenzi bawe mu matsinda. Indi myitozo irimo izagusaba gukora ubushakashatsi mu nzu y'isomero, kuri interineti cyangwa wifashisha ibitangamakuru binyuranye.

Muri iki gitabo kandi hakubiyemo imyitozo izagufasha gushyira mu bikorwa no gusobanukirwa ingingo nsanganyamasomo ari zo umuco w'amahoro, kurwanya jenocide n'ingengabitekerezo yayo, uburinganire n'ubwuzuzanye, uburezi budaheza, ubuzima bw'imyororokere, umuco wo kuzigama, kubungabunga ibidukikije n'umuco w'ubuziranenge.

Imyitozo ikubiye muri iki gitabo iteguye mu buryo igusaba kugira ubushishozi bwo gushakira ibibazo ibisubizo, guhanga udushya, gukora ubushakashatsi, gusabana n'abandi mu Kinyarwanda, kugira ubufatanye, imibanire ikwiye mu bandi n'ubumenyi ngiro mu buzima bwa buri muni. Harimo kandi imyitozo n'imikoro igufasha guhora wiyungura ubumenyi.

Twizeye ko iki gitabo kizagufasha kwiga neza Ikinyarwanda, kigukundisha ururimi rw'Ikinyarwanda, umuco kibumbatiye, umuco wo gusoma no guhanga wigana ubuvanganzo wize, kugira ngo ukurane inyota yo kugira ubushobozi bwo gusabana n'abandi mu Kinyarwanda.



Dr. MBARUSHIMANA Nelson

Umuyobozi Mukuru wa REB

GUSHIMIRA

Ndashimira byimazeyo buri wese wagize uruhare mu itegurwa ry'iki gitabo. Ntabwo iki gitabo k'Ikinyarwanda cyashoboraga gutegurwa uko bikwiye iyo hatabaho ubufatanye n'abafatanyabikorwa banyuranye.

Ndashimira mbere na mbere Ubunyamabanga Nshingwabikorwa Bushinzwe Abakozi bo mu Rwego rw'Ubuzima (HRHS) bwatangije kandi bagakurikiranira hafi umurimo wo kwandika iki gitabo.

Ndashimira abantu bose bitanze batizigamye kugira ngo umushinga wo kwandika iki gitabo urangire. Abo ni abakozi b'Ubunyamabanga Nshingwabikorwa Bushinzwe Abakozi bo mu Rwego rw'Ubuzima (HRHS), abakozi b'urwego rw'Igihugu rushinzwe Uburezi bw'Ibanze (REB), abakozi ba za Kaminuza, ab'ibitaro n'ab'ibigo by'amashuri yisumbuye binyuranye.

Ndashimira by'umwihariko ubuyobozi bwa za kaminuza, ubw'ibitaro n'ubw'ibigo by'amashuri yisumbuye binyuranye bwemereye abakozi babwo kuza kwandika iki gitabo.

Ndashimira kandi abafatanyabikorwa batandukanye, by'umwihariko Minisiteri y'Ubuzima, Minisiteri y'Uburezi ku bujyanama batahwemye kuduha, hamwe na Clinton Health Initiative (CHAI) kubera inkunga yabo batanze mu rwego rw'imari.

Habaye hari ubundi bwunganizi ku byanzwe muri iki gitabo twabwakira kugira ngo buzifashishwe mu ivugururwa ryacyo.



MURUNGI Joan

Umuyobozi w'Ishami ry'Integanyanyigisho n'Imfashanyigisho/ REB

ISHAKIRO

IBIMENYETSO N’IMPINE BYAKORESHEJWE	iii
IJAMBO RY’IBANZE	iv
GUSHIMIRA	vi
IRIBURIRO	xi
UMUTWE WA MBERE: KUBUNGABUNGA UBUZIMA.	1
I.1. Gusoma no gusesengura umwandiko: Kwirinda biruta kwivuza	1
I.1.1 Gusoma umwandiko.....	2
I.1.2 Gusobanura amagambo.....	3
I.1.3 Kumva no gusesengura umwandiko	3
I.2. Amabwiriza y’imyandikire y’Ikinyarwanda: Inyajwi, ingombajwi, inyerera n’ibihekane	5
I.2.1 Imyandikire y’inyajwi	5
I.2.2 Imyandikire y’inyerera	5
I.2.3 Imyandikire y’ingombajwi	5
I.2.4 Imyandikire y’ibihekane	6
I.3. Gusoma no gusesengura umwandiko: Indwara z’ibyorezo	9
I.3.1 Gusoma umwandiko.....	9
I.3.2 Gusobanura amagambo.....	12
I.3.3 Kumva no gusesengura umwandiko	12
I.4. Imbwirwaruhame	13
I.4.1 Inshoza y’imbwirwaruhame	13
I.4.2 Uturango tw’imbwirwaruhame	14
I.4.3 Imbata y’imbwirwaruhame.....	14
I.4.4 Amabwiriza agenga imbwirwaruhame.....	15
I.5. Isuzuma risoza umutwe wa mbere	16
UMUTWE WA KABIRI: UBURINGANIRE N’UBWUZUZANYE	19
II.1 Gusoma no gusesengura umwandiko: Umuryango wa Migambi	19
II. 1.1 Gusoma umwandiko.....	20
II.1.2 Gusobanura amagambo.....	22

II.1.3 Kumva no gusesengura umwandiko	22
II. 2. Ihinamwandiko.....	23
II.2.1. Inshoza y'ihinamwandiko	23
II.2.2. Uburyo bwo gukora ihinamwandiko	24
II.2.3. Amabwiriza y'ihinamwandiko	24
II.2.4. Akamaro k'ihinamwandiko.....	24
II. 3 Amabwiriza y'imyandikire y'ikinyarwanda: Imyandikire y'amazina bwite, imikoreshereze y'utwatuzo n'inyuguti nkuru.....	25
II. 3.1 Amazina bwite	25
II. 3.2. Imikoreshereze y'utwatuzo	27
II. 3.3 Imikoreshereze y'inyuguti nkuru	31
II. 4 Isuzuma risoza umutwe wa kabiri	34

UMUTWE WA GATATU: UBUREZI N'UBURERE

III.1. Gusoma no gusesengura umwandiko: Kabayiza mu ihuriro	37
III.1.1. Gusoma umwandiko.....	38
III.1.2. Gusobanura amagambo.....	40
III.1.3. Kumva no gusesengura umwandiko	40
III.2 Amazina gakondo n'amazina y'amatirano	41
III.2.1. Amazina gakondo.....	41
III.2.2. Amazina y'amatirano	44
III. 3 Ibiganiro mpaka	47
III.3.1. Inshoza y'ikiganiro mpaka	47
III.3.2 Uko bategura ikiganiro mpaka n'uko gikorwa.....	47
III.4 Amabwirizay'imyandikire: Ikata n'itakara ry'inyajwi, amagambo afatana n'adafatana	50
III.4.1 Ikata n'itakara ry'inyajwi	50
III.4.2 Amagambo afatana n'adafatana	52
III.5. Inyunguramagambo	56
III.5.1. Inshoza y'inyunguramagambo	56
III.5.2 Amatsinda y'inyunguramagambo z'ikinyarwanda	57
III.6 Isuzuma risoza umutwe wa gatatu	61

UMUTWE WA KANE: UMUCO NYARWANDA	65
IV.1 Gusoma, kumva no gusesengura umwandiko: Ruhinyuza	65
IV. 1.1 Gusoma umwandiko	66
IV.1.2 Gusobanura amagambo	67
IV.1.3 Kumva no gusesengura umwandiko	68
IV.2 Ingeri z’ubuvanganzo nyemvugo bwo muri rubanda	69
IV.2 1. Inshoza n’uturango by’ubuvanganzo nyemvugo bwo muri rubanda	69
IV.2 2. Ingeri z’ubuvanganzo bwo muri rubanda	69
IV.3 Gusoma kumva no gusesengura umwandiko: Isabwa rya Mukandahiro	75
IV.3.1 Gusoma umwandiko	75
IV.3.2 Gusobanura amagambo	78
IV.3.3 Kumva no gusesengura umwandiko	78
IV.4 Gusoma, kumva no gusesengura umwandiko: Kamana yitwa izina	80
IV.4.1 Gusoma umwandiko	80
IV.4.2 Gusobanura amagambo	82
IV.4.3 Kumva no gusesengura umwandiko	82
IV.5 Isuzuma risoza umutwe wa kane	83
UMUTWE WA GATANU: KUBAHIRIZA UBURENGANZIRA BWA MUNTU ...	88
V.1. Gusoma no gusesengura umwandiko: Ese tubireke dutyo?	88
V.1.1 Gusoma umwandiko	89
V.1.2 Gusobanura amagambo	91
V.1.3 Kumva no gusesengura umwandiko	91
V.2 Gusoma no gusesengura umwandiko: Turyamagane twese	92
V.2.1 Gusoma umwandiko	93
V.2.2 Gusobanura amagambo	96
V.2.3 Kumva no gusesengura umwandiko	96
V.3 Umuvugo	97
V.3.1 Inshoza y’umuvugo	97
V.3.2 Uturango tw’umuvugo	97
V.3.3 Ikeshamvugo rikoreshwa mu mivugo	98
V.3.3 Akamaro k’imivugo	99
V.4. Isuzuma risoza umutwe wa gatanu	100

UMUTWE WA GATANDATU: IKORANABUHANGA N'ITUMANAHO	102
VI.1. Gusoma no gusesengura umwandiko: Ikoranabuhanga ryaragikemuye..	102
VI.1.1 Gusoma umwandiko	103
VI.1.2 Gusobanura amagambo	105
VI.1.3 Kumva no gusesengura umwandiko.....	105
VI.2 Ntera, izina ntera n'igisantera	106
VI.2.1 Ntera	106
VI.2.2 Izina ntera	107
VI.2.3 Igisantera	108
VI.3 Inshinga.....	109
VI.3.1 Inshoza	109
VI.3.2 Ubwoko bw'inshinga	110
VI.3.3 Ibihe by'inshinga	111
VI.3.4 Uburyo bw'inshinga.....	112
VI.4. Isuzuma risoza umutwe wa gatandatu.....	115
UMUTWE WA KARINDWI: KUBUNGABUNGA IBIDUKIKIJE	118
VII.1. Gusoma no gusesengura umwandiko: Kariza mu butayu	118
VII.1.1 Gusoma umwandiko	119
VII.1.2 Gusobanura amagambo	121
VII.1.3 Kumva no gusesengura umwandiko.....	122
VII.2 Ikomorazina.....	123
VII.2.1 Inshoza y'ikomorazina	123
VII.2.2 Ikomorazina mvazina	123
VII.2.3 Ikomorazina mvanshinga	124
VII.3 Isuzuma risoza umutwe wa karindwi.....	125
IMIGEREKA	129
1. Twiyungure amagambo	129
2. Imyandiko y'inyongera.....	131
2.1. Insigamugani: Akebo kajya iwa mugarura.	131
2.2. Insigamugani: Burya si buno!	132

IRIBURIRO

Muri iki gihe mu Rwanda, uburyo bw'imyigire n'imyigishirize bushingiye ku munyeshuri. Iki ni kimwe mu bitabo bijyanye n'ubwo buryo, kigomba kwigishwa mu mwaka wa kane w'amashuri yisumbuye muri Gahunda ry'Abafasha b'Abafaromo. Cyanditswe ku buryo giha abanyeshuri ubushobozi bunyuranye bwatuma bitwara neza ku isoko ry'umurimo, kikanabategurira kandi gushobora gukurikira amashuri makuru no kwirwanaho mu buzima busanzwe.

Iki gitabo k'Ikinyarwanda kigabanyijwemo imitwe irindwi ikubiyemo insanganyamatsiko zijyanye n'umuco nyarwanda, kubungabunga ubuzima, umuco wo kuzigama, kubaka umuco w'amahoro, ingaruka z'ibiyobyabwenge, gukunda Igihugu n'iterambere. Cyanditswe ku buryo gifasha abanyeshuri kugira n'ubundi bumenyi nsanganyamasomo mu nzego zinyuranye zijyanye n'ubuzima busanzwe bwa buri muni mu Rwanda no ku isi yose muri rusange. Harimo ubumenyi fatizo bwatuma biyungura ubwenge mu bumenyi ngiro, bakikemurira ibibazo, bagasabana n'abandi, bagashobora gusobanura ibyo biga no guhanga udushya, bashungura ibitekerezo, batamira bunguri gusa ibiri mu gitabo cyangwa ibyo babwirwa n'umwarimu. Harimo imyitozo inyuranye ituma bagira uruhare mu myigire yabo. Iki gitabo kizafasha abanyeshuri gukura mu bitekerezo no gushobora kwisobanura neza imbere y'abandi.

Hari byinshi umunyeshuri yigira kuri bagenzi be mu ishuri. Ni yo mpamvu imyinshi mu myitozo ikubiye muri iki gitabo isaba abanyeshuri kujya impaka, kungurana ibitekerezo n'abandi bakorera mu matsinda manini cyangwa mato. Indi myitozo irimo isaba gukora ubushakashatsi mu nzu z'isomero, kuri interineti cyangwa kwifashisha itangazamakuru rinyuranye.

Iki gitabo kizafasha abanyeshuri gusoma badategwa inyanganyamatsiko zinyuranye, inkuru zishingiye ku biriho cyangwa ibihimbano, no kumva insanganyamatsiko z'ingenzi, ibitekerezo, ibyabaye, abavugwa mu nkuru n'uturango tw'ururimi rwakoreshejwe. Kizabafasha guhanga imyandiko irambuye ku nsanganyamatsiko zatoranyijwe, bakurikiranya neza ibitekerezo, guhanga bigana, no kwandika ibitekerezo byabo ku buryo bufututse.

Iki gitabo kizafasha abanyeshuri kandi kuyobora no gutegura ibiganiro mpaka, gushungura ibitekerezo bumvise cyangwa basomye, kuvuga badategwa, gutanga ibitekerezo bigaragaza uko bumva ibintu, gutanga ingingo zishyigikira cyangwa zivuguruzwa ibitekerezo by'abandi ku nsanganyamatsiko zinyuranye no guhitamo ibyo bavugaga n'uburyo babivugamo bitewe n'icyo bagamije n'abo babwira. Iki gitabo kizafasha nanone gusesengura imiterere y'ururimi no gukoresha uko bikwiye ubwoko bunyuranye bw'amagambo mu nteruro.

Iki gitabo cyanditswe ku buryo cyorohera abanyeshuri kugisoma hagaragazwa neza imitwe, ibyigwa bikubiye muri buri mutwe bihabwa nimeru, bikagaragazwa ku buryo bwihariye kandi hagaragazwa neza ibika.

Mu mpera y'iki gitabo, hari ibitabo n'inyandiko byifashishijwe cyandikwa. Hari kandi imyandiko y'inyongera itandukanye yafasha umunyeshuri kurushaho kwitoza gusoma no kwiyungura ubumenyi. Hari nanone ibisobanuro by'amagambo akubiye mu myandiko, atondetse yubahirije itonde ry'inyuguti z'Ikinyarwanda. Umunyeshuri aramutse ahuye n'ijambo rimugoye mu kuribonera igisobanuro, yareba niba yarisangamo. Aramutse atarisanzemo yakwifashisha inkoranyamagambo.

Muri make, iki gitabo kizafasha abanyeshuri kugira ubumenyi butandukanye mu rurimi rw'Ikinyarwanda, ubumenyi ngiro bwo kuruvuga neza no kurwandika neza n'ubukeshya bugaragazwa n'ubupfura, ubunyangamugayo, ubumuntu ndetse n'ubutwari buranga Umunyarwanda wuzuye.

Ubushobozi bw'ingenzi bugamijwe

- Gusesengura umwandiko agaragaza ingingo z'ingenzi ziwukubiyemo.
- Gutegura no kuvuga ikiganiro mbwirwaruhame.
- Kwandika neza inyuguti n'ibihekane by'Ikinyarwanda.



Igikorwa cy'umwinjizo

- Rondora indwara ziterwa n'isuku nke n'indwara z'ibyorezo uvuge n'uburyo butandukanye bwo kuzirinda.
- Uramutse ufite ibirori kandi ari wowe mushyits imukuru, ugomba kuvuga ijambo ry'umunsi, ni ibiki wa kwitaho ngo ijambo ryawe rishimishe abaryumva? Ni iyihe myifatire wumva yakuranga mu gihe uri kuvugira imbere y'abo ugezaho ijambo ryawe?
- Ushingiye ku bumenyi ufite garagaza ibyiciro by'inyuguti z'Ikinyarwanda.

1.1. Gusoma no gusesengura umwandiko: Kwirinda biruta kwivuza



Igikorwa 1.1

Soma umwandiko ushakemo amagambo udasobanukiwe hanyuma uyasobanure wifashishije inkoranya cyangwa inyito afite mu mwandiko kandi usubize n'ibibazo byawubajijweho.

I.1.1 Gusoma umwandiko

Soma umwandiko ukurikira:

Kwirinda biruta kwivuza



Ku wa Gatandatu wa nyuma w'ukwezi kwa Nyakanga, abaturage bo mu Mudugudu wa Bukunzi bazindukiye mu muganda, basibura imiyoboro y'amazi iri mu mudugudu wabo. Umuganda urangiye umuyobozi w'umudugudu abasaba kwicara hamwe ngo umuyobozi ushinzwe imibereho myiza mu kagari kabo abagezeho ikiganiro yari yabateguriye.

Bakimara kwicara, ushinzwe imibereho myiza mu murenge wabo yarahagurutse, abaturage bose bamwakira nk'intore bishimye. Yatangiye agira ati: "Baturage mutuye mu Mudugudu wa Bukunzi, nongeye kubasuhuzwa, nimugire amahoro! Niba nibuka neza maze kubasura inshuro eshatu cyangwa enye muri iki gikorwa cy'umuganda, tukaganira ku nsanganyamatsiko zinyuranye. N'uyu munsu rero ndagira ngo mbamenyeshe ko nateguye kubaganiriza ku nsanganyamatsiko igira iti: "Dusobanukirwe zimwe mu ndwara ziterwa n'umwanda, dufatanye kuzirwanya."Ndifuza ko ntakwiharira ijamba ahubwo ko twakungurana ibitekerezo kuri izo ndwara ndetse n'ingamba twafata ngo tuzikumire mu mudugudu wacu.

Nyuma yo kuvuga insanganyamatsiko y'ikiganiro, yakomeje abaza abaturage umwe ku wundi icyo indwara ziterwa n'umwanda ari cyo. Abaturage bamwe bavuze ko ari indwara ziterwa no kurya ibiribwa cyangwa kunywa ibinyobwa bitujuje ubuziranenge, abandi bavuga ko ari indwara ziterwa n'isuku nke. Yabashimiye ibitekerezo byiza batanze ababwira ko ikindi yongeraho izo ndwara zishobora guterwa no kutagira

isuku y’umubiri, iy’aho dutekera, iy’aho turara, iy’imyambaro n’ibindi.

Yakomeje avuga ko nk’impiswi, macinya n’inzoka zo mu nda zishobora guterwa n’uko tutagiriye isuku ibiribwa turya,ibinyobwa tunywa cyangwa se tutakarabye intoki mbere yo kurya.Yongeyeho ko inyinshi mu ndwara z’amenyo zikomoka ku kutayasukura uko bikwiye, ndetse ko na tirikomona ishobora guterwa no kudasukura neza imyanya ndangagitsitsina. Nanone kandi ngo kutoga buri muni, kwambara imyenda itameshe, kuryama mu bintu bitameshe, kudasukura aho tuba bishobora gutera indwara nk’ubuheri, ise, indâ n’amavunja aterwa n’imbaragasa.

Ushinzwe imibereho myiza y’abaturage mu murenge yabwiye abaturage ko indwara ziterwa n’umwanda zigira ingaruka kuko zitera imfu nyinshi kandi zikadindiza iterambere ry’igihugu. Izo ndwara ziravurwa zigakira ariko ibyiza ni ukuzirinda aka wa mugani ugira uti: “Kwirinda biruta kwivuzza” kandi ngo: “Amagara arasesekara ntayorwa”. Yasabye abaturage gusenyerera umugozi umwe,bakarwanya bivuye inyuma indwara ziterwa n’umwanda, bagira isuku muri byose, ntihabeho ba ntibindeba. Abasaba kandi ko uwo zagaragayeho yajya yihutira kujya kwa muganga kugira ngo avurwe.

Mu gusoza, ushinzwe imibereho myiza y’abaturage mu murenge yashimiye abaturage, anabasaba kurushaho kubungabunga ubuzima bwabo bahashya icyo ari cyo cyose cyaba intandaro y’indwara ziterwa n’umwanda kugira ngo bahorane ubuzima buzira umuze.

1.1.2 Gusobanura amagambo

Shaka mu mwandiko amagambo udasobanukiwe, uyasobanure wifashishije inkoranya.

1.1.3 Kumva no gusesengura umwandiko

Subiza ibibazo bikurikira:

1. Ni izihe ndwara ziterwa n’umwanda zavuzwe mu mwandiko?
2. Ni iki cyakorwa ngo hakumirwe indwara ziterwa n’umwanda?
- 3.Ukurikije ibivugwa mu mwandikoko, garagaza uburyo butandukanye dushobora kwanduramo indwara ziterwa n’umwanda.
4. Garagaza ingingo z’ingenzi ziri mu mwandiko.
5. Huza ibivugwa mu mwandiko n’ubuzima busanzwe.
6. Ni izihe indwara ziterwa n’umwanda zitavuzwe mu mwandiko? Ni gute twazirinda?



Imyitozo

Ongera usome umwandiko maze ukore imyitozo ikurikira:

1. Mu ruhushya **A** harimo amagambo/urwunge rw'amagambo, mu ruhushya **B** harimo ibisobanuro. Ushingiye ku mwandiko "Kwirinda biruta kwivuzza" hitamo igisobanuro kiri cyo.

A	B
Kwiharira ijambo	<p>a) Kureka abo muri kumwe bakisanzura bavuga ibitekerezo byabo.</p> <p>b) Kurondogora abandi ntibabone umwanya wo kuvuga.</p> <p>c) Guha abandi uruhare bagatanga ibitekerezo byabo.</p>
Gusenyerera umugozi umwe	<p>a) Kudahuza mu gikorwa runaka.</p> <p>b) Kumva ibintu kimwe hagamijwe kugera ku ntego runaka.</p> <p>c) Gufatanyiriza hamwe gutashya inkwi mukazihambira ku mugenzi umwe</p>
Ubuzima buzira umuze	<p>a) Ubuzima buhora burwaye.</p> <p>b) Ubuzima budafite ikerekezo.</p> <p>c) Ubuzima bwiza butarangwamo uburwayi.</p>
Amagara arasesekara ntayorwa	<p>a) Umuntu agomba kubungabunga ubuzima bwe bitari ibyo yabubura.</p> <p>b) Amagara arameneka ntibabashe kuyayora</p> <p>c) Amaraso arameneka ntibayayore.</p>
Gira icyo uvuga ku ndwara ziterwa n'umwanda n'uburyo zakwirindwa. Ubuziranenge	<p>a) Ubudakemwa bw'ikintu runaka.</p> <p>b) Ubudahangarwa bw'ikintu runaka.</p> <p>c) Ubukomere bw'ikintu runaka</p>

2. Gira icyo uvuga ku ndwara ziterwa n'umwanda n'uburyo zakwirindwa.

I.2. Amabwiriza y’imyandikire y’Ikinyarwanda: Inyajwi, ingombajwi, inyerera n’ibihekane



Igikorwa 1.2

Ushingiye ku bumenyi ufite, garagaza amabwiriza agenga imyandikire y’inyajwi, ingombajwi, inyerera n’ibihekane mu Kinyarwanda.

I.2.1 Imyandikire y’inyajwi

Haseguriwe imyandikire y’ubutinde n’amasaku, injajwi z’Ikinyarwanda zandikishwa inyuguti zikurikira: a, e, i, o, u.

Gukurikiranya injajwi mu myandikire isanzwe mu Kinyarwanda birabujijwe, uretse mu nyandiko ya gihanga yubahiriza ubutinde n’amasaku, mu ijambo (i) saa ry’iritirano ribanziriza amasaha, mu marangamutima, mu migereka n’inyigana birimo isesekaza, na bwo handikwa injajwi zitarenze eshatu.

Ingero:

- Saa kenda ndaba ngeze iwawe.
- Irangamutima “yooo”!
- Umugereka: Ndagukunda “cyaneeee”!
- Inyigana “pooo”! ; “mbaaa”!

I.2.2 Imyandikire y’inyerera

Inyerera ni ijwi ritari injajwi ntiribe n’ingombajwi, ariko rifite uturango rihuriraho n’inyajwi n’utundi rihuriraho n’ingombajwi. Ayo majwi ajya kuvugika nk’inyajwi, nyamara kandi ugasanga yitabaza injajwi nk’ingombajwi kugira ngo avugike neza. Iki ni cyo gituma yitwa inyerera. Inyerera z’Ikinyarwanda zandikishwa inyuguti w na y.

Ingero

- Uwiga aruta uwanga.
- Iyange yatakaye.

I.2.3 Imyandikire y’ingombajwi

Ingombajwi z’Ikinyarwanda zandikishwa inyuguti imwe. Ni izi zikurikira: b, c, d, f, g, h, j, k, m, n, p, r, l, s, t, v, z.

Ikitonderwa

- Inyuguti “I” ikoreshwa gusa mu izina bwite “Kigali”, umurwa mukuru wa Repubulika y’u Rwanda, mu ijambo “Repubulika”, mu ijambo “Leta”no mu mazina bwite y’amanyamahanga y’abantu n’ay’ahantu, urugero nka Angola, Londoni, Lome, Lusaka, Buruseli, Aluberi...
- Inyuguti “I” izaguma gukoreshwa mu mazina bwite y’amanyarwanda y’abantu n’ahantu yari isanzwe ikoreshwamo kandi bayiswe mbere y’aya mabwiriza.

I.2.4 Imyandikire y’ibihokane

Ibihokane by’Ikinyarwanda byandikishwa ibimenyetso bikurikira:

bw (bg): ubwanwa, Kabgayi	rw: umurwi, urwuri
cw: icwende, imicwira	shw: umushwi, gushwana
dw: kudwinda, kudagadwa	shyw: ishywa, umwishywa
fw: igufwa, igifwera	sw: umuswa, Umuswara
gw: kugwa, umugwaneza	tsw: kotswa, kwatswa
by: kubyibuha, kubyuka	tw: ugutwi, umutware
cy: gucyocycora, gucyaha	vw: bwahovwe
jy: urujyo, kujyana	zw: gusozwa, guhazwa
ny: inyana, inyungu	nsy: insyo, insya
my: umurimy, imyugariro	nty: intyoz, ntyariza
hw: amahwa, umuhwituzi	mbw: imbwa, imbwebwe
jw: kujijwa, ijwi	mfw: imfwati
kw: gukwa, umukwabu	mpw: impwempwe
mw: umwana, umwuga	mvw: kumvwa
nw: umunwa, akananwa	ndw: kurindwa, gukundwa
pfw: gukapfakapfwa	ngw: ingwate, ingweba
pfyw: byakapfakapfywe	njw: injwiri, nyanjwenge
pw: gukopwa, icapwa	njyw: kubonjywa
pfy: bakapfakapfywe	nny: kunnyega, umukinnyi

py: gupyipyinyura, gupyinagara

ry: kuryama, uburyarya

sy: gusya, urusyo

ty: gutyara, ityazo

vy: zahovye

byw: gutubywa

myw: kuramywa, kurumywa

ryw: kuryarywa

vyw: guhovywa

mb: imbutu, imbabura

mf: imfashanyo, imfura

mp: impamvu, impapuro

mv: imvura, kumva

nd: inda, indodo

ng: ingoma, ingona

nj : injishi, injereri

nk: inkoko, inka

ns : konsa, insina

sh: umushanana, ishoka

pf: ipfundo

ts: itsinda

nsh: inshuti, inshishi

shy: ishyamba

nshy: nshyira, inshyimbo

nkw: inkware, inkweto

nshw: nshwanyaguje, nshwekure

nshyw: inshywa

nsw: inswa, konswa

ntw: intwari, intwererano

nzw: kuganzwa, kugenzwa

mvyw: arahomvomvywa (n'iki?)

mbyw: guhombywa, kuvumbywa

nt: intama, intore

nz : inzu, inzuki

ncy : incyamuro, incyuro

nyw: kunywa, kunywana

mby: imbyino, imbyaro

mpy: impyisi, impyiko

mvy: barahomvye

ndy: indyi, indyarya

njy: injyana, injyo

Ikitonderwa

- a) Usibye “bg” mu ijambo “Kabgayi” ingombajwi z’ibihokane zitari muri uru rutonde zirabujijwe.
- b) Ibihokane “(n)kw”, “(n)gw”, “hw”, bikurikiwe n’inyajwi “o” cyangwa “u”ntibyandikwa; mu mwanya wabyo handikwa “(n)ko”, “(n)ku”, “(n) go”, “(n) gu”, “ho”, “hu”.

Ingero:

- Kwanga koga ni bibi.
- Kubaka ni ukugereka ibuye ku rindi.
- Pariki ya Nyungwe ibamo inguge nyinshi.
- Ngwije na Ngoboka bava inda imwe.
- Korora inkwavu n’inkoko bifite akamaro.
- Iyo ngiye kwinjira mu nzu nkuramo inkweto.
- Mariya ahwituye Hoho kugira ngo yihute.
- Mahwane aragesa amahundo.

- c) Ibihokane “(n)jy” na “(n)cy” byandikwa gusa imbere y’inyajwi “a”, “o” na “u”.

Imbere y’inyajwi “i” cyangwa “e” handikwa “(n)gi”, “(n)ge”, “(n) ki”, “(n)ke”.

Ingero:

- Umugi ntuyemo ufite isuku.
- Gewe / ngewe ntuye mu magepfo y’u Rwanda.
- Njyanira ibitabo mu ishuri, ngewe ngiye gukina.
- Njyana kwa masenge.
- Iki ni ikibabi k’igiti.
- Ikibo cyuzuye ibishyimbo.

- d)Ibihokane bigizwe n’ingombajwi “ts”, “pf” na “c” zibanjirijwe n’inyamazuru byandikwa mu buryo bukurikira: “ns”, “mf”, “nsh”.

Ingero:

- Iyi nsinzi turayishimiye.
- Imfizi y’inshuti yange.



Imyitozo

Kora imyitozo ukurikira:

1. Mu nyandiko isanzwe inyajwi z'Ikinyarwanda ni zingaha? Zigaragaze.
2. Ni ryari inyajwi zishobora kwandikwa zikurikiranye mu nyandiko isanzwe? Tanga ingero.
3. Ni iyihe ngombajwi ifite umwihariko mu mikoreshereze yayo? Ikoreshwa he?

1.3. Gusoma no gusesengura umwandiko: Indwara z'ibyorezo



Igikorwa 1.3

Soma umwandiko ukurikira, ushake ibisobanuro by'amagambo yatanze wifashishije inkoranyamagambo hanyuma usubize n'ibibazo byawubajijweho.

1.3.1 Gusoma umwandiko

Soma umwandiko ukurikira:

Umwandiko: Indwara z'ibyorezo



Muyobozi w'Ikigo Nderabuzima cya Bwiza

Bayobozi b'utugari,

Bayobozi b'imidugudu,

Baturage mutuye mu Murenge wa Bwiza,

Nongeye kubasuhuza, nimugire amahoro.

Nyuma y'iki gikorwa cy'umuganda cyari cyaduteranyirije hano, nk'uko mubimenyerereye haba ikiganiro ku nsanganyamatsiko runaka. Uyu muni icyo kiganiro turakigezwaho n'Umuyobozi w'Ikigo Nderabuzima cya Bwiza. Madamu Muyobozi w'Ikigo Nderabuzima cya Bwiza, uyu mwanya ni uwawe kugira ngo ugeze ku baturage ikiganiro wabateguriye.

Urakoze kumpa umwanya.

Bwana Muyobozi w'Umurenge,

Bayobozi b'utugari,

Bayobozi b'imidugudu,

Baturage b'Umurenge wa Bwiza, nimugire amahoro.

Nyuma y'iki igikorwa cy'umuganda, tugiyeye kuganira ku ndwara z'ibyorezo n'ingamba zo kuzirinda. Sintwara umwanya munini, ngiyeye kubaganiriza iminota mike ishoboka. Ndabanza nsobanure indwara z'ibyorezo icyo ari cyo, mvuge kuri zimwe mu ndwara z'ibyorezo, uko zikwirakwira, nsoreze ku ngamba zo kuzirwanya no kuzirinda.

Bayobozi,

Baturage b'Umurenge wa Bwiza,

Indwara z'ibyorezo ni indwara zishobora guhitana umubare munini w'abantu mu gihe gito; zibasira imbaga ku buryo haboneka umubare udasanzwe w'abagaragaza izo ndwara mu gace runaka ndetse no mu gihe runaka. Indwara bayita icyorezo igihe yakwiriye mu gace runaka, mu gihugu cyangwa ku isi yose.

Zimwe mu ndwara zibasira abantu zikitwa ibyorezo twavugaga nka korera, marariya, macinya, igituntu, sida, ehora na kovidi-19 yakwirakwiye ku isi yose mu gihe gito. Indwara z'ibyorezo zishobora kwandura ku buryo butaziguye no ku buryo buziguye. Ku buryo buziguye, indwara ikwirakwira iyo agakoko kayitera kinjiye mu muntu gaturutse mu ndiri yako bityo kagahita gakwira mu mubiri. Umuntu rero ashobora kuba imwe mu ndiri y'agakoko bityo akaba ashobora kwanduza mugenzi we amukozeho, basomanye, bakoranye imibonano mpuzabitsina, igihe cyo konsa, igihe cyo kubara, mu gutanga amaraso, kongera ingingo mu mubiri w'umuntu n'ibindi. Mu buryo buziguye, indwara yinjira mu mubiri w'umuntu inyuze

mu biryo yariye, mu mazi yanyoye mu bikoresho binyuranye byanduye, mu mwuka yahumetse, ikindi kandi agakoko gatera indwara gashobora kunyura mu dusimba no mu zindi nyamaswa, mu ivumbi cyangwa mu bitonyanga by'imvura. Ngira ngo murumva ko hari inzira zitandukanye twakwanduriramo indwara z'ibyorezo.

Bayobozi,

Baturage b'Umurenge wa Bwiza,

Aha mushobora kumbaza muti: “Ni izihe ngamba twafata kugira ngo turwanye indwara z'ibyorezo cyangwa se tuzirinde?” Iyo hamaze kumenyekana imvano y'indwara n'uburyo bwayo bwo gukwirakwira, hafatwa ingamba zihamye zo kuyirwanya. Niba indwara iterwa n'umwanda kuyirinda ni ukugira isuku, niba yanduzwa n'udukokoko bisaba kutwirinda no gusenya indiri zatwo, niba indwara ifite urukingo kuyirinda bisaba kwikingiza kugira ngo igihe yakugezeho itakuzahaza cyangwa ngo iguhitane. Nitwimakaze umuco w'ubuziranenge twirinda ibiribwa cyangwa ibinyobwa byahumanye cyangwa ibyarengeje igihe. Tugirire isuku umubiri wacu n'ahodutuye. Twirinde udukoko nk'imibu itera marariya, dutema ibihuru, dusiba ibizenga by'amazi ishobora kororokeramo, turara mu nzitiramibu, dutera imiti n'ibindi. Ku ndwara zandurira mu mibonano mpuzabitsina, abantu bagomba kwirinda imibonano mpuzabitsina idakingiye. Ikindi kandi ni uko abantu bagomba kwitabira gahunda y'inkingo uko yateganyijwe. Zaba inkingo zihabwa abana bato ndetse n'izitangwa ku bantu bose mu bihe bidasanzwe by'ibyorezo.

Bayobozi,

Baturage bo mu Murenge wa Bwiza,

Nababwiye ko ntari bwizimbe mu magambo. Indwara z'ibyorezo zitwara ubuzima bw'imbaga nyamwinshi, zigateza urusobe rw'ibibazo. Nimucyo dusenyere umugozi umwe, tuzirwanye twivuye inyuma. Nihagira ugaragaza ibimenyetso runaka by'imwe mu ndwara z'ibyorezo, dutangire amakuru ku gihe kugira ngo abashinzwe gufata ingamba bazifate mu maguru mashya. Niba kandi wagaragaweho ibimenyetso by'indwara y'icyorezo, ihutire kujya kwa muganga kugira ngo ukurikiranwe amazi atararenga inkombe. Bityo urokore ubuzima bwawe n'ubw'abo washoboraga kwanduza.

Murakoze mbashimiye uburyo mwanteze amatwi nkaba nizera ko twese hamwe tugiye guharanira kubungabunga ubuzima bwacu duhashya indwara z'ibyorezo.

I.3.2 Gusobanura amagambo

Sobanura amagambo cyangwa amatsinda y'amagambo akurikira:

- Kwibasira imbaga
- Gufata ingamba
- Indiri
- Intandaro
- Gucurwa inkumbi n'indwara

I.3.3 Kumva no gusesengura umwandiko

Subiza ibibazo bikurikira:

1. Ni ryari tuvuga ko indwara ari icyorezo?
2. Ni uruhe ruhare ibidukikije bishobora kugira mu kwanduza indwara z'ibyorezo?
3. Ni iyihe nama wagira umuntu wagaragaraweho n'indwara y'icyorezo?
4. Uhereye ku bumenyi rusange usanzwe ufite, tanga urugero rw'indwara y'icyorezo umuntu ashobora kwanduza undi:
 - a) Amukozeho
 - b) Amusomye
 - c) Bakoranye imibonano mpuzabitsina
 - d) Mu gihe cyo konsa
 - e) Mu gihe cyo kubyara
5. Garagaza ingingo z'ingenzi ziri mu mwandiko.
6. Garagaza ingamba Leta y'u Rwanda yafashe mu kurwanya icyorezo cya kovid-19.



Imyitozo

Ongera usome umwandiko “**Indwara z’ibyorezo**” hanyuma ukore imyitozo ikurikira:

1. Uzuza interuro zikurikira ukoresheje aya amagambo: amazi atararenga inkombe, indiri, gufata ingamba, uburyo butaziguye, ibiribwa bihumanye, kwibasira imbaga.
 - a) Ibiziba n’ibihuru ni y’imibu itera marariya.
 - b) Bariye none barwariye rimwe.
 - c) Iyo umuntu afashwe n’uburwayi ni byiza kumujoyana kwa muganga vuba.....
 - d) Abanyarwanda bose bakwiye zo gukingiza abana bakivuka.
2. Ni izihe ngaruka z’indwara z’ibyorezo ku iterambere ry’umuryango n’iry’igihugu muri rusange? Gira abaturage inama zabafasha kwirinda indwara z’ibyorezo.

I.4. Imbwirwaruhame



Igikorwa 1.4

Ifashisha umwandiko “**Indwara z’ibyorezo**”, ukore ubushakashatsi maze usubize ibibazo bikurikira:

1. Tahura ubwoko bw’umwandiko “**Indwara z’ibyorezo**”.
2. Tahura inshoza, uturango n’imbata byawo.
3. Ni ayahe mabwiriza agenga ubu bwoko bw’umwandiko.

I.4.1 Inshoza y’imbwirwaruhame

Imbwirwaruhame ni ijambo umuntu ategura akarigeza ku bantu benshi, bakirinda kumurogoya, ahubwo bakamutega amatwi. Imbwirwaruhame ishobora kuba ndende cyangwa ngufi bitewe n’itego yayo. Imbwirwaruhame zivuga ku nsanganyamatsiko zinyuranye: izibwiriza iby’idini, izivuga ibya poritiki, izo kwizihiza iminsi mikuru, zikangurira abantu igikorwa runaka n’ibindi. Ni yo mpamvu imbwirwaruhame zishobora kuvugirwa ahantu hanyuranye nko mu nsengeru, mu ishuri, mu nama n’ahandi.

I.4.2 Uturango tw'imbwirwaruhame

Imbwirwaruhame irangwa n'amagambo y'icyubahiro ahamagara ababwirwa kugira ngo bitabire gutega amatwi. Ayo magambo atangira imbwirwaruhame kandi akagenda agaruka nyuma y'ingingo runaka.

Amagambo y'icyubahiro akunze gukoreshwa agaragara mu mbonerahamwe ikurikira ni:

Ijambo ry'icyubahiro	Uwo rikoreshwaho
Nyirubutagatifu	Imana
Nyirubutungane	Paapâ
Nyakubahwa	Perezida w'igihugu
Nyiricyubahiro	Musenyeri
Bwana	Minisitiri, Guverineri, Meya, Umuyobozi w'ikigo n'abandi b'igitsina gabo.
Madamu	Minisitiri, Guverineri, Meya, Umuyobozi w'ikigo n'abandi b'abagore.
Madamazera	Minisitiri, Guverineri, Meya, Umuyobozi w'ikigo n'abandi b'abakobwa.

Imbwirwaruhame ishobora kubanzirizwa n'ijambo rivunyishiriza ugiye kuyivuga.

Urugero:

Umwandiko w'imbwirwaruhame "Indwara z'ibyorezo".

I.4.3 Imbata y'imbwirwaruhame

Imbwirwaruhame igizwe n'ibice bine: Intangiriro, igihimba n'umwanzuro.

1. Intangiriro

Mu ntangiriro uvuga imbwirwaruhame abanza kuvuga abanyacyubahiro bari aho n'abo ubutumwa bugenewe ahereye ku w'imena muri bo akurikije icyubahiro byabo, gusa akirinda kubavuga mu mazina yabo bwite. Uvuga imbwirwaruhame kandi ageza indamukanyo ku bo abwira.

Mu ntangiriro kandi ni ho utanga ikiganiro agaragaza insanganyamatsiko ari buze kuvugaho, ndetse akamurika n'ingingo ariburambure, asa n'utera amatsiko abamuteze amatwi. Iki gice ntikigomba kuba kirekire.

2. Igihimba

Iki gice ni cyo gice fatizo k'imbwirwaruhame. Ni muri iki gice utanga ikiganiro arambura ingingo yateguye kuvugaho, akazikurikiranya neza ashingiye ku buremere bwazo. Ibi bituma abamutega amatwi batarambirwa kuko aba yahereye ku ngingo zibafitiye akamaro cyane. Iyo bibaye ngombwa ko hari ingero zitangwa, uvuga imbwirwaruhame akoresha ingero zijyanye n'abo abwira cyangwa aho avugira. Kubera ko iki gice gishobora kuba kirekire, utanga ikiganiro mbere yo kujya ku yindi ngingo ashobora kugenda akoresha amagambo yo gukangura abo abwira yo ngera kubavuga mu byubahiro byabo.

3. Umwanzuro/ Umusozo

Muri iki gice uvuga imbwirwaruhame asoza yibutsa abamuteze amatwi ingingo z'ingenzi baganiriyeho kugira ngo basigarane ishusho y'ikiganiro. Ni muri iki gice kandi ashobora kugaragaza ibyifuzo, ingamba cyangwa inama, bitewe n'imiterere y'ikiganiro. Niba yashishikarizaga abantu kurwanya ibiyobyabwenge arasoza agaragaza ingamba zafatwa mu kubirwanya. Muri iki gice kandi utanga ikiganiro asoza ashimira abari bamuteze amatwi.

1.4.4 Amabwiriza agenga imbwirwaruhame

1. Uko imbwirwaruhame itegurwa n'uko isomwa

Mbere yo gutanga ikiganiro mbwirwaruhame, ugitegura agomba kumenya ibi bikurikira:

- Ni ngombwa kumenya abo agiye kubwira imbwirwaruhame abo ari bo n'aho ababwirira.
- Ni iki bashobora kumva? Bari mu kihe kigero k'imyaka? Bakora iki? Ni iki bahuriyeho?
- Gutegura imbwirwaruhame.
- Kumva neza insanganyamatsiko y'imbwirwaruhame byaba ngombwa akanasoma ibitabo binyuranye bivuga kuri iyo nsanganyamatsiko.
- Gukusanya ibyo azavugaga mu ngingo zinyuranye z'imbwirwaruhame ashingiye ku byo yasomye cyangwa yabajije abandi.
- Gushaka intego z'ikiganiro ke akanakora imbata y'ikiganiro ke.

2. Imyifatire n'imyitwarire y'uvugaga imbwirwaruhame

Utanga ikiganiro mbwirwaruhame agomba kuba:

- a) Yambaye imyambaro idakojeje isoni.
- b) Kumenya guhagarara neza imbere y'abandi nta mususu.

- c) Kuvuga imbwirwaruhame ye adategwa.
- d) Kuraranganya amaso mu bo abwira, kirazira kubatera umugongo no kuba imbata y'urupapuro.
- e) Kurangurura ijwi kugira ngo imbwirwaruhame yumvikane.
- f) Kuvuga atarandaga cyane kugira ngo abamuteze amatwi batarambirwa kandi ntiyihute cyane mu mvugo kugira ngo ibyo avuze birusheho kumvikana.
- g) Kwirinda imvugo nyandagazi.
- h) Kugenda atanga ingero zihuye n'ikigero cy'abo abwira cyangwa se icyo bakora.

Ikitonderwa:

Utegura imbwirwaruhame ayitegura yandika, akazayivuga asoma ibyo yanditse, mu rwego rwo kwirinda kuvuga ibiterekeranye no kwisubiramo bya hatu na hatu. Hashobora kuvugwa imbwirwaruhame ihanitse cyangwa idahanitse, umuntu akayivuga atayiteguye. Ibyo ni iby'abafite iyo mpano si ibya buri wese kuko bigira abahanga babyo. Ibyo bigaragarira cyanecyane nko mu misango y'ubukwe, ku minsi mikuru, mu birori runaka.



Umwitozo

Kurikirana imbwirwaruhame iri mu majwi cyangwa mumajwi n'amashusho maze uyijore.

Umukoro

Ishyire mu kigwi cy'umujoyanama w'ubuzima wandike imbwirwaruhame ku ndwara y'igituntu, uyigenere abatwariye b'umudugudu runaka hanyuma uzayigeze kuri bagenzi bawe.

I.5. Isuzuma risoza umutwe wa mbere

Soma umwandiko hanyuma usubize ibibazo biwukurikira.

Umwandiko: Inkingo n'akamaro kazo

Kuva muntu yabaho, ubuzima bwe bwagiye bwugarizwa n'indwara nyinshi zirimo n'iz'ibyorezo. Ngize za mugiga, iseru, akaniga, imbasa, kovidi-19 n'izindi. Kera ubuvuzi butaratera imbere, indwara z'ibyorezo zibasiraga abantu, zikabica umusubizo. icyakora, impuguke n'abashakashatsi mu by'ubuzima ntibahwemye gushakisha icyatuma izo ndwara zidakomeza kwibasira abantu. Ni muri urwo rwego havumbuwe imitin'inkingo binyuranye.

Hari inkingo zihabwa abagore batwite n'izihabwa abana mu bihe bitandukanye. Zimwe mu nkingo zihabwa abana ni izikingira igituntu, imbasa, kokorishi, agakwega (tetanosi), akaniga, impiswi, iseru n'izindi. Hari kandi inkingo zihabwa abantu mu gihe bibaye ngombwa. Nk'iyu hadutse ibyorezo (kovid-19, ehora, mugiga, ...) cyangwa abantu bagiye mu ngendo zitandukanye aho bashobora guhuriramo n'indwara z'ibikatu. Abana b'abakobwa bujuje imyaka cumi n'ibiri na bo bahabwa urukingo rwa kanseri y'inkondo y'umura. Mu rwego mpuzamahanga haracyashakishwa n'izindi nkingo z'indwara z'ibyorezo nka Sida, kanseri, diyabete n'izindi.

Buri mubyeyi w'Umunyarwanda agomba gukingiza abana be inkingo zose nk'uko ziteganywa na Minisiteri y'Ubuzima. Gukingira abana bikorwa kuri gahunda. Iyo umwana akivuka ahabwa urukingo rw'igituntu n'urw'imbasa. Yamara ukwezi n'igice, agahabwa urw'imbasa, kokorishi, agakwega bamwe bita tetanosi, akaniga, umwijima wo mu bwoko bwa epatite B, pinemokoke hamwe n'urw'impiswi. Ku mezi abiri n'igice akingirwa nanone imbasa, kokorishi, agakwega, akaniga, umwijima, umusonga n'impiswi. Iyo umwana yujuje amezi atatu n'igice ahabwa urukingo rw'imbasa, kokorishi, agakwega, akaniga, umwijima, umusonga n'impiswi. Yongera gukingirwa agize amezi ikenda aho ahabwa urukingo rw'iseru na rubeyore. Iyo agejeje ku mezi cumi n'atanu, ni ukuvuga umwaka n'amezi atatu ahabwa urukingo rw'iseru ari na rwo ruheruka izindi muri uru ruhererekane rwazo.

Izo nkingo zose rero zifite akamaro gakomeye ko kurinda no gukumira indwara zitarinjira mu mubiri w'umuntu. Zifite akamaro kandi ko kubaka ubudahangarwa bw'umubiri ku buryo n'iyu indwara yinjijemo itazahaza umuntu.

Gahunda y'inkingo ikwiye gufatwa nk'amata y'abashyitsi, ikitabirwa, abantu bakareka kuyikerensa, kuko kwirengagiza gufata inkingo byabakururira akaga gakomeye nk'ubumuga cyangwa se urupfu. Ikindi abantu bagomba kumenya, ni uko inkingo zose z'ibanze zitangwa ku buntu, nta kiguzi bisaba.

Abashinzwe kubika inkingo, bagomba kuzibika neza mu buryo bwujuje ubuziranenge kugira ngo zitangirika, zikaba zagira ingaruka ku buzima bw'abantu. Abashinzwe gukingira na bo bagomba kubikorana ubwitonzi n'ubushishozi kugira ngo hatagira uwo biviramo kurwara cyangwa kumugara.

Muri make, inkingo zifitiye abantu akamaro kanini kuko zibarinda kwandura no kuzahazwa n'indwara zinyuranye. Bityo rero, abantu bakwiye kwitabira gukingirwa no gukingiza abana kuko urukingo ari ingabo y'ubuzima kandi "kwirinda biruta kwivuza."

I. Ibibazo byo kumva no gusesenguraumwandiko

1. Sobanura uburyo indwara z'ibyorezo zishobora kwirindwa uhereye ku bivugwa mu mwandiko.
2. Sobanura akamaro k'inkingo ku buzima bw'umuntu.
3. Erekanwa indwara zavuzwe mu mwandiko zitarabonerwa urukingo n'ibivugwa ko biri kuzikorwaho.
4. Wavuga iki ku buryo bwo kubika no gutanga inkingo ubihuza n'umuco w'ubuziranenge?
5. Erekanwa ingingo z'ingenzi ziri muri uyu mwandiko.

II. Inyunguramagambo

1. Koresha aya magambo dusanga mu mwandiko mu nteruro wihimbiye:
 - a) Ibyorezo
 - b) Impuguke
 - c) Kubungabunga
 - d) Kugosorera mu rucaca

III. Imyandikire

1. Kosora imyandikire mu nteruro zikurikira
 - a) Mukabgizayaguzetelefoninyinci.
 - b) Yoooooo! Ese mwaragwaye.
2. Andika ijamba ririmo igihekane
 - a) vy
 - b) nsy
 - c) mfw
 - d) mpw

IV. Imbwirwaruhame

- a) Ni akahe karango k'ingenzi k'imbwirwaruhame?
- b) Vuga ibyitabwaho mbere yo gutanga imbwirwaruhame.
- c) Vuga ine mu myifatire iranga umuntu utanga ikiganiro mbwirwaruhame.

Ubushobozi bw'ingenzi bugamijwe

- Gusesengura umwandiko ku burunganire n'ubwuzuzanye mu muryango atahura ingingo z'ingenzi ziwukubiyemo.
- Guhina umwandiko yasomye ahereye ku ngingo z'ingenzi ziwugize.
- Kwandika yubahiriza amabwiriza y'imyandikire y'Ikinyarwanda.



Igikorwa cy'umwinjizo

Ushingiye ku bumenyi ufite:

- *Sobanura uburunganire n'ubwuzuzanye, ugaragaze uko bwari bumeze kera mu Rwanda n'uko bumeze ubu.*
- *Wakora ute inshamake y'umwandiko?*
- *Sobanura imikoreshereze y'inyuguti nkuru n'utwatuzo mu Kinyarwanda.*

II.1 Gusoma no gusesengura umwandiko: Umuryango wa Migambi



Igikorwa 2.1

Soma umwandiko ukurikira, ushakemo amagambo udasobanukiwe hanyuma uyasobanure wifashishije inkoranyamagambo kandi usubize n'ibibazo byawubajijweho.

II. 1.1 Gusoma umwandiko

Soma umwandiko ukurikira:

Umuryango wa Migambi



Umugabo Migambi yari atuye mu Kagari ka Rutare. Yabanaga n’umugore we Mukarwego ndetse n’umukobwa wabo Kankindi. Yakundaga gufatanya n’umugore we imirimo ndetse bakajya inama. Ubwo bufatanye bwatumye batera imbere. Nyuma yaje kugira umurengwe, yishora mu ngeso mbi z’ubusinzi, gukubita umugore no kumuharira imirimo yose. Iterambere ryabo ritangira kuyoyoka.

Umunsi umwe, Migambi yavuye mu kabari hakiri kare, asanga Mukarwego yoza amasahani. icyo gihe umwana muto yarariraga, intama yona amasaka yari arunze mu rugo. Migambi abonye ibintu byinshi byandagaye ku mbuga, abaza umugore we impamvu y’ako kajagari. Ubwo umugore atangira kumusobanurira ko byatewe n’imirimo myinshi. Migambi na we aho kumwumva, uburakari buba bwinshi nuko akuramo ishati, atangira gufunga amakofe ngo amukubite nk’uko yari asanzwe abigenza.

Muri ako kanya, abona umukobwa we Kankindi ahingutse mu bikingi by’amaremba, ari kumwe n’umuhungu biganaga mu mwaka wa kane w’amashuri yisumbuye. Ubwo Migambi isoni ziramukora, ahita yambara ishati ye yinjira mu nzu. Mukarwego we ariruhutsa ati: “Bana ba, ni Imana y’i Rwanda ibangoboreye, Migambi yari agiye kunyica!”

Kankindi yinjira mu nzu, asanga se yicaye mu ruganiriro aramusuhuza. Amwereka Karangwa umunyeshuri bigana, bagiye gufatanya umukoro. Se aramubwira ati: “Nta kibazo mwana wa! Ni byiza”. Migambi akomerezaho abwira Kankindi ati: “Ko

mbona utishimye?” Kankindi ati: “Ikimbabaje ni uko nsanze mwongeye kurwana nanone. Dawe, ibi bizakomeza gutya kugeza ryari? Birambabaza kuba muhora murwana kandi mupfa ubusa. Bintera ikimwaro mu maso y’abo twigana.”

Ubwo ako kanya nyina arinjira na we yicara mu ruganiriro maze Migambi asubiza umukobwa we ati: “Erega ntabwo dupfa ubusa ibi byose bituruka ku mafuti ya nyoko.” Mukarwego we yakurikiranaga ikiganiro yinumiye. Kankindi asubiza se ati: “Umva dawe, ibyo ushaka ko mama akora, ntiyabishobora wenyine. icyakemura ibibazo biri muri uru rugo ni uko mwamenya ibijyanye n’uburinganire n’ubwuzuzanye mu muryango”. Se amusamira hejuru ati: “Ibyo se kandi uzanye wabikuye he? Bishatse kuvuga iki?”

Karangwa wari wateze amatwi yumiwe, asaba ijambo ngo agire icyo abivugaho. Aravuga ati: “Iyo bavuze kuringanira, ntabwo baba bashaka kuvuga kureshya, cyangwa kugira imbaraga z’umubiri zingana. Nta n’ubwo baba bashaka kuvuga kunganya amafaranga cyangwa imitungo ndetse si n’umubare w’amashuri abantu bize. Iyo bavuze uburinganire n’ubwuzuzanye, baba bavuze gufashanya, kunganirana no kugira uburenganzira bungana imbere y’amategeko. Abagore n’abagabo bakagira uburenganzira bumwe, bagafatwa kimwe, ntihabeho kubuzwa ibintu ibi n’ibi kubera ko umwe ari umugore cyangwa ari umugabo.” Migambi aramusubiza ati: “Ese ibyo bihuriye he n’ibiri iwange aha, aho umugore wange nishakiye ansuzugura, ntakore ibyo mba namutegetse, bigatuma duhora mu nduru?”

Kankindi na we amubwira ko igisubizo k’icyo kibazo kiri mu bwuzuzanye. Niko gutangira agira ati: “Mu by’ukuri, umugabo n’umugore baremewe kuzuzanya, ari na cyo gituma batandukanye. Ni ngombwa ko umugabo ashakana n’umugore. Mu rugo barunganirana mu gutekereza icyateza imbere umuryango. Umugabo n’umugore bagafatanyaga imirimo bakaba magirirane. Umwe yita ku wundi, akamurengera, akanamurinda. Ni inshingano baba bariyemeje igihe basezeranaga. Ubufatanye bwabo n’ubwumvikane ni byo bituma batera imbere. Iyo bitabaye ibyo, urugo rusubira inyuma, rugahora mu nduru, rugakena.

Ikindi kandi, ibi by’uburinganire n’ubwuzuzanye si mu Rwanda biri gusa. Ni imyumvire mpuzamahanga, biri ku isi hose. None se dawe, ntuzi ukuntu kera mugifatanyaga twari tumaze gutera imbere, none nkaba ntangiye no kubura amafaranga y’ishuri? Rya shyamba ryo kwa Kalimunda mwashakaga kugura ntiryabaciye mu myanya y’intoki? Karamuka n’umugore we babitsaga muri banki, ntibatseyo inguzanyo bakaryegukana? Naho wowe ayo ubonye uyatsinda mu kabari n’aho utahiye, ukaza urwana nta no kudufasha akarimo na kamwe. Ubwo urabona ari uko bikwiye gukomeza koko dawe?”

Amagambo ya Kankindi yibukije Migambi ibintu byinshi. Nuko yifata mu gahanga, azunguza umutwe. Niko kugira ati: “Bana ba, ibyo muvuze byose ndabyumvise kandi ni ukuri. Kuva ubu ngiye guhinduka, nongere mere nka kera, niteze imbere,

mfatanye na Mukarwego wange.” Akimara kuvuga ibyo, akanyamuneza kaza mu maso ya Mukarwego. Niko kureba umugabo we ati: “Ibyo uvuze ni ukuri cyangwa uragira ngo unezeze aba bana bawe gusa, ejo uzabe wasubiye ku kawe?” Migambi arahaguruka ati: “Reka wenda mbivuge mpagaze ndetse ngusabe imbabazi. Mbivugiye aha sinzongera kugukubita no kugutererana mu mirimo yose. Ikindi kandi nzabwira na bagenzi bange bahinduke bamere nkange”.

Nuko Mukarwego n’ibyishimo byinshi ahobera umugabo we. Kankindi na Karangwa na bo babibonye bakoma mu mashyi. Kankindi ibyishimo bimurenga amarira ashoka mu maso.

II.1.2 Gusobanura amagambo

Shaka mu mwandiko amagambo udasobanukiwe maze uyasobanure wifashishije inkoranya.

II.1.3 Kumva no gusesengura umwandiko

Subiza ibibazo bikurikira:

1. Vuga impamvu y’ingenzi yatumaga Migambi atera amahane, akarwana ageze mu rugo rwe.
2. Ni iki cyateraga Mukarwego kutubahiriza ibyo Migambi yifuzaga byose?
3. Sobanura akamaro k’umuco wo kuzigama n’ingaruka zo kutazigama zivugwa mu mwandiko.
4. Tanga ingingo z’ingenzi zigaragara mu mwandiko.
5. Ni ibihe bikorwa bibangamiye uburinganire n’ubwuzuzanye mu muryango nyarwanda? Hakorwa iki kugira ngo izo mbogamizi zicike burundu?
6. Wakemura ute ibibazo by’amakimbirane mu muryango nyarwanda biterwa no kutubahiriza ihame ry’uburinganire n’ubwuzuzanye?



Imyitozo

Ongera usome umwandiko maze ukore imyitozo ikurikira:

1. Huza amagambo yakoreshejwe mu mwandiko ari mu ruhushya A n'ibisobanuro byayo biri mu ruhushya B.

A	B
1. Uburinganire	a) Intonganya z'urudaca, zihoraho
2. Ubwuzuzanye	b) Kudafasha uwo wagombaga gufasha
3. Kutizigamira	c) Kuba ku murongo umwe, kudasumbana, kuba ku rugero ruciririkanyije, ruhagije
4. Gusubira ku kawo	d) Kugushyira hamwe, ugushyigikirana ukunganirana
5. Guhora mu nduru	e) Kutagira amafaranga ushyira muri banki cyangwa ikigo k'imari iciriritse.
6. Gutererana	f) Kugaruka ku byo wari usanzwe ukora

2. Ni uruhe ruhare rw'uburinganire n'ubwuzuzanye mu iterambere ry'umuryango n'iry'igihugu muri rusange?

II. 2. Ihinamwandiko



Igikorwa

Uhereye kubumenyi ufite sobanura inshoza y'ihinamwandiko, usobanure uburyo rikorwa, amabwiriza arigenga n'akamaro karyo.

II.2.1. Inshoza y'ihinamwandiko

Ihinamwandiko ni igikorwa cyo kuvuga mu magambo make igitekerezo cyangwa ingingo ziboneka mu mwandiko wasomye ariko wibanda ku z'ingenzi.

Ihinamwandiko kandi ni uburyo bwo gukora mu nyandiko inshamake y'umwandiko wasomwe uhereye ku ngingo z'ingenzi ziwugize.

II.2.2. Uburyo bwo gukora ihinamwandiko

Hari uburyo bubiri bukoreshwa mu guhina umwandiko:

1. **Ihina ry'igika ku gika:** ni uburyo bwo gufata igitekerezo kiri muri buri gika ukakivuga mu mirongo mike ishoboka, ukurikije uko ibika bikurikirana kuva ku ntangiriro kugera ku musozo.
2. **Ihina rusange:** ni uburyo bwo gufata igitekerezo nyamukuru kivugwa mu mwandiko, ukakivuga uhereye ku ngingo z'ingenzi zigishamikiyeho mu magambo makeya.

II.2.3. Amabwiriza y'ihinamwandiko

Uhina umwandiko agomba kubahiriza ingingo zikurikira:

- Kumva neza insanganyamatsiko iri mu mwandiko;
- Kuvuga ku bitekerezo biri mu mwandiko nta bindi yongeramo avanye hanze yawo;
- Kumvikanisha igitekerezo muri make;
- Kutandukura ibiri mu mwandiko uko byakabaye;
- Gukoresha imvugo yabugenewe yirinda imvugo nyandagazi;
- Gukoresha imvugo yoroheje yumvwa na buri wese.

II.2.4. Akamaro k'ihinamwandiko

Ihinamwandiko rikorwa kubera impamvu zikurikira:

- Gusuzuma niba umuntu yumvise insanganyamatsiko ikubiye mu mwandiko.
- Kumenyereza umuntu kuvuga mu nshamake ibitekerezo bikubiye mu mwandiko mu magambo ye kandi atarondogoye.
- Gutoza umuntu umuco wo kurobanura iby'ingenzi mu byo yumvise cyangwa yasomye akabivuga arasa ku ntego.



Imyitozo

Subiza ibibazo bikurikira:

1. Uhereye ku byo umaze kwiga mu ihinamwandiko, urabona ari ryari ushobora gukenera gukora inshamake?
2. *Vuga muri make umwandiko “Umuryango wa Migambi”, uhereye ku ngingo zawo z'ingenzi.*



Umukoro

Ongera usome umwandiko *“Ihinduka rya Migambi”*, maze ukurikije uburyo bwo gukora ihinamwandiko n’amabwiriza abigenga, uwuhine mu mirongo itarenze cumi n’itanu.

II. 3 Amabwiriza y’imyandikire y’ikinyarwanda: Imyandikire y’amazina bwite, imikoreshereze y’utwatuzo n’inyuguti nkuru



Igikorwa

Itegereze interuro zikurikira, ugire icyo uvuga ku myandikire y’amazina bwite, n’imikoreshereze y’utwatuzo n’inyuguti nkuru.

- Kankindi na Karangwa basobanuriye Migambi ihame ry’uburinganire n’ubwuzuzanye.
- Kankindi ati: “Mu by’ukuri, umugabo n’umugore baremewe kuzuzanya.”
- Banki Nkuru y’Igihugu ni yo igenga andi banki n’ibigo by’imari.
- Umugabo Migambi yari atuye mu Kagari ka Rutare.
- Perezida Bayideni (Biden) aba i Washingtoni (Washington).

II. 3.1 Amazina bwite

1. Amazina bwite y’ahantu afite indomo

Amazina bwite y’ibihugu n’ay’aturere afite indomo, yandikwa atandukanye n’iyo ndomo; iyo ndomo ikandikwa mu nyuguti nto keretse iyo itangira interuro.

Ingero:

- **A** Marangara n’i Gisaka ni tumwe mu turere twa kera tuvugwa mu mateka y’u Rwanda.
- **U** Rwanda rurigenga.
- **U** Mutara wera ibigori, ibitoki n’ibishyimbo.
- **U** Bubirigi buri mu majyaruguru y’uburasirazuba bw’u Bufaransa.

2. Amazina bwite y’abantu arenze rimwe

Amazina bwite y’abantu arenze rimwe akurikirana muri ubu buryo: habanza izina yahawe akivuka, hagakurikiraho andi mazina y’inyongera.

Ingero:

- UWASE Ikuzo Laurette
- VUBI Pierre
- KARIMA Biraboneye
- MUNEZERO Salima

3. Amazina bwite y’abantu n’ahantu y’amavamahanga

Amazina bwite y’abantu n’ahantu y’amavamahanga atari ay’idini n’amazina bwite y’ibihugu n’ay’aturere y’amahanga yandikwa uko avugwa mu Kinyarwanda, nyuma bagashyira mu dukubo uko asanzwe yandikwa mu rurimi akomokamo.

Ingero:

- **Enshiteni** (Einstein)
- **Kameruni** (Cameroun Cameroon)
- **Shumakeri** (Schumacher)
- **Wagadugu** (Ouagadougou)
- **Ferepo** (Fraipont)
- **Ositaraliya** (Australie / Australia)
- **Cadi** (Tchad)

4. Amazina y’idini

Amazina y’idini yandikwa nk’uko yanditswe mu gitabo k’irangamimerere akaza akurikira izina umuntu yahawe akivuka cyangwa izina rindi rifatwa nka ryo. Izina rya mbere ryandikwa mu nyuguti nkuru naho izina ry’idini rikandikwa mu nyuguti ntoya, ritangijwe inyuguti nkuru.

Ingero:

- KARERA **John**
- KEZA **Jane**
- KAMARIZA **Jeanne**
- RUTERANA **Abdul**
- MFIZI **Yohana**

5. Amazina bwite yari asanzweho

Amazina bwite yatanze kandi yakoreshejwe mbere y’aya mabwiriza akomeza kwandikwa uko yari asanzwe yandikwa.

Ingero:

- Intara y’Amajyepfo

- Umujyi wa Kigali
- Akarere ka Rulindo
- Akagari ka Cyimana
- Umurenge wa Cyeru

II. 3 2. Imikoreshereze y'utwatuzo

1. Akabago/akadomo (.)

Akabago cyangwa akadomo gasoza interuro ihamya ndetse n'interuro iri mu ntegeko/itegeka.

Ingero:

- Migambi yabanaga n'umugore we Mukarwego.
- Kankindi yigaga mu mwaka wa kane w'amashuri yisumbuye.

2. Akabazo (?)

Akabazo gasoza interuro ibaza.

Ingero:

- Ibi bizakomeza gutya kugeza ryari?
- Ese abashakanye bagomba gufatanya imirimo?

3. Agatangaro (!)

Agatangaro gasoza interuro itangara. Agatangaro gashyirwa kandi inyuma y'amarangamutima.

Ingero:

- Mbega ukuntu Mukarwego yari yaragowe!
- Kankindi yakemuye amakimbirane neza pe!
- Yooo! Mbega byiza!
- Nawe ngo uri za makobwa!

4. Akitso (,)

Akitso gakoreshwa mu nteruro kugira ngo baruhuke akanya gato. Gakoreshwa kandi barondora

Ingero:

- Umunyeshuri ushaka kujijuka, yirinda gusiba, ntakubagane mu ishuri kandi agakurikiza inama z' umwarimu.
- Abagiye inama, Imana irabasanga.

- Mukarwego yakoraga imirimo yose yo mu rugo: gukubura, guhinga, kwahirira amatungo, guteka, kuhagira abana n’ibindi.

5. Uturegeka (...)

Uturegeka dukoreshwa iyo berekana ironдора ritarangiye. Dukoreshwa kandi mu nteruro barogoye cyangwa iyo mu nteruro hari ijambo bacikije.

Ingero:

- Mu rugo rwa Kinyarwanda habaga ibikoresho byinshi: ibibindi, ibyansi, ishoka, ibitebo, isekuru...
- Baragenda ngo bagere ku Ruyenzi bahahirira na mwene... simuvuze nzamuvumba!
- Nyamara mu menyeko uwanze kumvira ... Mwacecetse ariko.

6. Utubago tubiri (:)

Utubago tubiri dukoreshwa mu nteruro iyo hari ibigiye kurondorwa cyangwa gusobanurwa. Dukoreshwa kandi inyuma y’ingirwanshinga “-ti”, “-tya” n’ijambo “ngo” iyo bagiye gusubira mu magambo y’undi uko yakabaye.

Ingero:

- Mukarwego yakoraga imirimo yose yo mu rugo: gukubura, guhinga, kwahirira amatungo, guteka, kuhagira abana n’ibindi.
- Kankindi asubiza se ati: “Umva dawo, ibyo ushaka ko mama akora, ntiyabishobora wenyine.”
- Kankindi arakomeza ngo: “Icyakemura ibibazo biri muri uru rugo ni uko mwamenya ibijyanye n’uburinganire n’ubwuzuzanye mu muryango.”
- Inka yabira itya: “Mbaaa”.

7. Akabago n’akitso (;)

Akabago n’akitso dukoreshwa mu nteruro kugira ngo batandukanye inyangingo ebyiri ziremye kimwe kandi zuzuzanya.

Urugero:

- Gusoma neza si ugusukiranya amagambo; gusoma neza ni no kumva ibyo usoma.
- Migambi yirirwaga mu kabari; yatahaga nijoro.
- Kuba umugabo si ukunywa inzoga; kuba umugabo ni ukwita ku rugo rwawe.

8. Utwuguruzo n’utwugarizo (“ ”/« »)

Utwuguruzo n’utwugarizo dukikiza amagambo y’undi asubirwamo uko yakabaye, ashobora kuba ateruwe n’ingirwanshinga “-ti”, “-tya” n’ijambo “ngo”.

Utwuguruzo n'utwugarizo dukikiza imvugo itandukanye n'imvugo isanzwe, cyangwa ingingo igomba kwitabwaho.

Dukikiza inyito ikemangwa, amazina nteruro n'amazina y'inyunge agizwe n'amagambo arenze ane.

Dukikiza kandi amagambo y'amatirano atamenyerewe mu Kinyarwanda.

Ingero:

- Karangwa yunganira Kankindi ati: « Iyo bavuze kuringanira ntibaba bavuze kureshya; baba bavuze gufashanya no kugira uburenganzira bungana imbere y'amategeko. »
- Nuko ya “nyamaswa” iravumbuka maze havamo umusore mwiza.
- Ubwo “Inshyikanya ku mubiri ya rugema ahica” aba arahashinze.
- Ibyo nabisomye kuri “interineti”.
- “Izi mpaka numva ari urujeje

Nkaho mbyaye ijana ry'abantu

Aho ntizishaka kunjisha

Ngo zinjandike mu matiku

Umutima uteshwe icyo nawutoje.”

Ijoro ry'urujijo, Rugamba Sipiriyani.

9. Akuguruzo n'akugarizo kamwekamwe (')

Akuguruzo n'akugarizo kamwekamwe gakoreshwa iyo utwuguruzo n'utwugarizo twinjira mu tundi mu nteruro.

Urugero:

Umugaba w'ingabo ati: “Ndashaka ko 'Inshyikanya ku mubiri ya rugema ahica' aza hano”.

10. Udukubo ()

Udukubo dukikiza amagambo cyangwa ibimenyetso bifite icyo bisobanura cyangwa icyo byuzuzwa mu nteruro. Banadukoresha iyo bashaka kwerekana uko amazina bwite y'amanyamahanga yanditswe mu Kinyarwanda bayandika mu ndimi akomokamo. Dukikiza kandi umubare wanditse mu mibarwa mu nteruro iyo uwo mubare wabanje kwandikwa mu nyuguti.

Ingero:

- Umuyobozi w'Akarere yabwiye abaturage ko kugira ngo barwanye inzara, bagomba gushoka ibishanga (impeshyi yari yabaye ndende) kandi kwirirwa banywa bakabifasha hasi.
- Bisimariki (Bismarck)
- Koreya (Korea)
- Kamboje (Cambodge)
- Igihembo twumvikanyeho ni amafaranga y'amanyarwanda ibihumbi magana atanu (500 000 Frw).

11. Akanyerezo (-)

Akanyerezo gakoreshwa mu kiganiro kugira ngo berekane ihererekanywa cyangwa iyakuranwa ry'amagambo.

Urugero:

- Wari waragiye he?
- Kwa Migabo.

Akanyerezo gakoreshwa kandi bakata ijambo ritarangiranye n'impera y'umurongo, bikurikije imiterere y'umugemo.

Urugero:

- Semarinyota yansabye ko **tuzajya-na** i Rukoma, ariko sinzamwemerera.
- Kanakoreshwa imbere n'inyuma y'interuro ihagitse.

Urugero:

Ejo nzajya mu misa - sinzi niba wari uzi ko nsigaye njyayo - ntuzantegereze mbere ya saa sita.

12. Udusodeko ([])

Udusodeko dukikiza intekerezo cyangwa igisobanuro bongeye mu mvugo isubira mu magambo y'undi.

Urugero:

Yaravuze ati: "Sinshobora kurara ntariye inkoko [ayo yari amirariro], keretse narwaye".

Dukoreshwa kandi berekana ibyo banenga mu magambo y'undi.

Urugero:

Yaranditse ati: “Ikinyarwanda ni ururimi ruvugwa n’abatu [ikosa] benshi muri Afurika yo hagati”.

Tunakoreshwa mu magambo y’undi mu kugaragaraza ko hari ayavanywemo cyangwa yasimbutse.

Urugero:

Aravuga ati: “Nimureke abana bansange [...] ntimubabuze”.

13. Agakoni kaberamyeye (I)

Agakoni kaberamyeye gakoreshwa mu kwandika amatariki, inomeru z’amategeko. Gashobora kandi gukoreshwamu mwanya w’ijambo cyangwa.

Ingero:

- Kigali, ku wa 15/10/2012.
- Itegeko N° 01/2010 ryo ku wa 29/01/2010.
- Koresha yego/ oya mu gusubiza ibibazo bikurikira.

II. 3. 3 Imikoreshereze y’inyuguti nkuru

Inyuguti nkuru zikoreshwa aha hakurikira:

1. Ku nyuguti itangira interuro.

Urugero:

Ifuni ibagara ubucuti ni akarenge.

2. Nyuma y’akabago, akabazo n’agatangaro.

Ingero:

- Twese duhagurukire kujijuka. **W**abigeraho ute utazi gusoma? **N**tibishoboka.
- Ntoye isaro ryiza shenge wee! **R**eka nge kuryereka nyogokuru.

3. Nyuma y’ingirwanshinga “-ti”, “-tya”, n’ijambo “ngo” batangira amagambo y’undi asubiwemo uko yakabaye. Ariko inyuguti nkuru ntitangira amagambo asubirwamo iyo uwandika yayatangiriye hagati mu nteruro yakuwemo.

Ingero:

- Kankindi aravuga ati: “**M**u by’ukuri, umugabo n’umugore baremewe kuzuzanya.”
- Igihe Kankindi yavugaga ati: “umugabo n’umugore baremewe kuzuzanya”, Migambi yarararakaye.

4. Ku nyuguti itangira imibare iranga iminsi, amazina y'amezi n'ay'ibihe by'umwaka.

Ingero:

- Ku wa **Gatanu**, ku wa **Gatandatu**.
- **Ugushyingo** gushyira **Ukuboza**
- Mu Rwanda haba ibihe bine by'ingenzi: **Urugaryi**, **Itumba**, **Iki (Impeshyi)** n'**Umuhindo**.

5. Ku nyuguti itangira amazina bwite y'abantu, ay'inzuzi n'ay'ahantu, kabone nubwo indomo itangira izina ry'ahantu yaba yatakaye.

Ingero:

- **Rutayisire** atuye i **Huye** hafi ya **Cyarwa**.
- Mu **Mutara** hera ibigori.
- I **Washingtoni** (Washington) ni ho hari ikicaro cya Banki y'Isi.
- Uwitwa **Enshiteni** (Einstein) yari umuhanga cyane.

6. Ku nyuguti itangira amazina y'imirimo, ay'inzeho z'imirimo n'ay'amashyirahamwe.

Ingero:

- **Minisiteri y'Ubuhanzi** n'**Ubworozi**;
- **Umuryango w'Abibumbye**;
- **Koperative Dufatanye**;
- Banki Nkuru y'Igihugu yakoze inoti nshya ya magana atanu;
- **Umunyamabanga Nshingwabikorwa w'Akarere**.

7. Ku nyuguti itangira amazina y'impamyabushobozi, ay'icyubahiro, ay'inzeho z'ubutegetsi, ay'ubwengehugu n'amoko, ay'indimi, ku mazina y'ibikorwa byamamaye mu mateka no ku nyuguti itangira ijambo "Igihugu" iyo rivuga u Rwanda.

Ingero:

- **Dogiteri Karimanzira**
- **Nyakubahwa Perezida** wa Repubulika
- **Umurenge** wa Nyarugenge
- **Abanyarwanda barimo Abasinga** n'**Abagesera**
- **Dukwiye guteza imbere Ikinyarwanda**.
- Mu **Ntambara** ya **Kabiri y'Isi Yose** hapfuye abantu benshi.
- **Bwana Umunyamabanga Nshingwabikora w'Umurenge** wa Busasamana.

8. Ku nyuguti itangira umutwe w'inyandiko, igitabo cyangwa ikinyamakuru.

Ingero:

- Nujya mu mugi unguhire **Imvaho Nshya**.
- Musenyeri Kagame Alegisi ni we wanditse **Indyoheshabirayi**.

9. Izina bwite ry'umuryango cyangwa irindi rifatwa nka ryo riri ku ntangiriro no ku mpera y'inyandiko (nk'ibaruwa, nk'itegeko, nk'inyandiko mvugo, nk'umwirondoro, nka raporo...) no mu rutonde rw'amazina y'abantu, ryandikwa ryose mu nyuguti nkuru. Nyamara rikandikwa mu nyuguti nto uretse inyuguti iritangira yandikishwa inyuguti nkuru mu mwandiko.

Ingero:

- **GAHIRE** Rose
- **UMURISA** Keza
- **BUTERA** Simoni
- Nagiye kwa **Gahire** Rose anyakira neza.
- Rutayisire atuye i Huye hafi ya Cyarwa.



Imyitozo

Subiza neza ibibazo bikurikira:

1. Amazina bwite y'ahantu afite indomo yandikwa ate? Tanga ingero eshatu.

2. Shyira utwatuzo dukwiye mu nteruro zikurikira:

- a) Yagiye ku isoko agura amashu ibirayi ibishyimbo n'ibitoki
- b) Twatanze amafaranga igihumbi na magana abiri 1200

3. Kosora interuro zikurikira:

- a) Yababwiye ati, nzarya duke ndyame kare!
- b) Yageze muri Cameroni,
- c) Umubarankuru yavaga inda imwe nabahungu batatu
- d) Abana babahungu nabo bari barakurikije se ntibafashe mushiki wa bo.
- e) Mbega ukuntu cyuzuzo yahiye agakongoka.

4. Ni ryari izina bwite ry'umuryango ryandikwa n'inyuguti nto uretse inyuguti iritangira? Tanga urugero.

II. 4 Isuzuma risoza umutwe wa kabiri

Soma umwandiko ukurikira usubize ibibazo byawubajijweho.

Akanyoni katagurutse ntikamenya iyo bweze

Mu mpera z'icyumweru gishize, iwacu haje abantu batari basanzwe bahagenda maze ngira amatsiko yo kumenya ikibagenza mu rugo rwacu. Ndabegera, ndabasuhuza, mbabaza ikibagenza. Bambwira ko bashaka ababyeyi bange, ko bifuzaga kuganira na bo uburyo bagaze ku iterambere.

Narabakiriye mbereka aho bicara mu ruganiriro, mpamagara ababyeyi, barasuhuzanya, baranibwirana. Umushyitsi w'umugabo ati: "Nge nitwa Mutake naho uyu turi kumwe ni umugore wange, yitwa Mugeni." Data ababwira ko yitwa Majyambere, mama na we ababwira ko yitwa Munezero.

Bamaze kwibwirana, Mutake yateruye ikiganiro avuga ikibagenza. Ati: "Tumaze igihe twumva abantu benshi bavugaga ko urugo rwanyu rwiteje imbere. Ngo mwanahinduye imibereho yanyu n'iy'imiryango muturanye, mugira n'uruhare rukomeye mu iterambere ry'akarere kanyu. Ni byo kandi koko n'ugeze aha amaso aramwihera." Umugore we na we yungamo ati: "Ni byo pe! Ntubeshya mugabo wange. Aka gace twagezemo, biragaragara ko kateye imbere rwose! Tuje kubagisha inama kugira ngo natwe tubigireho."

Data amaze kumva ikibagenza mu rugo rwacu, arahaguruka aya kubereka ibikorwa umuryango wacu wazagezeho. Data abereka urutoki rwacu rwa kijyambere, ikawa, ibiraro by'inka za kijyambere n'ikimoteri kinini kijyamo imyanda yose yo mu rugo. Mama yagize ati: "Ibi tubikesha ubwumvikane dufitanye kuko dutahiriza umugozi umwe, tukajya inama, tukungurana ibitekerezo, tugafatanyaga imirimo yose, tukiha intego n'imihigo tugenderaho ndetse tugakurikiza inama abayobozi batugira kandi umwe akabera undi imboni. Muri make urugo rwacu rurangwa n'uburinganire n'ubwuzuzanye."

Data akomeza ikiganiro agira ati: "Muzi ko Leta yacu idahwema kudushishikariza gukora cyane, gukorera mu mashyirahamwe no gukorana n'amabanki. Tugenda dukora imishinga tukayimurikira amabanki cyangwa ibigo by'imari iciriritse, tukaza inguzanyo, bityo tugakora ibikorwa byacu. Ikindi, amafaranga tubonye yose, yaba make cyangwa menshi, tuyakoresha ibidufitiye inyungu, andi tukayabitsa muri banki, kugira ngo twirinde kwaya."

Umugore wa Mutake akimara kumva ibyo, arahindukira areba umugabo we, aramubwira ati: "Ntiwumva abandi icyo baturusha? Na ho wowe utwo ubonye twose utujyana mu kabari, ukagaruka ubyina, nyamara bugacya wicira isazi mu jisho. Ntiwemera ko tujya inama, ahubwo iyo utagiye mu kabari nta karimo na kamwe udufasha." Data yumvise amagambo y'uwo mugore yuje agahinda, abwira

Mutake ko akabari gasenya katubaka, cyanecyane iyo ukagiyemo utakemuye ibibazo byose byo mu rugo kandi ko iyo nta bufatanye, nta kujya inama mu rugo, nta terambere rishobora kuhaba.

Mutake yumvaga ibyo ateze amatwi, asa n'uwibaza cyane. Nibwo asabye ijamba bararimuha, araterura ati: "Nimundeke numvise. Ni byo koko ubwenge buza ubujiji buhise. Kuva ubu sinzasubira mu kabari, ngiye gukora ntikoresheje, nirinde inshuti z'akabari zisenya. Sinzongera gusuzugura inama z'umugore wange. Uwagira inshuti yagira nkamwe. Munyunguye inama yo gukorana na banki. Ndava aha njya gufunguza konti, nzage mbitsa amafaranga make nzajya mbona aho kuyajyana mu kabari."

Mutake n'umugore we Mugeni badusezeraho barataha, natwe dusigara tunejejwe n'uko abantu basigaye baza kutwigiraho.

I. Ibibazo byo kumva no gusesengura umwandiko

1. Uru rugendo abashyitsi bakoreye kwa Majyambere, rwari rugamije iki? Rwaba rwarabagiriye akamaro? Sobanura.
2. Urugo rwa Majyambere rurangwa n'ubufatanye hagati y'umugabo n'umugore. Mbese aho wiga ubona hari ubufatanye hagati y'abakobwa n'abahungu mu ishuri? Sobanura.
3. Gukora imirimo yose ku bagore n'abagabo byakwihutisha bite iterambere ry'Igihugu?
4. Nyuma yo kwiga ibijyanye n'uburinganire n'ubwuzuzanye mu muryango, ni uwuhe musanzu watanga mu kwimakaza ihame ryabwo?

II. Inyunguramagambo

1. Simbuza amagambo atsindagiye ari muri izi nteruro andi bihuje inyito yakoreshejwe mu mwandiko ukora isanisha riboneye.
 - a) Urugo rutarimo ubwumvikane hagati y'umugabo n'umugore **rupfusha ubusa** umutungo warwo.
 - b) Buri rugo rukwiye kugira **aho rushyira imyanda** mu rwego rwo kurengera ibidukikije.
2. Kora interuro ziboneye ukoresheje amagambo akurikira:
 - a) Umutungo
 - b) Igihombo
 - c) Gutahiriza umugozi umwe

III. Ibibazo ku myandikire y'Ikinyarwanda

Kosora igika gikurikira, wubahiriza imyandikire yemewe y'Ikinyarwanda.

Umubyeyi KANAKUZE akimara gutangiza ishuri umwana we UWASE SHIMWA yibwiragako atazongera kuvunika aha uburezi n'uburere umwana we ahubwo ko bizajya bikorwa n'umwarimu kw'ishuri. Uwo mubyeyi yitaga cyanecyane ku gushaka aho akura amafaranga yo kugura ibikoresho n'imyambaro by'ishuri n'ayo kumwishyurira ishuri. ukwiye kwirengagiza inshingano afite ku mwana. Ababyeyi bafite inshingano zo gutoza abana ba bo imico itandukanye irimo kubaha abakuru n'abato, kugira isuku y'umubiri n'iyaho baba. Kankuze akimara kumva impanuro bahawe yarumiwe maze ati mbega ukuntu narangaye. Uburezi n'uburere ni inshingano za buri wese pe.

Kuva ubu ngiye kujya nita ku burezi n'uburere bw'umwana wange kugirango nawe azavemo umwana ubereye igihugu.

Ubushobozi bw'ingenzi bugamijwe

- Gusesengura umwandiko uvuga ku burezi n'uburere hagaragazwa ingingo z'ingenzi ziwugize.
- Gusesengura amazina mbonera n'amazina y'amatirano.
- Gutegura ikiganiro mpaka no kujya impaka n'abandi mu bwubahane.
- Kwandika yubahiriza amabwiriza y'imyandikire y'Ikinyarwanda.
- Gukoresha mu nteruro impuzanyito, imbusane, imvugwakimwe, ingwizanyito n'impuzashusho.



Igikorwa cy'umwinjizo

1. Ushingiye ku bumenyi ufite:
 - Tandukanya uburezi n'uburere maze usobanure uko byuzuzanya mu kurema umuntu nyamuntu.
 - Tandukanya amazina gakondo n'amazina y'amatirano.
2. Ururimi urwo ari rwo rwose rwandikwa rugira amabwiriza agenga imyandikire yarwo. Sobanura muri make ingingo zitabwaho mu myandikire y'Ikinyarwanda.

III.1. Gusoma no gusesengura umwandiko: Kabayiza mu ihuriro



Igikorwa 3.1

Soma umwandiko ukurikira, ushakemo amagambo udasobanukiwe hanyuma uyasobanure wifashishije inkoranya cyangwa inyito afite mu mwandiko kandi usubize n'ibibazo byawubajijweho.

III.1.1. Gusoma umwandiko

Soma umwandiko ukurikira:

Kabayiza mu ihuriro



Mu mudugudu wa Gahinga hari ingimbi n'abangavu biga mu bigo by'amashuri binyuranye. Mu kiruhuko, mu masaha ya nimugoroba barahuraga bakungurana ibitekerezo ku nsanganyamatsiko zinyuranye. Kabayiza, umwe mu ngimbi zari zituye muri uwo mudugudu ntiyagiraga amahirwe yo kujya mu ihuriro nka bagenzi be kuko ababyeyi be bamubwiraga ko yaba agiye gucumba urugomo. Yahoraga abinginga ngo na we agende, bakamutsembera, ibyo bikamubabaza cyane.

Igihe kimwe, yinginze ababyeyi ngo aiyane na bagenzi be mu ihuriro, baramwemerera ariko bamusaba ko navayo ababwira ibyo yungukiyemo. Nuko agenda yishimye. Ageze mu ihuriro, bamwakirana urugwiro. Ntibyatizze umusangiza w'amagambo yakira umusaza Kanyamibwa bari batumiye ngo abaganirize ku nsanganyamatsiko y'uwo muni ari yo "Uburezi n'uburere mu Rwanda rwo hambere". Yasabye buri wese gukurikira atuje kandi yandika ikibazo yifuzaga kuza kubaza nyuma y'ikiganiro.

Kanyamibwa yatangiye agira ati: "Mu Rwanda rwo hambere Abanyarwanda bari bafite irerero gakondo ari ryo torero. Iryo torero ryatangirwagamo uburezi n'uburere ku ngimbi zaturutse hirya no hino mu Gihugu. Batozwaga ibijyanye n'umuco nyarwanda. Byagiriraga akamaro buri wese ku giti cyabo ndetse n'umuryango nyarwanda muri rusange. Uwavaga mu itorero yabaga afite indangagaciro nyarwanda nko gukunda Igihugu, gukunda umurimo, ubumuntu, ubunyarwanda

n'ibindi". Kanyamibwa yakomeje ababwira bimwe na bimwe mu byigirwaga mutorero.

Icyamba mbere bigiragamo ni ukwimakaza umuco w'imibanire myiza bakabana nk'abavandimwe badahemukirana. Yabasobanuriye ko intore yimakazaga umuco w'amahoro iharanira kubana neza n'abandi. Intore wasangaga ari inshuti zikomeye, zishyize hamwe ku buryo na nyuma y'ubuzima bwo mu itorero ubucuti bwakomezaga bitewe n'inyigisho bahabwaga zatumaga bumva ko ari abavandimwe. Mu itorero kandi nta vangura ryarangwagamo. Mu kubigisha iyi ndangagaciro y'imibanire myiza barashotoranaga mu biganiriro kugira ngo barebe uko uwo bashotoye yifata. Iyo byamurakazaga baramusekaga kugeza igihe abicitseho. Iyi nyigisho yatumaga abitabiriye itorero hagati yabo ubwabo babana mu mahoro.

Icyamba kabiri bigishwaga kiza ni ugukunda Igihugu. Batozwaga ibyivugo bigizwe n'ibigwi n'ibirindiro by'intwari za kera z'ibirangirire. Babifataga mu mutwe kugira ngo babashe guhimba ibyabo ndetse bizatume na bo bagira ubwo butwari. Ibyo byatumaga bavamo intwari z'Igihugu mu buryo butandukanye. Urugero ni nk'abatabazi n'abacengeri bemeraga gupfira Igihugu ku bushake kugira ngo kibone umutsindo. Ibi byagaragazaga urukundo rukomeye rwo kwitangira Igihugu. Ni na ho havuye umugani uvuga ngo "Wima amaraso Igihugu, imbwa zikayanywera ubusa".

Icyamba gatatu kandi intore zigiraga mu itorero ni amateka y'Igihugu n'Ikinyarwanda nk'ururimi n'umuco. Zigaga uko umuntu yifata n'uko avuga imbere y'abamuruta n'abo aruta ndetse n'imbere y'umwanzu kugira ngo amwime ikico. Intore zatozwaga uko zifata imbere y'abo ziyobora n'abaziyobora. Zatozwaga ubuvanganzo bunyuranye nk'ibyivugo maze mu nkera y'imihigo bakivuga ibigwi n'ibirindiro. Intore kandi zigaga kuvuga neza no kutizimba mu magambo.

Icyamba kane, mu itorero abahungu batozwaga gukoresha intwari zitandukanye n'ubuhanga bwo kurwana. Muri byo twavugaga nko gufura umuheto, kumasha, gukinga ingabo, gutera icumu, gusimbuka, gukirana, kuzibukira n'ibindi. Ibi kwari ukugira ngo igihe baba basakiranye n'umubisha bazirwaneho, ntazabafate mpiri. Bigaga kandi amategeko y'intambara. Muri yo harimo ko kwica abagore n'abana no gufata ku ngufu abagore n'abakobwa byaziraga. Ikindi kandi bamenyaga ko umugabo wafatwaga mpiri arwana batagomba kumwica, na we yazaga mu minyago nk'abagore n'abana. Uretse n'abantu, n'inyamaswa yahungiraga mu nzu cyaraziraga kuyitanga, kabone n'ubwo yaba iribwa cyangwa iryana.

Abakobwa bo ntibajyaga mu itorero ahubwo bajyaga mu rubohero ari byo twagereranya n'itorero kuri bo. Bahabwaga impanuro zirimo kwiyubaha, kubaha abandi, kuzavamo abagore babereye u Rwanda, kuzamenya kurera Igihugu no kujya inama zubaka imiryango yabo. Bahigiraga kandi imirimo itandukanye nko kuboha ibyibo, ibiseke n'imisambi, ndetse no gusengainkangara n'ibindi.

Mu nshamake, Kanyamibwa yababwiye ko itorero ryari rifite akamaro ntagereranywa mu burezi n'uburere mu Rwanda rwo hambere. Abavaga mu itorero basakazaga umuco mwiza baryigiyemo aho batuye. Nta ntore yitwaraga nabi ivuye mu itorero ahubwo wasangaga intore n'utaratojwe batandukanye cyane. Intore zabaga zifite inshingano yo kwigisha rubanda batagiye mu itorero, zibagaragariza urugero rw'umuco mwiza, ndetse zimwe zigashinga ayandi matorero ku misozi.

Kanyamibwa yashoje ikiganiro ingimbi n'abangavu bo mu mudugudu wa Gahinga bagifite amatsiko yo kumenya byinshi ku nyigisho zatangirwaga mu itorero. Ibyo byatumye bamubaza ibibazo byinshi. Kabayiza ni we wabimburiye abandi kubaza. Yabajije ibibazo byiza maze Kanyamibwa na we amusubiza abivuye imuzi. Kabayiza asobanukirwa neza ibijyanye n'uburezi n'uburere mu Rwanda rwo hambere.

Kabayiza yageze mu rugo asobanurira ababyeyi be ibyo yungukiye mu ihuriro ku nsanganyamatsiko y'uburezi n'uburere bw'ingimbi n'abangavu mu Rwanda rwo hambere. Ababyeyi be banejejwe n'izo nyigisho nziza ingimbi n'abangavu bo mu mudugudu wa Gahinga bigira mu ihuriro. Kuva ubwo, ntibongera kumubuza kuriyamo ahubwo bakajya bamuhwitura ngo adakererwa.

III.1.2. Gusobanura amagambo

Shaka mu mwandiko amagambo udasobanukiwe, uyasobanure wifashishije inkoranya cyangwa inyito afite mu mwandiko.

III.1.3. Kumva no gusesengura umwandiko

Subiza ibibazo bikurikira:

1. Rodora bimwe mu byo abahungu n'abakobwa batozwaga mu itorero no mu rubohero byavuzwe mu mwandiko.
2. Ni akahe kamaro itorero ryari rifite mu burezi n'uburere mu Rwanda rwo hambere?
3. Garagaza ingingo z'ingenzi zigize umwandiko.
4. Kuba abahungu baratanzwaga mu itorero abakobwa mu rubohero byerekanaga iki mu myumvire y'Abanyarwanda? Kuri ubu bimeze bite?
5. Utekereza ko itorero n'urubohero byagiraga uruhe ruhare mu kurema Umunyarwanda wuzuye indangagaciro z'umuco nyarwanda?
6. Gereranya itorero ryo mu gihe cyo hambere n'itorero ryo muri iki gihe.



Imyitozo

1. Koresha amagambo akurikira mu nteruro.
 - a) Kuzibukira
 - b) Umutsindo
2. Ijambo “itorero” rifite inyito zinyuranye. Rikoreshe nibura mu nteruro eshatu uriha inyito zitandukanye.
3. Wubahiriza isanisha rikwiye, uzuzura interuro zikurikira ukoresheje aya magambo: abatabazi, gufata mpiri, gufura umuheto.
 - a) Abajura bagiye kwiba mu kigo cyacu.....
 - b) Kera abahigi barasa inyamaswa
 - c) bari bafite ubwitange bukomeye mu Gihugu.
4. Utekereza ko itorero mu Rwanda rwo hambere ryagiraga uruhe ruhare mu kurema Umunyarwanda ubereye u Rwanda.

III.2 Amazina gakondo n’amazina y’amatirano



Igikorwa 3.2

Kora ubushakashatsi utahure inshoza y’amazina gakondo n’iy’amazina y’amatirano, intêgo yayo n’imvano y’amazina y’amatirano.

III.2.1. Amazina gakondo

1. Inshoza y’izina gakondo

Izina gakondo ni izina ry’umwimerere mu Kinyarwanda rivuga ridakomoka cyangwa ritatiwe mu ndimi z’amahanga.

Ingero: Igiti, umuvure, amasaka, ibishyimbo...

2. Intêgo y’izina gakondo

Amenshi mu mazina gakondo agizwe nk’uturamajambo dutatu tw’ibanze indomo, indanganteko n’igicumbi, ari na yo yitwa amazina mbonera. Ni ukuvuga ko izina gakondo atari izina ry’urusobe kandi atari izina rikomoye ku nshingira cyangwa ku

bundi bwoko bw'amagambo. Intego y'izina gakondo rero ni : indomo, indanganteko (indangazina), n'igicumbi: D+RT+C

a) Indomo (D)

Ni akaremajambo kagizwe n'inyajwi iterura izina. Indomo buri gihe isa n'inyajwi y'akaremajambo kayikurikira iyo gahari. Mu Kinyarwanda inyajwi zishobora kuba indomo ni eshatu: i, u, a.

Ingero: ikivuguto, amasaka, umuvure

b) Indanganteko/ Indangazina : RT/Rzn

Indanganteko/indangazina ni akaremajambo kerekana inteko izina ririmo. Ako karemajambo ni ko kagena uturemajambo tw'isanisha. Indanganteko zihinduka bitewe n'inteko izina ririmo.

Ingero: Abangavu batorezwaga mu rubohero.

Uburezi bufite ireme burakenewe.

Indanganteko z'amazina zigabanyije mu nteko cumi n'esheshatu. Dore urutonde rw'inteko n'indanganteko zirimo:

nt.1: mu

nt.2: ba

nt.3: mu

nt.4: mi

nt.5: ri

nt.6: ma

nt.7: ki

nt.8: bi

nt.9: n

nt.10: n

nt.11: ru

nt.12: ka

nt.13: tu

nt.14: bu

nt.15: ku

nt.16: ha

c) Igicumbi (C)

Igicumbi ni igice k'izina kidahinduka kibumbatiye inyito y'ibanze y'izina. Mu Kinyarwanda izina gakondo iryo ari ryo ryose rigira igicumbi.

Ikitonderwa:

- Amazina adafite indanganteko igaragara na yo intego yayo ni D+RT+C uretse ko RT igaragazwa n'ikimenyetso -Ø-. Iki kimenyetso gihagararira akaremajambo kabura mu turemajambo tw'ibanze.

Urugero: ishyari: i-Ø-shyari i-: Indomo -Ø-: ni indanganteko -shyari: igicumbi

- Hari amazina gakondo atagira indomo n'indanganteko. Ingero: data, nyina, mushiki, dodo, so

Mu gusesengura ayo mazina, uturemajambo tutagaragara duhagararirwa n'ikimenyetso -Ø-

Urugero: data: Ø-Ø-data

3. Amategeko y'igenamajwi akoreshwa mu izina gakondo

Imbonerahamwe ikurikira ikubiyemo amwe mu mategeko y'igenamajwi akoreshwa mu izina gakondo.

No	Amazina	intego	Amategeko y'igenamajwi
1	umwami	u-mu-ami	u→w/-J
2	abana	a-ba-ana	a→Ø/-J
3	umwuko	u-mu-uko	u→w/-J
4	lmyuko	i-mi-uko	i→y/-J
5	iryinyo	i-ri-inyo	i→y/-J
6	amenyo	a-ma-inyo	a+i→e
7	igiti	i-ki-ti	k→g/-GR
8	ibyondo	i-bi-ondo	i→y/-J
9	Imfura	i-n-pfura	n→m/-p p→Ø/m-f
9/10	Inzoga	i-n-yoga	y→z/n-
9/10	Insibo	i-n-tsibo	t→Ø/n-s

10	Inzuzi (uruzi mu bumwe)	i-n-uzi	Ibicumbi bifata z mu nteko ya 10
10	Impapuro	i-n-papuro	n→m/-p
11	urupapuro	u-ru-papuro	-
12	akana	a-ka-ana	a→ø/-J
13/14/15	utwana/ ubwanwa/ ukwaha	u-tu-ana u-bu-anwa/ u-ku-aha	u→w/-J
16	ahantu	a-ha-ntu	-

Uko ibimenyetso byakoreshejwe bisomwa:

Ingero:

u→w/-J: Bisomwa ngo **u** ihinduka **w** iyo iri imbere **y'inyajwi**.

a→ø/-J: Bisomwa ngo **a** iburizwamo iyo iri imbere **y'inyajwi**.

k→g/-GR: Bisomwa ngo **k** ihinduka **g** imbere **y'ingombajwi y'indagi**.

a+i→e: Bisomwa ngo iyo **a** ihuye na **i** bihinduka **e**

p→ø/m-f: Bisomwa ngo **p** iburizwamo iyo iri hagati ya **m** na **f**

III.2.2. Amazina y'amatirano

1. Inshoza amazina y'amatirano

Izina ry'iritirano ni izina ritari karemano muri urwo rurimi, ni izina ryavuye mu zindi ndimi z'amahanga.

Ingero:

a) Amazina yatiwe mu Gifaransa

Amashu: choux

Amakoperative: cooperative

Karoti: carotte

Inanasi: ananas

b) Amazina yatiwe mu Giswayire

Igitabo: kitabu

Indege: ndege

Akazi: kazi

Isahani: sahani

c) Amazina yatiwe mu Cyongereza

Ishati: shirt

Akabati: Cupboard

Amasogisi: socks

uburingiti: blanket

d) Amazina yatiwe mu Iringara

Umusoro (gusora): mosolo

Inkaranka(ubunyobwa): kalanka

e) Amazina yatiwe mu Ikigande

Igikaju (igisheke): ekikajo

Igikwasi: ekikwasi

Indogobe: endogoyi

Amashanyarazi: amashanyarazi

2. Imvano y'amazina y'amatirano Ingero:

Kuva kera Abanyarwanda bashyikiranaga n'abaturage b'ibihugu bidukikije, bitewe n'ubucuti ubuhake, guhaha cyangwa gushyingirana, bigatuma Ikinyarwanda kinjiza amagambo y'amatirano. Ikindi kandi, kuva mu ntangiriro y'ikinyejana cya makumyabiri, abanyaburayi batangiyeye kuza mu Rwanda bazanywe n'amadini, ubukoronu, ubucuruzi n'ubucukuzi bw'amabuye y'agaciro, ubuhinzi n'ibindi bituma zimwe mu ndimi z'i Burayi zinjiza amagambo mu Kinyarwanda.

3. Intêgo y'amazina y'amatirano

Intêgo y'amazina y'amatirano ni kimwe n'intego y'amazina gakondo (D-RT-C). Izina ry'iritirano iyo rigeze mu Kinyarwanda, rishakirwa inteko kandi rishobora no guhabwa indomo. Iyo ritahawe indomo, ntirigire n'indanganteko igaragara, utwo turemajambo duhagararirwa n'iki kimenyetso. Amazina y'amatirano akunze kuba mu nteko ya 9 akagira ubwinshi mu nteko ya 6 cyangwa iya 10.

Ingero:

- Isahani: i-ø-sahani nt.9/ amasahani: a-ma-sahani nt.6/isahani nyinshi nt.10
- Terefoni: ø-ø-terefoni nt.9/ amaterefoni: a-ma-terefoni nt.6/terefoni nyinshi nt.10
- ø-ø-tereviziyo nt.9/amatereviziyo: a-ma-tereviziyo nt.6/tereviziyo nyinshi nt.10
- Ishati: ishati nt.9/amashati: a-ma-shati nt.6/ ishati nyinshi nt.10



Imyitozo

1. Tahura amazina gakondo ari mu gika gikurikira:

Abakobwa bo ntibajyaga mu itorerero ahubwo bajyaga mu rubohero. Bahabwaga impanuro zirimo kwiyubaha, kubaha abandi, kuzavamo abagore babereye u Rwanda, kuzamenya kurerera Igihugu no kujya inama zubaka imiryango yabo. Bahigiraga imirimo itandukanye nko kuboha ibyibo, ibiseke n'imisambi, ndetse no gusenga inkangara n'ibindi.

2. Ni irihe tandukaniro riri hagati y'amazina y'amatirano n'amazina gakondo?
3. Tanga ingero z'indimi nyafurika zatije Ikinyarwanda amagambo.
4. Garagaza intêgo y'amazina mbonera gakondo akurikira ugaragaze n'amategeko y'igenamajwi:
 - a) Amenyo
 - b) Umuhungu
 - c) Inzembe
 - d) Imfuruka
 - e) Umweyo
 - f) Inzuzi (uruyuzi)
 - g) Ibyashara
 - h) icyashara
 - i) Agaterefoni
 - j) Umwarimu

III. 3 Ibiganiro mpaka



Igikorwa 3.3



Ushingiye ku bumenyi usanganwe no kubigara kuri iyi shusho, garagaza inshoza y'ikiganiro mpaka, abakigize n'uko gikorwa.

III.3.1. Inshoza y'ikiganiro mpaka

Ikiganiro mpaka ni igikorwa cyo kuganira ku nsanganyamatsiko runaka bamwe bayishyigikira abandi bayivuguruza/bayihakana. icyo kiganiro kiba kiyobowe kandi buri ruhande ruba ruhatanira guhiga urundi mu gutanga ibitekerezo neza. Ibyo bigatuma buri ruhande rutsimbarara ku murongo w'ibitekerezo rwahisemo. Ikiganiro mpaka kigira abantu bafite inshingano zinyuranye zituma kigenda neza kandi cyubahiriza igihe cyagenwe.

III.3.2 Uko bategura ikiganiro mpaka n'uko gikorwa

Mbere yo kwinjira mu kiganiro mpaka, abashyigikiye insanganyamatsiko n'abatayishyigikiye bamenyeshwa insanganyamatsiko, bagahabwa umwanya wo gukora ubushakashatsi buhagije, begeranya ingingo bari bushingireho/ bazashingiraho kugira ngo bahige abo bari buge impaka.

1. Abagize ikiganiro mpaka

- **Umuyobozi:** Umuyobozi w'ikiganiro avuga insanganyamatsiko iza kugibwaho impaka, agateganya igihe ikiganiro kiri bumare. Agena umubare w'abagomba kugira uruhare mu kiganiro kugira ngo bataba benshi, bityo ibitekerezo bikagora iyobora. Umuyobozi w'ikiganiro ashobora kuba umwe cyangwa bakaba babiri bitewe n'abajya impaka uko bangana n'imiterere y'insanganyamatsiko.

- **Umwanditsi:** Ni uwandika ibitekerezo bitangwa na buri ruhande.
- **Abashyigikiye insanganyamatsiko:** ni itsinda/ uruhande rw'abajya impaka ariko bemeranya n'insanganyamatsiko. Ibitekerezo, ingingo ndetse n'ingero batanga, byose biba biyishyigikira insanganyamatsiko igibwaho impaka.
- **Abahakana insanganyamatsiko:** ni itsinda/ uruhande rw'abajya impaka ariko bahakana insanganyamatsiko. Ibitekerezo, ingingo ndetse n'ingero batanga, byose biba bihakana insanganyamatsiko kabone n'ubwo baba bazi ukuri, barakwirengagiza.
- **Abake murampaka:** Ni itsinda ry'abantu begeranya ibihamya ko uruhande runaka rwatsinze urundi.
- **Umuhwituzi:** ni umuntu wibutsa ko igihe cyagenewe igikorwa iki n'iki cyarangiyeye.
- **Indorezezi:** ni itsinda ry'abantu bitabiriye ikiganiro mpaka. Nta nshingano zindi bagira uretse kureba no kuryohereza n'ikiganiro. Cyakora bashobora guhabwa ijamba bakagira uruhande bashyigikira bitewe n'uko bumva insanganyamatsiko.

Abajya impaka bicara barebana. Ibi bituma ntawubangamirwa cyangwa ngo aterwe icyugazi na mugenzi we. Ni byiza ko abajya impaka babanza kwibwirana.

2. Uko ikiganiro mpaka gikorwa

Umuyobozi w'ikiganiro mpaka atangiza ikiganiro, atanga amabwiriza ku bitabiriye ikiganiro ari abajya impaka ndetse n'indorezezi kandi akirinda kugira uruhande abogamiraho. Mu kiganiro mpaka, ntawihira ijamba; arihabwa n'umuyobozi w'ikiganiro. Nyuma y'ayo mabwiriza, avuga insanganyamatsiko iri bugibweho impaka, maze agaha umwanya abagiye kujya impaka, bagatangira gutanga ibitekerezo byabo.

Iyo abajya impaka bamaze guhabwa umwanya, barisanzura, itsinda rikajya risimburana n'irindi mu gutanga ibitekerezo. Ufashe ijamba bwa mbere, asobanura uko yumva insanganyamatsiko, akabona gutanga ibitekerezo bye. Iyo arangije kuvuga, umuyobozi w'ikiganiro aha ijamba uwo mu rundi ruhande udashyigikiye insanganyamatsiko. Uyu na we abanza gusobanura insanganyamatsiko, agasenya ibitekerezo by'uwamubanjirije, akabona gutanga ibitekerezo bijyanye n'umurongo itsinda rye ryihaye.

Nyuma y'aba babiri babanza kuri buri tsinda, umuyobozi w'ikiganiro agenda aha ijamba umuntu umwumwe uvugira buri tsinda, bakagenda basimburana kugeza igihe umwanya bagenewe urangiye. Aba na bo ugiye kuvuga, abanza gusenya igitekerezo cya mugenzi we. Mu gusenya ingingo z'uwakubanjirije, uzisenyesha ibitekerezo bifite ingufu kurusha ibyatanzwe. Nubwo abajya impaka baba bagomba gusenyanana mu bitekerezo, ufashe ijamba ashaka gusenya igitekerezo cy'undi agomba kubikora mu kinyabupfura no mu bwubahane atajya impaka za ngo turwane. Iyo amaze kubisenya, avuga uko abyumva. Uko umwe mu bajya impaka atanze ibitekerezo, ni ko umwanditsi agenda abyandika. Umwanditsi agomba kwandika muri make ingingo zose zitangwa n'impande zombi akirinda gushyiramo ibitekerezo bye.

Abari mu kiganiro ntibababwira bagomba gutandukira insanganyamatsiko. Umuyobozi w'ikiganiro agarura mu murongo abashatse gutandukira bajya mu bindi. Mu gihe batanga ibitekerezo, uvuga aba agomba gushira amanga akagaragaza ko ingingo atanga azihagazeho ku buryo abamwumva babona ko yifitiye ikizere mu byo avuga. Uri mu kiganiro mpaka, ntagira umususu, nta n'ubwo atungurwa igihe abajijwe n'uwo ku rundi ruhande. Ahora yiteguye kandi ntiyerekane ko ikibazo abajijwe kimunaniye. Bityo igihe avuga, agomba guhanga amaso abo abwira n'abandi bose bari aho, akarangurura ijwi kugira ngo yumvikanishe igitekerezo ke.

Mu gihe batanga ibitekerezo, umuhwituzi agenda ajenyura ko igihe cyo kuvuga cyubahirizwa. Iyo uhawe ijamba atubahirije igihe, umuhwituzi amenyekanisha ko igihe kirangiye, hanyuma umuyobozi w'ikiganiro akaka ijamba uvuga. Indorerezi na zo zigomba kugaragaza umutuzo, zikirinda urusaku, gukomera no gukomera amashyi abatanze ibitekerezo byabo. Iyo umwanya w'abajyaga impaka urangiye, indorerezi zihabwa ijamba zikavuga uko zumva insanganyamatsiko.

Mu gusoza ikiganiro mpaka, umwanditsi asoma ingingo zatanze na buri ruhande ku nsanganyamatsiko. Abakemura mpaka na bo bagashingira ku ngingo zagiye zitangwa na buri tsinda, bagashingira ku myitwarire bagaragaje n'uko bakoreye hamwe nk'itsinda maze bakagaragaza uruhande rwatsinze urundi. Hanyuma umuyobozi w'ikiganiro, agashimira abagize uruhare bose mu kiganiro mpaka, akaboneraho kuvuga igitekerezo cyari kigamijwe, hatangwa iyo nsanganyamatsiko, akaba yakongeraho ibitekerezo bitavuzwe.



Imyitozo

Subiza ibibazo bikurikira:

1. Tandukanya ibiganiro mpaka n'ibiganiro bisanzwe.
2. Rondora abagira uruhare mu kiganiro mpaka.
3. Garagaza ibyo abakemurampaka bashingiraho bagaragaza uruhande rwatsinze.



Umukoro

Tanga ibitekerezo kuri imwe muri izi nsanganyamatsiko wemeranywa na yo cyangwa uyivuguruza.

- a) Mu burezi n'uburere abana bagomba gutozwa ihame ry'uburinganire n'ubwuzuzanye hakiri kare.
- b) Uburezi n'uburere muri iki gihe bugaragaza ko "Igiti kigororwa kikiri gito".

III.4 Amabwirizay'imyandikire: Ikata n'itakara ry'inyajwi, amagambo afatana n'adafatana



Igikorwa 3.4

Ushingiye ku bumenyi ufite, kora ubushakashatsi maze ugaragaze

Amabwiriza agenga ikata n'itakara ry'inyajwi, amagambo afatana n'adafatana mu myandikire y'Ikinyarwanda.

III.4.1 Ikata n'itakara ry'inyajwi

1. Ikata ry'inyajwi zisoza ibinyazina ngenera n'ibyungo "na" na "nka":

Inyajwi zisoza ikinyazina ngenera n'ibyungo "na" na "nka" zirakatwa iyo zikurikiwe n'ijambo ritangiwe n'inyajwi ariko inyajwi isoza ikinyazina ngenera gikurikiwe n'umubare wanditse mu mibarwa ntikatwa.

Ingero:

- Wakomerekejwe **n’iki**?
- Ntakibyara **nk’intare n’ingwe**.
- Umubare **w’amashuri y’imyuga** uriyongera.
- Nyereka uko batsa tereviziyo **n’uko** bayizimya.
- Umwaka **w’ibihumbi bibiri** na cumi **n’ibiri**
- Umwaka **wa** 2012.

2. Inyajwi zisoza amagambo ntizikatwa

Urugero: Kabya inzozi

3. Inyajwi “i” isoza akabimbura “nyiri”, n’inshinga mburabuzi “ni” na “si” ntizikatwa.

Ingero:

- **Nyiri** ubwenge aruta **nyiri** uburyo
- Amasunzu **si** amasaka
- Icyatumye ejo ntaza iwawe **ni** uko natashye ndwaye.

4. Ijambo “nyiri” iyo riri mu mazina amwe n’amwe y’icyubahiro rifatana n’ijambo ririkurikiye

Urugero:

- - Nyiricyubahiro Musenyeri arahageze.
- - Nyirubutungane Papa azasura u Rwanda.

5. “Nyira” ivuga “nyina wa” ikoreshwa mu mazina, ifatana n’ijambo ibanjirije

Urugero:

- Nyirabukwe aramukunda.
- Nyirasenge ararwaye cyane.

6. Inyajwi itangira amazina bwite n’amazina rusange akurikiye indangahantu “mu” na “ku” iratakara, keretse mu izina ritangirwa n’inyajwi “i” ikora nk’indanganteko.

Ingero:

- **Mu Mutara** higanje imisozi migufi.
- **Mu Kagera** habamo ingona.
- Amatungo yanyuze **mu murima**.
- Kwita **ku nka** bigira akamaro.

- Abana bavuye **ku** iriba bajya **mu** ishuri.
- Banyuze **mu** ishyamba.

7. Inyajwi zisoza indangahantu “ku”na “mu”ntizikatwa kandi zandikwa iteka zitandukanye n’izina rikurikira

Ingero:

- Amatungo yanyuze **mu murima**.
- Kwita **ku nka** bigira akamaro. Amagambo afatana n’adafatana

III.4.2 Amagambo afatana n’adafatana

1. Amazina y’inyunge harimo n’amazina bwite y’inyunge yandikwa afatanye.

Ingero:

- Umwihanduzacumu
- Rugwizangoga
- Umukangurambaga
- Umuhuzabikorwa
- Amayirabiri

2. Mu bisingizo, mu byivugo no mu migani, amazina nteruro agizwe n’amagambo arenze ane (4) yandikwa atandukanyijwe kandi agashyirwa mu twuguruzo n’utwugarizo.

Urugero:

Ubwo “Inshyikanya ku mubiri ya Rugema ahica” aba arahashinze.

3. Amagambo mfutuzi yandikwa atandukanyijwe n’amagambo afuturwa.

Ingero:

- Inama **njyanama**
- Umuco **nyarwanda**
- Umutima **nama**
- Umutima **muhanano**
- Inyandiko **mvugo**.

4. Ibyungo “na” na “nka” bikurikiwe n’ibinyazina ngenga bivuga nyakuvuga na nyakubwirwa (ngenga ya 1 n’iya 2) byandikwa mu ijambo rimwe ariko bikandikwa bitandukanye n’ibinyazina ngenga muri ngenga ya 3.

Ingero:

- Ndumva **nawe** umeze **nkange**.
- Ndabona **natwe** tumeze **nkamwe**.
- Ndumva **na we** ameze **nka bo**.
- Ndabona **na ko** kameze **nka bwo**.

5. Iyo **ikinyazina ngenera gikurikiwe n'ikinyazina** ngenga byandikwa mu ijambo rimwe.

Ingero:

- Umwana **wange** ariga.
- Umurima **wacu** urera.
- Ishati **yawe irashaje**.
- Amafaranga **yabo** yarashize.

6. Impakanyi “**nta**” yandikwa ifatanye n'inshinga itondaguye iyikurikiye ariko iyo ikurikiwe n'ubundi bwoko bw'ijambo biratandukana.

Ingero:

- Iwacu **ntawurwaye**
- Muri iri shuri **ntabatsinzwe**
- Ya nka **ntayagarutse**
- Ugereyo **nta** gukererera kubaye.
- **Nta we** mbona
- **Nta cyo** ndwaye

7. Ibinyazina ngenga ndangahantu “**ho**”, “**yo**”, “**mo (mwo)**” n'akajambo “**ko**” bifatana n'inshinga bikurikiye, keretse iyo iyo nshinga ari “**ni**” cyangwa “**si**”.

Ingero:

- Wa mugabo nimusangayo turagenderako ntitugaruka.
- Ya nama yayivuyemo hakiri hare.
- Kuki yamwihomyeho?
- **Ni ho** mvuye.
- **Si ho** ngiye.

8. Akajambo “**ko**” kunga inyangingo ebyiri kandikwa gatandukanye n'amagambo agakikije.

Ingero:

- Umwarimu avuze **ko** dukora imyitozo.
- Ndatekereza **ko** baduhembye.

9. Urujyano rurimo ijambo “**ngo**” kimwe n’ibinyazina: “**wa wundi**”, “**bya bindi**”, “**aho ngaho**”, “**uwo nguwo**”, n’ibindi biremetse nka byo byandikwa mu magambo abiri.

Ingero:

- **Kugira ngo wa wundi** adasanga wagiye, ukwiye kuba ugumye **aho ngaho**.
- Bwira **uwo nguwo** yinjire.
- Fata **aka ngaka, ibyo ngiby**o bireke.

10. Ijambo “**ni**” rikurikiwe n’inshinga ifite inshoza yo “**gutegeka**” cyangwa iyo “**guteganya**” ryandikwa rifatanye na yo.

Ingero:

- **Nimugende** mudasanga imodoka yabasize.
- **Nimugerayo** muzamundamukirize.

11. Amagambo yerekana ibihe yandikwa mu ijambo rimwe: “**nimunsi**”, “**nijoro (ninjoro)**”, “**nimugoroba**”, “**ejobundi**”.

Ingero:

- Aragera ino **nijoro**.
- Araza **nimugoroba**.
- Yatashye **ejobundi**.

12. Ijambo “**munsi**” ryerekana ahantu na ryo ryandikwa mu ijambo rimwe.

Urugero:

Imbeba yihishe **munsi** y’akabati.

13. Amagambo “**ku**” na “**mu**” yandikwa atandukanye n’ikinyazina ngenera ndetse no mu magambo “**ku wa**” na “**mu wa**” abanziriza itariki cyangwa umubare mu izina ry’umunsi.

Ingero:

- Sindiho **ku bwabo**.
- Navutse **ku wa** 12 Ugushyingo.
- Azaza **ku wa** Mbere.
- Yiga **mu wa** kane.

14. Ijambo “(i) saa”, rikurikiwe n’umubare byerekana isaha byandikwa mu magambo atandukanye.

Ingero:

- Abashyitsi barahagera **saa tatu**.
- **I saa kenda** nizigera ntaraza wigendere

15. Imigereka ndangahantu iremewe ku ndangahantu “i” (**imuhira, iheru, iburyo, ibumoso, ivure, ikambere, imbere, ibwami, inyuma...**) n’amagambo akomoka kuri “i” y’indangahantu ikurikiwe n’ikinyazina ngenera “**wa**”, n’ikinyazina ngenga yandikwa mu ijamba rimwe.

Ingero:

- Nuja **iburyo** ndajya **ibumoso**.
- Mbwirira abari **ikambere** bazimanire abashyitsi.
- Nuza **iwacu** nzishima.

16. Indangahantu “i” ikurikiwe n’izina bwite ry’ahantu yandikwa itandukanye n’iryo zina.

Ingero:

- **I** Kirinda haratuwe cyane.
- **I** Muyunzwe ni mu magepfo.

17. Inshinga mburabuzi “-ri”iyo ikoreshejwe mu nyangingo ngaragira yandikwa itandukanye n’ikinyazina kiyibanziriza n’ikiyikurikira.

Ingero:

- Itegeko rihana umuntu uwo **ari** we wese wangiza umutungo wa Leta.
- Ibyo **ari** byo byose sindara ntaje kukureba.
- Sinzi uwo **uri** we.
- Nimumbwire abo **muri** bo.

18. Amagambo afatiwe hamwe akarema inyumane y’umugereka, inyumane y’icyungo, cyangwa iy’irangamutima akomoka ku binyazina bitakibukirwa amazina bisimbura, yandikwa afatanye. Nyamara iyo ahuje ishusho n’izo nyumane kandi ibinyazina bikerekeza ku kintu kizwi cyangwa kibukwa mu buryo bugaragara, byandikwa bitandukanye.

Ingero:

- **Niko?** Uraza?
- Uko arya **ni ko** angana.

- Urahinga **nuko** uteza.
- Uku kwezi **ni uko** guhinga.
- Amutumaho **nuko** araza.
- Ukuboko ashaka **ni uko**.

19. Amagambo ashingiye ku isubiramo yandikwa afatanye.

Ingero:

Perezida yavuze ijamba arangije abari aho amashyi ngo: “Kacikaci”!

Babwire bage binjira **umwumwe**.

Mugende **babiribabiri**.



Imyitozo

Kora imiyitozo ikurikira:

1. Amagambo aranga igihe yandikwa ate? Tanga ingero eshatu.
2. Indimi zose zandikwa zigira amabwiriza agenga imyandikire yazo. Ni izihe ngingo z’ingenzi amabwiriza y’imyandikire y’Ikinyarwanda yibandaho?
3. Kosora interuro zikurikira aho ari ngombwa:
 - a) Umwarimu yahageze saamunani.
 - b) Tugiye kumva twumva amashyi ngo kaci kaci!
 - c) Urarya ni uko utabyibuha.
 - d) Tuzasoza umwaka w’amashuri kuwa 25 nyakanga.
 - e) Iga ibyongibyo kugirango uzatsinde neza.

III.5. Inyunguramagambo



Igikorwa 3.5

Shingira ku bumenyi ufite, ukore ubushakashatsi maze usobanure: impuzanyito, imbusane, imvugwakimwe, ingwizanyito n’impuzashusho kandi utange n’ingero.

III.5.1. Inshoza y’inyunguramagambo

Mu Kinyarwanda inyunguramagambo ni urwunge rw’amagambo umuntu akenera kugira ngo abashe gusobanukirwa no gusabana n’abandi mu mvugo cyangwa mu nyandiko.

III.5.2 Amatsinda y'inyunguramagambo z'Ikinyarwanda

Inyunguramagambo z'Ikinyarwanda zishyirwa mu matsinda bitewe n'isano zifitanye. Bityo, hakaboneka impuzanyito (imvugakimwe), imbusane, imvugwakimwe, ingwizanyito n'impuzashusho.

1. Impuzanyito

Impuzanyito ni amagambo ahuje inyito. Ni ukuvuga ko ayo magambo aba atavugitse kimwe, atanandikwa kimwe ariko ahuje igisobanuro ku buryo rimwe ryasimbura irindi mu nteruro imwe igitekerezo ntigihinduke.

Ingero:

- Abana=urubyaro
- Indyo=igaburo=ifunguro.
- Uruhinja= ikibondo
- Ibyago=amakuba
- Kurya= gufungura=kwica isari=gukora ku munwa
- Ishoka=indyankwi=imarabiti=inshenyi=inshabiti
- Kuzahaza= kurembya=kunegekaza
- Umuhanzi=umuhimbyi
- Gupfa= kwitaba Imana=gutaha
- Umukambwe= umusaza

2. Imvugwakimwe

Imvugwakimwe ni amagambo yandikwa kimwe kandi agasomwa kimwe ariko nta ho ahuriye mu bijyanye n'inyito cyangwa igisobanuro. Ni ukuvuga ko ayo magambo aba asa mu rwego rw'imyandikire n'imivugirwe ariko adafitanye igisobanuro kimwe. Ikiyatandukanya, ni imvugiro aba yakoreshejwemo.

Ingero:

Umugabo

- Umugabo batanga bakora imibare
- Umugabo: umuntu w'igitsina gabo.

Kubyara

- Kubyara umwana
- Kubyara ku igisabo/isekuru/ingoma
- Kubyara umuntu yari yashobewe (kumugoboka)

Inka

- Itungo ryo mu rugo
- Amasaro bakinisha igisoro
- Izo bakoresha mu mukino w'ikibariko (imbata)

Imbata

- Imbata y'umwandiko
- Imbata y'itungo
- Imbata (ikibariko) bakina

3. Impuzashusho

Impuzashusho ni amagambo yandikwa kimwe ariko adasomwa kimwe kandi nta ho ahuriye mu bijyanye n'inyito cyangwa igisobanuro. Ni ukuvuga ko ayo magambo aba asa (ahuje ishusho mu nyandiko isanzwe) ariko uko avugwa ndetse n'igisobanuro nta ho bihuriye. Ayo magambo atandukaniye ku butinde bw'imigemo n'imiterere y'amasaku.

Ingero:

Inkoko

- Inkoko: Itungo
- Inkoko: Igikoresho bagosoza imyaka.

Imyenda

- Imyenda: imyambaro
- Imyenda: amadeni

Inda

- Inda: igice cy'umubiri
- Inda: udusimba tujya mu myenda

Gutara:

- Gutara: Gushyira ibitoki mu rwina
- Gutara: gukusanya ibintu bitatanye cyane

Ikiraro

- - Ikiraro: Iteme bambukiraho
- - Ikiraro: Inzu y'inka cyangwa andi matungo

Gutaka

- - Gutaka: Gusakuza bitewe n'ikikubayeho
- - Gutaka: Gushyira imitako ku kintu

Guhuma

- Guhuma: Kurwara amaso
- Guhuma: Kuvuga kw'impyisi

4. Ingwizanyito

Ingwizanyito ni ijambo rifite inyito nyinshi kandi izo nyito zikaba zifitanye isano muzi. Ni ukuvuga ko ibisobanuro byaryo biba bifite aho bihuriye.

Ingero:

Umuti

Umuti w'ibibazo

Umuti uvura indwara

Gusoma

Gusoma ibitabo

Gusoma misa

Gusoma umuntu

Gusoma ikinyobwa

Gusoma impyisi (Inshoberamahanga)

Gutera:

Gutera umupira

Gutera icumu

Gutera inyoni

Gutera amagi

Gutera ubwoba

Gutera umugeri/ ikofe

Gutera ibiti

Gutera umuti

Gutera inzugi

Gutera ipasi

5. Imbusane

Imbusane ni amagambo afite inyito zinyuranye. Ni ukuvuga ko inyito zayo zivuguruzanya mu ngingo abumbatiye. Mu Kinyarwanda bakunda gukoresha iki kimenyetso ≠ bagaragaza imbusane.

Ingero:

Kuzamuka ≠ kumanuka

Kugaya ≠ gushima

Abagore ≠ abagabo

Cyoroshye ≠ kigoye

Kirekire ≠ kigufi

Umuhungu ≠ umukobwa

Ubugwari ≠ ubutwari

Ubukire ≠ ubukene

Amanywa ≠ ijoro



Imyitozo

1. Simbuza mu nteruro zikurikira amagambo ari mu mukara utsindaye impuzanyito zayo.
 - a) Umaturanyi wacu Kanakuze **yabyaye** abana babiri.
 - b) Witera amabuye muri kiriya giti kirimo **ibiyoni** utangiza ibidukikije.
 - c) Nagiye kwa Sogokuru nsanga adahisha amazi **uruho**.
2. Hitamo rimwe mu magambo wahawe ari mu dukubo, wuzurishe interuro zikurikira imbusane zayo (munini, gutsinda, guhaga, ubushyuhe)
 - a) Abakinnyi b'umupira w'amaguru mu kigo cyacu bakunda.....
 - b) Iyo abana bavuye ku ishuri baba.....cyane.
 - c) Mu bihugu by'i Burayibumara igihe kirekire.
 - d) Uyu murima.....ni wo wezemo ibigori bingana kuriya?
3. Koresha buri jambo muri aya akurikira mu nteruro eshatu ku buryo rigira ibisobanuro binyuranye.
 - a) Gutera
 - b) Gusoma
4. Koresha buri jambo muri aya akurikira mu nteruro ebyirebyiri zifite inyito zigaragaza ko ayo magambo ari impuzashusho.
 - a) Kuvura
 - b) Guhisha
 - c) Gushima

III.6 Isuzuma risoza umutwe wa gatatu

Umwandiko: Umutego mutindi

Iribagiza yari umukobwa w’uburanga kavukire n’ubupfura bihebuje. Yarangwaga n’imyambarire itigana iya kizungu bikabije kuko we yikundiraga imyambaro gakondo, kandi agakunda ibara ry’idoma muri rusange. Ku murimo we wo kwakira abantu mu Kigo Ndangamuco yakoragamo, yashimwaga n’abantu bose.

Umunsi umwe yazindutse ajya ku kazi ke nk’uko byari bisanzwe. Akihagera, asanga umuyobozi we Gashyeke yahageze ari mu biro. Ni ko kumuhamagara, undi na we aramwitaba.

Akimugera imbere aratangira ati: “Ndagushimira ubwitange n’umurava byinshi bikuranga mu kazi, ku buryo nsanga uri umukozi w’indashyikirwa.” Ubwo Gashyeke yabikoze agira ngo abone aho amuhera amwiyegereza bage bagirana ikiganiro kihariye buri gihe. Nyamara Iribagiza utari uzi ikibiyihishe inyuma aramusubiza ati: “Murakoze kumbwira ibyiza mumbonaho mu kazi, nange nzakomeza kubabera umukozi mwiza ukorana umurava igihe cyose.”

Nyuma y’igihe gito, shebuja Gashyeke amutumaho mu biro bye, ngo amuzamure mu ntera, kubera imikorere ye myiza. Amugira umwungiriza we wa hafi ngo age yakira ubutumwa bw’akazi bwose abe ari we ubusubiza. Ibyo byashimishije Iribagiza wumvaga ari byiza gushimirwa imyitwarire ye no kugirirwa ikindi kizere agahabwa inshingano nshya.

Ntibyatizze shebuja amutumaho nk’ibisanzwe ariko afite undi mugambi kuri we. Yari yarabuze aho amuhera kuko yari azwiho ubwitonzi n’ukwiyubaha gukomeye kandi akubaha buri wese. Ubwo Gashyeke amuhereza ibaruwa y’ubutumwa bw’akazi bwagombaga kumara iminsi itanu bari i Rubavu bombi. Iribagiza abwira ababyeyi be iby’ubutumwa bw’akazi yahawe kuko nta na rimwe yabahishaga gahunda ze z’akazi kubera ikizere yabagiriraga. Se abubonye agira amakenga.

Yahise ahamagara umuporisi bari baziranyewakorera gi Rubavu kuzamukurikiranira umutekano w’umukobwa we nagera muri Serena Hoteri. Ibyo yabikoze mu ibanga atamenyesheje Iribagiza ndetse na nyina. Bageze kuri Hoteri bari bateguriwe gucumbikamo, Iribagiza ahabwa urufunguzo rw’icyumba yagombaga kuraramo. Nyamara ntiyari azi ko umuyobozi we Gashyeke yahawe n’abakozi ba Hoteri urundi rufunguzo rw’icyumba ke kugira ngo bimufashe kugera ku mugambi mubisha wo kumufata ku ngufu yari yateguye. Igicuku kinishye, Gashyeke aranyonyomba maze akingura buhorobuhoro icyumba cya Iribagiza. Yiroha mu buriri, aba yambuye iribagiza ikanzu yo kurarana y’umweru yari yambaye, ashaka kumufata ku ngufu, batangira kugundagurana ari nako Iribagiza ataka atabaza.

Umuporisi wari wasabwe gukurikiranira hafi umutekano w'Iribagiza, aba yumvise Iribagiza ataka, arira, yihutira kujya kureba icyo abaye. Asaba abakozi ba hoteri gufungura icyo cyumba, batungurwa no gusanga Iribagiza arwana n'umuyobozi we ashaka kumufata ku ngufu. Bamwambika amapingu ndetse n'uwamufashije muri uwo mugambi na we atabwa muri yombi, bashyikirizwa inzego zishinzwe guhana ibyaha by'ihohoterwa. Porisi yasize yihanangirije abakozi ba hoteri ko badakwiye guha icyuho abagizi ba nabi baba bashaka gukorera ibikorwa by'ihohoterwa mu macumbi yabo. Bongeraho ko uzafatwa azahanwa by'intangarugero.

Kuva ubwo Iribagiza yahise ashinga ihuriro rirwanya ihohoterwa rishingiye ku gitsina kandi riharanira kwimakaza umuco wo kubahiriza uburenganzira bw'ikiremwa muntu muri rusange.

I. Ibibazo byo kumva no gusesengura umwandiko.

Subiza ibibazo bikurikira.

1. Ni nde munyarubuga mukuru uvugwa muri iyi nkuru?
2. Ni iki cyateye Gashyeke kuzamura Iribagiza mu nterank'umukozi w'indashyikirwa?
3. Ni iki cyapfubije umugambi mubisha Gashyeke yari yateguye?
4. Ni izihe ngingo z'ingenzi zivugwa muri uyu mwandiko? Sobanura mu nshamake buri ngingo.
5. Vuga muri make uburyo abahohoterwa abandi bashobora gushyira ubuzima bwabo mu kaga.
6. Ni iki wakwigira ku myitwarire ya se wa Iribagiza?

II. Ibibazo by'inyunguramagambo

1. Huza ijambo riri mu ruhushya rwa mbere n'imbusane yaryo iri mu ruhushya rwa kabiri

Ijambo	Imbusane
Ibyiza	Kugawa
Shebuja	Ibibi
Kwiyubaha	Kumanura mu ntera
Gushimwa	Nyirabuja
Kuzamura mu ntera	Kwisuzuguza

2. Ongera usome umwandiko “Umutego mutindi”, ushakemo impuzanyito z’amagambo akurikira: a) Arafungwa
b) Imyifatire
c) Imirimo
d) Intangarugero.
3. Koresha buri jambo muri aya akurikira mu nteruro ebyiri zifite inyito zinyuranye.
a) Ikirere
b) Intama
4. Andika interuro igaragaza indi nyito y’ijambo ryanditse n’umukara tsiri.
*Rukundo ni we **utera** indirimbo mu itsinda ndirimbamo.*

III. Ibibazo by’ikibonezamvugo

1. Soma igika cya mbere cy’umwandiko “Umutego mutindi” utahuremo amazina gakondo n’amazina y’amatirano.
2. Garagaza intego n’amategeko y’igenemejwi by’amagambo yanditse mu mukara tsiri.
a) **Umutego** mutindi uhibukana nyirawo.
b) Iribagiza yambaraga **imyenda** y’ibara ry’idoma.
c) Iribagiza yaguze **imodoka** nziza.
d) **Umuporisi** yatabaye Iribagiza.

IV. Ibibazo ku biganiri mpaka

1. Ni izihe nshingano waba ufite uramutse ugizwe umuyobozi w’ikiganiri mpaka?
2. Ni akahe kamaro ko gukora ibiganiri mpaka?

V. Ibibazo ku myandikire y’Ikinyarwanda

1. Kosora interuro zikurikira aho biri ngombwa:
a) Umukobwa wa nge yanga gukina nabandi.
b) Umwenda wumweru wandura vuba.
2. **Subiza Yego cyangwa Oya**
a) Amagambo abanziriza itariki cyangwa umubare mu izina ry’umunsi yandikwa: **“kuwa”** na **“muwa”**

- b) Inyajwi “i” isoza akabimbura “nyiri” irakatwa iyo ikurikiwe n’ijambo ritangiwe n’inyajwi.
- c) Ikinyazina ngenga ndangahantu “**ho**” cyandikwa gifatanye n’inshinga gikurikiye.
- d) icyungo “**nka**” cyandikwa gifatanye n’ibinyazina ngenera ngenga muri ngenga ya mbere n’iya kabiri.

Ubushobozi bw'ingenzi bugamijwe

- Gusesengura umwandiko agaragaza ingingo z'ingenzi ziwugize.
- Kurondora no gusobanura ingeri z'ubuvanganzo nyemvugo bwo muri rubanda.
- Guhanga yigana zimwe mu ngeri z'ubuvanganzo nyemvugo bwo muri rubanda.
- Gukina bigana imisango y'ubukwe



Igikorwa cy'umwinjizo

Ushingiye ku bumenyi ufite ku mucu nyarwanda, sobanura ingeri z'ubuvanganzo bwo muri rubanda, sobanura uko ubukwe bwa kinyarwanda bwakorwaga ndetse n'uko umuhango wo kwita izina wakorwaga.

IV.1 Gusoma, kumva no gusesengura umwandiko: Ruhinyuza




Igikorwa 4.1

Soma umwandiko ukurikira, ushakemo amagambo udasobanukiwe hanyuma uyasobanure wifashishije inkoranyamagambo cyangwa inyito afite mu mwandiko kandi usubize n'ibibazo byawubajijweho.

IV. 1.1 Gusoma umwandiko

Soma umwandiko ukurikira:

Ruhinyuza



Kera habayeho umugabo akitwa Ruhinyuza Rwahinyuje Imana. Umunsi umwe yagiye kwiba asanga umugore nyiri urugo yabyaye aryamye asinziriye. Yinjiye mu nzu yumva Imana irimo gutuka umwana imubwira iti: “Mwana wange uravutse ariko uzicwa n’ihembe ry’inzovu.” Ruhinyuza abyumvise arivugisha ati: “Imana irabeshya.” Ntiyaba akibye, aratambuka ajya aho uwo mugore aryamye, afata icyuma, agicisha mu mara ya wa mwana wavutse uwo munsi arangije arigendera.

Bene urugo bakangutse, umubyeyi ngo arebe umwana, asanga amara ye ku buriri. Abwira umugabo ati: “Byuka umwana yapfuye.” Umugabo arabyuka aracana, amatara yari ataraza acana mu ziko. Baterura umwana, basanga ni intere. Bamushyira ku ziko, bazana ikiremo k’impuzu, bakubita muri ya mara babusubiza mu nda barahwanya. Bakajya basenga bagira bati: “Imana ntiyanga kugondoza yanga guhemuzwa, twizeye ko uyu mwana azakira”. Bamurekera aho, umwana baramuvura arakira. Aba aho ngaho, arasohoka, agera aho kwicara, agera iyo akambakamba, agera iyo ahaguruka, wa mugabo kandi akajya aza kuneka kuko yumvise Imana ivuga ngo: “Mwana wange ndagututse uzicwa n’ihembe ry’inzovu.”

Umwana aba aho, amaze gupfundura amabere, wa mugabo yenga inzoga, aragenda ajya gusaba wa mukobwa. Baramumwemerera bati: “Tuzamugushyingira.” Umugabo arakwa, amaze gukwa, ati: “Ndashaka gushyingirwa.” Umugabo arashyingirwa.

Amaze gushyingirwa abwira abagaragu be ati: “Umva rero bagaragu bange, nk’uko nshyingiwe uyu mwana w’umukobwa, uyu mwana w’umukobwa ntakigenze; uyu mwana w’umukobwa ntakagire ubwo ajya mu muryango w’inzu; ntakagire ubwo ajya mu rugo; azajya mu rugo mumuhetse; azajya mu gikari mumuhetse; kandi ntazahinga. Umugore yibera aho ngaho aratinya, aratinyuka; yasohoka agahekwa, yajya kwituma agahekwa, yasubira mu nzu agahekwa.

Umugore arabyara. Amaze kubyara bibera aho ngaho, bukeye abahigi barahiga. Ngo bamare guhiga nyamugore yumva umuhigo. Abwira abagaragu ati: “Ihiii, nimumpeke nge kureba.” Abagaragu bati: “Hama aho ngaho ntibishoboka, kujya kureba umuhigo ntibishoboka, hama aho ngaho, ntabwo bigushishikaje. Abagenda baraza kukubwira”. Umugore ati: “Oya nimumpeke munshyire mu gikari”. Burya koko nyamwanga kubwirwa ntiyanze kubona! Umugore baramuheka no mu gikari. Umugore areba umuhigo, abahigi bari bahetse impyisi. Umugore arabareba, bimwanga mu nda, umugore ashingura ukuguru mu ngobyi, agushinga ku rugo. Agushinze ku rugo, ashingura mu ihembe ry’inzo. Umugore arongera ashingura ukuguru ati: “Nimunjyane imuhira, sinzi ikintu kinyishe mu kirenge.” Bamusubiza mu nzu, umugore ariko ataka avuga ngo: “Nyamwanga kumva ntiyanze no kubona”. Guhera ubwo abyimba ikirenge, umugabo ngo aze barabimubwira. Umugabo ati: “Ese ye, byagenze bite? Uyu mugore mwamujyaniye iki mu gikari?” Abagaragu be baramusubiza bati: “Uyu mugore yari yatubwiye turamuhakanira aranga. None rero nta kundi twari kubigenza.”

Nuko bigeze igihe cya nijoro umugore arapfa, amaze gupfa baramuhamba. Bibera aho ngaho barabasura, kwa sebwewe bazana ibiyagano. Bavuye ku kiriririra cy’urupfu nanone benga inzoga, uwo mukwe atumira kwa sebwewe, atumira bene wabo bo kwa sebwewe na ba nyirarume b’umugore. Bahageze, abatekerereza ukuntu yagiye kwiba, agasanga Imana irimo gutuka umwana wavutse, na we agakata uwo mwana mu nda, agasiga amara ari hasi; ukuntu Imana nanone yamusanye, kandi ko icyo yamututse ari ihembe ry’inzo akaba ari cyo azize. Arabashima ati: “Nukonuko kandi nshimye Imana, abantu mwese mwemere Imana, Imana ni yo iriho kandi ni yo ishobora byose, iyakaremye ni yo ikamena”. Si ge wahera hahera Ruhinyuza.

IV.1.2 Gusobanura amagambo

Soma umwandiko “Ruhinyuza”, ushakemo amagambo udasobanukiwe hanyuma uyasobanure wifashishije inkoranyamagambo cyangwa uko yakoreshejwe mu mwandiko.

IV.1.3 Kumva no gusesengura umwandiko

Subiza ibibazo bikurikira:

1. Izina ry'umujura uvugwa mu mwandiko rihuriye he n'ibiwuvugwamo?
2. Ruhinyuza ageze mu rugo yari agiye kwibamo byamugendekeye bite?
3. Ni iyihe mpamvu yatumye Ruhinyuza asaba uriya mukobwa?
4. Ese ibyo Imana yatutse umwana byabaye ukuri? Sobanura.
5. Garagaza ingingo z'ingenzi zigize umwandiko "Ruhinyuza"
6. Garagaza ingingo z'umuco nyarwanda zigaragara mu mwandiko.



Imyitozo

1. Koresha amagambo akurikira mu nteruro.
 - a) Kuzibukira
 - b) Umutsindo
 2. Ijambo "itorero" rifite inyito zinyuranye. Rikoreshe nibura mu nteruro eshatu uriha inyito zitandukanye.
 3. Wubahiriza isanisha rikwiye, uzuza interuro zikurikira ukoresheje aya magambo: abatabazi, gufata mpiri, gufata umuheto.
 - a) Abajura bagiye kwiba mu kigo cyacu.....
 - b) Kera abahigi barasa inyamaswa
 - c) bari bafite ubwitange bukomeye mu Gihugu.
 4. Utekereza ko itorerero mu Rwanda rwo hambere ryagiraga uruhe ruhare mu kurema Umunyarwanda ubereye u Rwanda.
-
1. Koresha amagambo akurikira mu nteruro ziboneye, ukurikije inyito afite mu mwandiko.
 - a) Impuzu
 - b) Bimwanga mu nda
 - c) Gupfundura amabere

2. Simbuza amagambo y’umukara tsiri ari mu nteruro zikurikira imbusane zayo.
 - a) Ruhinyuza yabwiye **sebukwe** agasanga Imana irimo gutuka umwana.
 - b) Ruhinyuza yategetse **abagaragu** kutazemerera umugore we kuva mu rugo.
 - c) **Umukwe** wabo yajyanye n’**umugore** we iwabo.
3. Ukurikije ibyo Imana yatutse umwana kandi bikaba, ese wemeranywa n’uyu mwandiko ko umuntu avuka Imana yaramuteguriye ibizamubaho? Sobanura.

IV.2 Ingeri z’ubuvanganzo nyemvugo bwo muri rubanda



Igikorwa 4.2

Kora ubushakashatsi ugaragaze inshoza n’uturango by’ubuvanganzo nyemvugo bwo muri rubanda, uburondore kandi usobanure ingeri zabwo.

IV.2 1. Inshoza n’uturango by’ubuvanganzo nyemvugo bwo muri rubanda

Ubuvinganzo nyemvugo bwo muri rubanda ni ibihangano byahimbwe n’abantu ba kera, bakaba barahimbaga batandika, bakabifata mu mutwe. Ibyo bahimbaga babishyikirizaga ab’igihe cyabo bikabizihira mu bitaramo, bakagenda babiraga abo basize, babiherekeranya mu mvugo. Ubuvinganzo nyemvugo bwo muri rubanda bwabaga bwarabaye gikwira kandi nta muntu bwitirirwaga ko yabuhimbye.

IV.2 2. Ingeri z’ubuvanganzo bwo muri rubanda

Ubuvinganzo nyemvugo bwo muri rubanda hakubiyemo ingeri zikurikira:

1. Ibitekerezo byo muri rubanda

Ibitekerezo byo muri rubanda byahimbaga bifatiye ku muntu runaka wabayeho cyangwa utarabayeho. Ibitekerezo byo muri rubanda bigira amakabyankuru ariko ibikorwa biba bibera muri iyi si isanzwe. Mu bitekerezo byo muri rubanda hagaragaramo ingingo z’amateka.

Ingero:

- Igitekerezo cya Semuhanuka
- Igitekerezo cya Nyirarunyonga
- Igitekerezo cya Ngunda
- Igitekerezo cya Serugarukiramfizi
- (...)

2. Imigani miremire

Umugani muremure ni umwandiko uteye nk'inkuru. Uvuga ibintu by'ibihimbano n'ibitangaza, bibera mu isi y'impimbano. Ntawamenya igihe n'ahantu nyakuri byabereye. Imigani ifatira ku bintu bifatika no ku bintu bidafatika nk'abantu, ibintu, ibikoko, Imana, urupfu n'ibindi. Imigani miremire kandi ivugisha ibivuga n'ibitavuga.

Ingero:

- Ruhinyuza
- Nyashya na Baba
- Nyamutegera ikizaza

3. Imigani migufi (imigenurano)

Umugani mugufi cyangwa umugani w'umugenurano ni interuro ngufi ivuga ibintu ku buryo bw'inshamarenga. Uyibwiwe ayumva ahereye ku cyo uwuciye arenguriyeho, yaba adasanzwe awuzi ntiyumve icyo abwiwe. Umugani mugufi uba ugamije kuburira, kwigisha no guhanura.

Imigani y'imigenurano ikubiyemo insanganyamatsiko zinyuranye z'uturango tw'umuco nyarwanda nk'uburezi n'uburere, imibanire, ubucuti, imyemerere, ubwisungane cyangwa ubufatanye n'ibindi.

Ingero:

- Utazi ubwenge ashima ubwe.
- Utazi akaraye i Fumbwe araza ifu.
- Utumviye se na nyina yumvira ijeri.
- Akebo kajya iwa mugarura.

4. Insigamigani

Insigamigani ni ingeri y'ubuvanganzo bwo muri rubanda ikubiyemo ibitekerezo bifatiye ku muntu wakoze ikintu iki n'iki cyangwa se ikintu cyabaye mu gihe runaka bigahinduka iciro ry'umugani. Ishobora kuba kandi iyo mvugo ubwayo, umuntu cyangwa ikintu yakomotseho. Insigamigani zirimo insigamigani nyirizina n'insigamigani nyitiriro.

Insigamigani nyirizina ni izakomotse ku bantu bazwi neza.

Ingero:

- "Ndatega zivamo" yakomotse kuri Ntambabazi wa Rufangura.
- "Nguye mu matsa" yakomotse kuri Rugaju rwa Mutimbo.
- "Ngiye kwa Ngara" yakomotse kuri Nyiramataza Mukarukari.
- "Yarezwe bajeyi" yakomotse kuri Bajeyi ba Sharangabo.

Insigamigani nyitiriro ni ibindi bintu rubanda bagenuriyeho bakabiheraho babigira icyo ry'imigani.

Ingero:

- “Kuvuga ni ugutaruka” yagenuriwe ku mpyisi.
- “Mpuriye he n'ibiguruka?” Yagenuriwe ku gikeri.

5. Ibisakuzo

Ibisakuzo ni umukino wo mu magambo ugizwe n'ibibazo n'ibisubizo bishimisha abakuru n'abato kandi birimo ubuhanga. Ibisakuzo byagiraga abahimbyi b'inzobere bahoraga barushaho kunoza no gukungahaza uwo mukino.

Buri gisakuzo kiba gifite imvugo yacyo yabugenewe, kicicwa mu magambo yacyo bwite kandi gishobora no kugira ibisubizo byinshi.

Abasakuzo bagenda bakuranwa mu gusakuzo. Usakuzo agira ati: “Sakwe, sakwe”, usakuzwa agasubiza ati: “Soma.” Iyo uwasakujwe atinze gufindura igisakuzo, uwamusakuje aramubwira ati: “Kimpe”. Uwasakujwe arasubiza ngo: “Ngicyo”, ubwo uwagisakuje akakica.

Ingero:

- Mukara n'iyayo Inkono n'urweso
- Mweru n'iyayo Urusyo n'ingasire
- Abakobwa bange babyina bose Imiryia y'inanga
- Mama nshuti Ikirago

6. Indirimbo z'inanga zo muri rubanda

Indirimbo z'inanga zo muri rubanda zivuga ibintu bireba imibereho yacu ya buri muni. Mu Rwanda rwo hambere indirimbo z'inanga zari mu bihangano bikesha ibirori n'ibitaramo. Bityo inanga abana bayigiraga ku babyeyi babo cyangwa ku baturanyi.

Ingero:

- Imitoma ya Rujindiri.
- Nyirabisabo ya Sebatunzi.

7. Uturingushyo tw'abasizi

Ni utubango tugufi, tutagoye, duhimbye ku buryo bw'ibisigo. Utwo tubango twagenewe kuganira cyangwa gutoza abana gufata mu mutwe.

Urugero:

Ibitotsi

Ibitotsi ni ibiragi, bigomba ibirago,

Usinzira utiziguye imuhira

Uwazindutse akagusumbya akantu.

Ijoro ni intati rikaba intambara,

Ryageza igihe k'igicuku rikagucuragiza,

Impyisi igatera umurozi akaza.

8. Amagorane

Ni imvugo ikurikiranya amajwi menshi asa kandi avugwa ku buryo bwihuse, utabimenyereye akaba yavugishwa.

Urugero:

Aka kago k'akagera

Karimo akagore k'akageni

Karimo akagega k'akagegemeza

Karimo agakoko k'agakokokazi

Ntikaraye amazi kayaraye kayaraye.

9. Ibisingizo by'inyamaswa

Byitwa ibisingizo ariko uko bivugitse ntibiba bishimagiza byanze bikunze iyo nyamaswa. Hari ibivuga inzoka, impyisi (Bihehe)... Akenshi biba ari bigufi.

Ingero:

- Umunyamerwe
- Ikivugo k'inturo
- Ikivugo k'imbeba

10. Ibyivugo by'amahomvu

Ibyivugo by'amahomvu cyangwa ibyivugo by'abana ni ibyivugo bigufi abana bivuga bagamije gusetsa no kwidagadura muri rusange. Ibi byivugo bivugirwa mu bitaramo byo mu miryango, si mu bitaramo by'ingabo. Impamvu babyita amahomvu ni uko mu by'ukuri ibyo birata biba bitarabayeho.

Ingero :

- Nagiye ku rusenge ibitugu ndabitigisa, imyambi ndayisukiranya, abo twari kumwe ndabacyaha, nitwa cyaradamaraye.
- Ndi inkubito idatinya, ndi Nyambo sinkenga, Mucyo wa Rudatinya, ndi umuhungu ntibyijanwa.

10. Urwenya na byendagusetsa

Urwenya ni inkuru zisetsa ku buryo umuntu uzibariwe ababaye cyangwa arakaye acururuka. Izi nkuru hari ushobora kuzibarirwa zimuvuga nabi akarakara. Byendagusetsa n'imigirire cyangwa imyifatire y'umuntu runaka itera abantu guseka.

Urugero:

Umugabo yafashe inuma ngo age kuyirya iramubwira iti: “Reka nkubwire ikintu kimwe, nako bitatu hanyuma ubone kundiya.” icya mbere: Ikintu cyakugeze mu ntoki ntikikaguhende ubwenge ngo ukirekure. icya kabiri: Ntukababazwe n'icyo wakoze. Irongera iti: “Ndekura nkubwire icya gatatu k'ingenzi.” Arayirekura irigurukira. Inuma iti: “Waba umupfu urakanyagwa.” Na bibiri bya mbere ntiwabyubahirije none nkubwire ikindi?

11. Ibisigo by'ubuse

Ibisigo by'ubuse ni bisigo bihimbitse nk'ibisetso bisa n'ibisebanya. Ni inganzo yaba yaravukiye mu matorero y'intore, aho wasangaga abantu biga kuvuga neza, bagacyocyorana ntihagire urakara. Uwarakaraga muri ibyo biganiriro bamwitaga igifura kitazi kuba mu bandi bahungu cyangwa akitwa umunyamusozi. Abahimbaga ibisigo by'ubuse, babaga bagambiriye gusetsa.

Mu basizi bazwi baba barakenetse inganzo y'ibisigo by'ubuse harimo Musenyeri Alegisi Kagame. Yaje guhimbazwa n'iyi nganzo y'ibisigo by'ubuse maze arayigana ahimba umuvugho muremure yakubiye mu gatabo yise “Indyoheshabirayi”.

Ingero z'ibisigo by'ubuse:

- Baryohewe ubudasigaza
- Babyirukanye ingoga mu gutamira.
- Indyoheshabirayi
- (...)

12. Ubuvanganzo bujyanye n'imyuga n'imihango

Mu Rwanda hari ubuvanganzo bushingiye ku mirimo, ibirori n'imihango. Muri bwo twavugamo ubushingiye ku bworozi bw'inka nk'ibihamagaro, indirimbo z'inka zigizwe n'amahamba, amabanga, imyoma, indama, inzira n'ibyisigo no ku bworozi bw'inzuki nk'amavumvu. Hari kandi ubuvanganzo bushingiye ku buhinzi

nko kwidoga, kwisiga no kuvuga isuka; hakaba ubushingiye ku buhigi nk'amahigi ndetse n'ubushingiye ku mirimo ikorerwa mu mazi hifashishijwe amato nk'amasare.

Ubuvanganzo bushingiye ku birori n'imihango harimo imisango y'ubukwe, indirimbo z'umuhuro (ibihozo) n'imbyino (ikinimba, imparamba, ibyishongoro, imishayayo, iz'intore, imbyino z'imandwa, igishakamba...)



Umwitozo

1. Garagaza uturango tw'ubuvanganzo nyemvugo bwo muri rubanda.
2. Ni akahe kamaro k'ubuvanganzo nyemvugo bwo muri rubanda ?



Umukoro

Hanga wigana imwe mu ngeri z'ubuvanganzo nyemvugo zikurikira:

- Uturingushyo tw'abasizi
- Amagorane
- Urwenya
- Ikivugo cy'amahomvu

IV.3 Gusoma kumva no gusesengura umwandiko: Isabwa rya Mukandahiro




Igikorwa 4.3

Soma umwandiko ukurikira, ushakemo amagambo udasobanukiwe hanyuma uyasobanure wifashishije inkoranyamagambo cyangwa inyito afite mu mwandiko kandi usubize n'ibibazo byawubajijweho.

IV.3.1 Gusoma umwandiko

Soma umwandiko ukurikira:

Isabwa rya Mukandahiro



Hari mu gitondo, mu rugo rwo kwa Rugendo biteguye isabwa ry'umukobwa wabo Mukandahiro. Nyuma yo gutegura ibyicarano no kwicaza abasangwa, abashyitsi baba barahasesekaye babukereye. Bahabwa ibyicarano n'ababishinzwe, maze baratangira baraganira:

Umuhuza w'imisango: Nk'uko mubibonye, mu kanya haje umushyitsi. Ntaratwibwira nubwo nge mbona amaso atari aya, icyakora yahindutse, uko yari asanzwe atemberera muri uru rugo ndabona atari ko yaje. Yaje agaragiwe n'imbaga, kandi ubundi yazaga wenyine. Nyakubahwa umukuru w'umuryango wa Rugendo rero, aba bashyitsi baje si nge wabaha ikaze mu rugo rwawe kandi uhibereye, reka nguhe umwanya ubahe ikaze.

Umusangwa mukuru: Tubahaye ikaze bashyitsi bahire. Mu muryango wa Rugendo mudusanze twibereye mu busabane busoza umwaka. Amazimano arahari, abahungu bange nibabazimanire, nimwumva mushize inyota muritahira dusigare mu busabane bwacu.

Umuhuza w'imisango: Nyamara nubwo ntasoma ku mitima y'abantu ariko uyu mushyitsi ndabona asa n'urimo gusaba ijambo, reka tumuhe umwanya.

Umukwe mukuru: Murakoze, mbere na mbere mbanje kubashimira uko mwatwakiriye muri ubu busabane bwanyu. Abo twazanye nimumfashe tubashimire. (*Amashyi ngo kacikaci!*) Muragahorana amazimano. Hambere twagize umugisha, Imana itanga iwacu ndetse n'iwanyu iraturemera, iduhangamo urukundo, imaze kutwita amazina tuvuye mu ngaragu, iduha kubyara hungu na kobwa, iduha gutunga no gutunganirwa. Mu bana rero bavutse mu muryango wa Bazinura, ari na wo mpagarariye, harimo abahungu n'abakobwa ariko umwe mu bahungu yaraje aransanga angezaho ikifuzo ko atagishaka gukomeza kwitwa ingaramakirambi, ko twamushakira akitwa umugabo. Tumushakira umuranga, aza aha iwanyu ararambagiza, aturangira umugeni muri uru rugo. Muri make, twaje kubasaba umugeni witwa Mukandahiro.

Umusangwa mukuru: Ko hano tugira ba Mukandahiro benshi, urifuza Mukandahiro wuhe? Dufite Karine, Viviyana, Suzana na Virijiniya. Abo bose ni ba Mukandahiro.

Umukwe mukuru: Ndasaba Mukandahiro Virijiniya.

Umusangwa mukuru: Umugeni uramuhawe ariko ni umukobwa. (*Ako kanya amashyi ngo kacikaci!*) Umukobwa wacu ni Mutumwinka. Nta kindi narenzaho, ibindi nawe urabyibwiriza.

Umukwe mukuru: Uhawe inka akura ubwatsi ariko uhawe umugeni arashimira. Ndagira ngo ngushimire mbikuye ku mutima. Uragahore ubyara abakobwa. Nzanira iyo nzoga mwana wange mushimire! Uyu muryango mpagarariye uzira kurongora abakobwa tutakoye. Ndi imbere yawe kandi n'imbere y'umuryango, reka nisubirire mu mwanya wange munkoshe.

Umusangwa mukuru: Yeee! Inyana umunani zirara imfizi mu mahembe. Ngira ngo urabyumva. (*Amashyi ngo kacikaci! Abagore bavuzza impundu*).

Umukwe mukuru: Abakirana batangana berekana aheza kugira ngo hatagira uvunika Hirya aha mpagira urwuri. Nazanye n'umutahira wange Kanuma, haguruka sha! Ngwino unyegere. icyo bashaka ni inyana umunani. Jyana n'umushumba wabo, arebe imigongo yazo, ingeso zazo, arobanure mu ishyo inyana umunani.



Umushumba: Nk’uko yabibabwiraga ni ko nabisanze. Inyana umunani nazishimye nzigejeje mu rwuri rwacu. Ni inyana nziza, zifite imigongo miremire n’ibibero byiza; mbese nazishimye.

Umusangwa mukuru: Ubwo inkwano zawe zashimwe, umugeni uramuhawe. Wicare ugubwe neza ariko nge mfite impungenge. Ko mbona imbere aho wicaranye n’abasaza bafite uruhanga ruharaze imvi nk’izange, sinzi niba uwo usabira ari umwe muri abo ngabo!

Umukwe mukuru: Ndasabira umuhungu wa Bazinura witwa Karinda. Nubwo tutazanye, naketse ko muri bunsabe ko abaramutsa mutumaho nkoreshaje ikoranabuhanga. Reka muhamagare. Tebuka sha! *(Umusore aze agaragiwe n’abamuherekeje, asuhuze umusangwa mukuru.)*

Umusangwa mukuru: Ndabona umukwe wacu ari intarumikwa. Akwiye umukobwa wacu koko.

Umukwe mukuru: Hanyuma se ko maze kukwereka umusore wacu, wowe ntiwanzanira uwo mukazana wacu akaturamutsa?

Umusangwa mukuru: Yewe, ni byo koko, reka ba nyirasenge bamumpamagarire aze, dore ko aba ari mu gikari ahugiye mu mirimo. *(Umugeni aze agaragiwe n’abaherekeza be barimo ba nyirasenge na ba nyina wabo... asuhuze umusangwa mukuru maze amushyikirize umukwe mukuru, na we amushyikirize umukwe w’ukuri. Amashyi n’impundu bibe uruhurirane!)*

Umukwe mukuru: Mu gihe wanyakiraga nkiza, nari mfite ubutumwa maze kubagezaho natumwe na Bazinura. Ariko kandi, yambwiye ati: “Ngaho genda ungire mu Kivugiza ubandamukirize, usabe umugeni, nange nsigaye aha n’abasaza n’abakecuru tugutegereje. Nuza kugabana, ucuyeye umunyafu, ugaruke umbwire

niba urugendo wagize kwa Rugendo rwaguhiriye”. Ndagira ngo munyemerere ngende hakibona, nsange abo basaza n’abakecuru, mbabwire ko mwampaye umugeni. Mbafashe kwitegura kugira ngo ejo cyangwa ejobundi nzagaruke gutebutsa. Muragahorana Imana.

Umusangwa mukuru: Wazanye n’abagore b’amajigija, wazanye n’abagabo b’ibikwerere, wazanye n’ababyeyi bonsa, wazanye n’abagabo b’ibihame, wazanye n’abasore n’inkumi, wazanye n’abana. Reka abahungu bange bazane impamba yabo (*Abasore babiri bahereze umukwe mukuru akanozangendo hanyuma umusangwa mukuru na we amuhereze*). Iyi nkwiherereye yo uyigeze mu rugo ni iya Bazinura wagutumye. Ugende uyimushyikirize, kibe ikimenyetso cy’uko wageze aho yagutumye.

Umukwe mukuru: Sinongera kwicara kuko burya uhawe impamba, arahaguruka akagenda. Ariko reka mbanze nsabe umuhungu wange aherekeze umugeni we. Umva sha! Herekeza uwo mukobwa, umugeze ku muryango wa se. Hari inkingi yitwa kanagazi, ufite uburenganzira bwo guhita kuri iyo nkingi yonyine. Ku rusika rw’umugendo ni ho abashyitsi bagarukira. Mu ndaburano ni aha se kuko imbere ari aha nyina. Mu ruhimbi ni ah’abakobwa. Namara kukwereka intebe uzajya wicaraho waje kwa sobukwe, uhite ugaruka uze dutahe. Ejo cyangwa ejobundi nzazana inzoga yo gutebutsa baduhekere. (*Umusore aherekeze umugeni we, amugeze aho yasabwe kugera hanyuma agaruke batahe*).

IV.3.2 Gusobanura amagambo

Soma umwandiko “*Isabwa rya Mukandahiro*”, ushakemo amagambo udasobanukiwe hanyuma uyasobanure ukurikije wifashishije inkoranyamagambo cyangwa inyito afite mu mwandiko.

IV.3.3 Kumva no gusesengura umwandiko

Subiza ibibazo bikurikira:

1. Umukwe mukuru ageze kwa Rugendo yasanze bakoranyijwe n’iki? Ese koko icyo bavuga mu mwandiko ni cyo cyari cyabakoranyije? Sobanura igisubizo cyawe.
2. Ni iyihe ngingo igaragaza ko umukwe mukuru yishimiye amazimano?
3. Ni iyihe mihango y’ubukwe bwa Kinyarwanda ivugwa muri uyu mwandiko? Yandike uyikurikiranya uko ikurikirana.
4. Ni izihe ngingo zivugwa mu mwandiko zigaragaza ko umuhungu usabirwa yari ageze mu gihe cyo gushaka koko?
5. Uwavuga ko uyu mwandiko ufitanye isano no gucyocorana mu buryo bwa gipfura yaba yibeshye? Tanga ingero ebyiri ziherekeza igisubizo cyawe.

6. Umuhango wo gutebutsa uba ugamije iki mu bukwe bwa kinyarwanda?



Imyitozo

Mu kinyatuzu gikurikira harimo amagambo makumyabiri n’abiri (22) y’imihango cyangwa y’ibikoresho byo mu bukwe. Tahuramo ayo magambo wifashishije ibyerekezo byose.

I	B	I	S	H	Y	I	N	G	I	R	A	N	W	A
G	N	O	N	M	L	L	N	U	N	D	I	I	H	M
U	U	D	M	Z	N	G	V	T	E	E	S	M	Z	A
S	W	T	O	I	O	L	M	E	G	G	T	P	C	J
H	D	B	W	N	D	G	R	B	U	A	I	A	D	Y
Y	V	A	B	I	G	C	A	U	M	T	Y	N	W	A
I	S	U	K	A	K	O	U	T	U	E	H	O	Y	M
N	K	I	J	O	P	U	R	S	A	P	S	B	V	B
G	U	K	W	A	K	J	R	A	U	M	U	K	W	E
I	N	K	W	A	N	O	Z	U	N	I	M	R	S	R
R	A	G	N	A	R	U	M	U	R	Y	U	T	U	E
W	N	U	M	U	S	A	N	G	W	A	O	W	V	I
A	B	A	S	U	G	U	T	E	K	E	S	H	A	N
U	T	Z	C	A	Z	I	G	A	B	M	A	R	U	K
K	U	R	A	M	U	K	A	N	Y	A	Y	Z	A	A

2. Tanga ibitekerezo ku nsanganyamatsiko ikurikira:

Gukora imihango y’ubukwe mu munsu umwe, ni byiza kurusha kuyikora mu byiciro bitandukanye.



Umukoro

Mutegure kandi mukine mwigana imisango y’ubukwe bwa kinyarwanda.

IV.4 Gusoma, kumva no gusesengura umwandiko: Kamana yitwa izina



Igikorwa 4.4

Soma umwandiko ukurikira, usobanure amagambo yatanzwe wifashishije inkoranyamagambo cyangwa inyito afite mu mwandiko kandi usubize n'ibibazo byawubajijweho.

IV.4.1 Gusoma umwandiko

Soma umwandiko ukurikira:

Kamana yitwa izina



Hari ku muni wa munani, Nyiramana amaze iminsi ku kiriri yarabyaye, nuko Kagabo, umugabo we, atumira abaturanyi, ararika abana b'abahungu n'ab'abakobwa. Abo bana babaha inkonzo, bajya mu murima guhinga. Umurima wari wabanje gutabirwa n'abakuru kugira ngo worohe. Abana bamaze guhinga, abakobwa batera intabire imbuto y'uburo n'inzuzi. Barangije gutera, nyirabukwe wa Nyiramana azana amazi mu gacuma, ayasuka ku rushyi, ayabatera, agira ati: "Nimuhingure imvura iraguye." Abana bose baherako barataha.

Bageze mu rugo basanga babateguriye intara, barambuyeho urukoma, bashyiraho ibishyimbo bicucumiyemo imboga, babumbabumyemo utubumbe twinshi. Buri mwana yari yagenewe akabumbe ke kandi buri kabumbe kose kari kageretseho

agasate k'umutsima. Nuko abana babazanira amazi barakaraba, barangije bararya. Bamaze kurya bazana amata y'inshyushyu n'ay'ikivuguto barabahereza baranywa. Umwe mu bana bari aho aranyegera ambaza anyongorera.

- Ko baduhamagaye ngo twite izina ibi bindi badukoresheje ni ibiki?
- Mu muco nyarwanda, mu muhango wo kurya ubunnyano ari wo kwita izina, abana babanza guhingisha inkonzo, bagakurikiraho kurya ubunnyano, bakabona kwita izina. Ubu turangije kurya ubunnyano.
- None se ko iwacu iyo turangije kurya dukaraba, bakaba bataduhaye amazi ngo dukarabe?
- Itonde ibikurikiraho uraza kubibona.

Abana bose barangije kurya, bahamagara umwumwe, bamusaba kugenda ahanaguriza intoki ze ku mabere ya Nyiramana avuga ati: “Urabyare abana benshi, abahungu n’abakobwa”. Barangije, babasaba kwita umwana amazina.

Nuko abana batangira kwita amazina. Umwe ati: “Mwise Bwerere.” Barakomeza bose barahetura. Barangije kwita amazina, bababuza gutaha umwana atarituma ngo batamusurira inabi agapfa. Nyiramana na we bamubuza guhaguruka aho yari yicaye bategereje ko umwana yituma cyangwa anyara. Umwana ntiyatinda ahita yituma. Nyina yari yamwonkeje bihagije agira ngo abikore vuba. Ntibyabaye ngombwa ko bamwina cyangwa ngo bamutamike itabi kugira ngo yitume vuba.

Amaze kwituma bahamagara abana umunani b’amasugi, bane b’abahungu na bane b’abakobwa. Baraza bakikiza urutaro bayoreyeho ibyo ku kiriri, babasaba kuruterurira icyarimwe, bagenda baririmba bati:

“Bwerere yavutse,

Bwerere yakura,

Bwerere yavoma,

Bwerere yasenya,

Bwerere yahinga...”

Bwerere ryari rimwe mu mazina abo bana bamwise. Ibyari ku rutaro, babasabye kujya kubisuka ku nsina bavuga bati: “Dore aho nyoko yakubyariye.” Bajya ku yindi nsina babyina kwa kundi.” Babikora ku nsina zirenga ebyiri.

Wa mwana arongera aranyegera maze arambaza.

- Ibi ni ibiki dusutse kuri izi nsina?
- Ibi musutse ku nsina ni ibyo ku kiriri, mu muco nyarwanda kirazira kubisohora mbere y’umuhango wo kwita izina. Insina mwabisutseho ni iz’uriya mwana wiswe izina, ababyeyi bazira kuzimunyaga. Iyo umwana wavutse ari

umukobwa ashyingiwe kure, bamugemurira igitoki cyazo cyangwa inzoga yazo.

Barangije bazana ingobyi ebyiri, iyo mu ruhu rw'intama n'iyi mu ruhu rw'inka bazikoza ku mwana. Wa mwana arongera ambaza anyongorera:

- Ibi byo bakoze bisobanura iki?
- Ni ukugira ngo ingobyi imwe nibura bazamuheke mu yindi. Iyo batabigenje batya, bukeye bakamuheka mu yo batamukojejeho bimusurira inabi agapfa.
- Ubu se hagiye gukurikiraho iki?
- Ubu bagiye gufata mukuru we bamumuhekeshe kugira ngo bazahore barutana, umukuru ntazarutwe n'umukurikira. Ikindi, ririya cumu, ingabo n'umuheto n'iriya shinge Nyiramana yari yasohokanye, bagiye kubimanika mu ruhamo rw'umuryango, babone kubijugunya.

Bumaze kwira, ba bana bataha iwabo. Igihe cyo mu museke, Kagabo abwira Nyiramana ati: "Cyono duterure umwana." Barabanza bubaka urugo. Barangije Kagabo arasohoka ajya hanze, avuyeyo asanga Nyiramana yamutereye intebe mu irebe ry'umuryango. Mu muco nyarwanda ngo iyo umugabo yateruraga umwana atavuye hanze, byabaga ari ukumuvutsa amahirwe, akazapfa atagize icyo yimarira. Nuko Kagabo araza yicara ku ntebe ati: "Mpa uwo mwana." Aramusimbiza agira ati: "Nkwise Kamana". Amuhereza nyina na we aramusimbiza agira ati: "Itume aha, nyara aha, kura uge ejuru, nge nkwise Irakiza."

IV.4.2 Gusobanura amagambo

Sobanura amagambo akurikira ukurikije inyito afite mu mwandiko.

- a) Inkonzo
- b) Urutaro
- c) Uruhamo rw'umuryango
- d) Irebe ry'umuryango
- e) Abana b'amasugi

IV.4.3 Kumva no gusesengura umwandiko

Subiza ibibazo bikurikira:

1. Umuhango wo kwita izina wahuzaga ba nde?
2. Abana bari bafite uruhe ruhare mu muhango wo kwita izina?
3. Mu muco nyarwanda, ni izihe ngaruka zashoboraga kuba ku mwana, mu gihe se yakoraga umuhango wo kumuterura atavuye hanze?

- Uhereye ku mwandiko, garagaza uko ibikorwa by'umuhango wo kwita izina bikurikirana.
- Ni ibiki byakorerwaga mu muhango wo kwita izina, bitujuje ubuziranenge?
- Uhereye kuri kirazira zavuzwe mu mwandiko, garagaza izindi zitagihabwa agaciro muri iki gihe.



Imyitozo

- Huza amagambo yo mu ruhushya A n'ayo mu ruhushya B ukurikije ibisobanuro byayo.

A	B
1. Gusurira umuntu inabi	a. Buri wese abona umwana we
2. Ikivuguto	b. Kumwifuriza ikibi
3. Barahetura	c. Amata amaze kuvura.

- Amagambo “ingobyi” n’“isugi” ni ingwizanyito. Tanga inyito zitandukanye za buri jambo.
- Uhereye ku mwandiko gereranya uko umuhango wo kwita izina wakorerwaga kera n’uko ukorwa muri iki gihe.



Umukoro

Hina umwandiko “Kamana yitwa izina” mu mirongo icumi kandi wubahirize amabwiriza y’imyandikire y’Ikinyarwanda.

IV.5 Isuzuma risoza umutwe wa kane

Soma umwandiko ukurikira usubize ibibazo byawubajijweho.

Umwandiko: Matama ya Bigega

Umugabo Bigega yabaye aho maze abyara umwana w’umukobwa amwita Matama. Yari yaravukanye isaro mu ntoki, ntihabe hagira uhirahira ngo arimwako.

Mibambwe, umwami w’u Rwanda, arambagira Igihugu, acumbika ahitwa i Remera rya Kanyinya. Mu gicuku gishyira inkoko, Mibambwe yumva umwana urira. Mibambwe arabyuka, abaza abararizi ati: “Uwo mwana araririra he?” Baramusubiza bati: “Nta we twumvise.” Umwami ati: “Nimuge kubaza abaza n’abashumba ko bamenya aho

umwana aririra.” Bababajije barabahakanira. Umwami ati: “Nimuge kubariza no mu baturanyi.” Abo babajije bose bakabahakanira bati: “Nta mwana twigeze twumva arira.”

Ubwo Mugunga wa Ndobwa, umugaragu wa Mibambwe, yari yagishishije inka mu Bugoyi, na we yumva umwana ararira, abaza abagaragu be ati: “Uwo mwana araririra he?” Bati: “Nta we twumva.” Ati: “Nimuge kubaza mu gikumba k’inka”. Abashumba barahakana bati: “Nta mwana twumvise arira.” Bucya Mugunga acyumva umwana arira, ati: “Sinakwihererana ibi bintu ngenyine”. Ajya kubiwira umwami Mibambwe.

Agitunguka mu irembo arasuhuza. Mibambwe ati: “Nta kubaho, ijoro ry’ejo mu gicuku gishyira mu nkoko, numvise umwana urira ageza mu gitondo akirira, n’ubu ndacyamwumva.” Mugunga ati: “Nange ni cyo cyari kinzanye ngo mbikubwire; nanze kubyihererana. Nabajije abantu bose twari kumwe ko na bo baba bumvise umwana urira, barampakanira. Mbajije mu baturanyi barampakanira. Mpera ko mena ijoro ngo nze kubikubwira.”

Mibambwe ati: “Dushake uko twabona uwo mwana. Ndetse noneho ndumva yasaraye, ntakibasha no kurira cyane.” Nuko Mibambwe yohereza intumwa ahantu hose, yohereza na Mugunga, aramubwira ati: “Genda ushake uwo mwana, numara iminsi itatu utaramubona, uzaze dushake ubundi buryo.” Yohereza n’umuntu kwa Kimenyi, umwami w’i Gisaka, ngo amubarize aho umwana yaba aherereye. Babibwiye Kimenyi ati: “Abami b’i Rwanda ntibabe abapfu! Umwana abura arizwa n’iki? Abana b’ino barabuhagira bakarira, babahana bakarira!” Intumwa iraza ibwira Mibambwe uko Kimenyi yamushubije, Mibambwe ntiyanyurwa.

Buracya, atuma undi kwa Muzora, umwami wo mu Ndorwa, na we agiye kumusubiza ati: “Mibambwe ni umusazi. Abana bose bo mu gihugu cyange ngenzura igihe baririra?” Babwiye Mibambwe uko Muzora yamushubije arumirwa ariko ntiyashirwa. Buracya, atuma kuri Rumanyika, umwami w’i Karagwe, ngo amurangire aho umwana yumvise urira, aririra. Rumanyika aramusubiza ati: “Mbese uwo mwana ntarira nk’abandi bana?” Ati: “Sinabona icyo musubiza.” Mibambwe abonye abo bami bose batamubwiye iby’uwo mwana urira, ahamagara abagaragu be bitwaga Indongozi, arababwira ati: “Nimuge kunshakira aho aririra. Dore mbohereje muri umunani, nimujyane na Mugunga.” Abagaragu baragenda, bagera kwa Bigega, bararamukanya, baramubaza bati: “Ntiwamenya aho umwana aririra muri iki gihugu cyanyu?” Bigega ati: “Uwo mwana urira ni uwange, yanze kuvamo umwuka, naho ubundi agiye gufata; umwana umaze icyumweru cyose arira!”

Mugunga ati: “Ese ntiwamenya ikimuriza?” Bigega ati: “Ni isaro yavukanye mu ntoki, ntihabe hari uwarimwaka. Bukeye bagiye kumwuhagira isaro rigwa hasi, inkoko irarimira, umwana arira kuva ubwo. Bagiye gufata inkoko ngo bariyake, umukara urayimira, bagiye gufata umukara, imbwa irawumira, bagiye gufata imbwa, ingwe irayimira, bagiye gufata ingwe intare irayimira, bagize ngo bafate intare, imbogo

irayimira, bakurikiye imbogo ngo bayifate, inzovu irayimira, nuko inzovu yigira mu ishyamba.”

Mugunga abaza Bigega ati: “Iryo shyamba se muzi aho rihereye?” Bigega ati: “Turahazi ariko twese turaritinya, ntawurigeramo.” Mugunga ati: “Duherekeze uritwereke.” Bigega ati: “Ko muri bake?” Mugunga ati: “Nta cyo bitwaye.”

Mugunga n’Indongozi baragenda. Bageze mu ishyamba, batangira guhiga ya nzovu. Inzovu ivumbutse ihunga, bayihurizaho amacumu barayica. Barayibaga bayikuramo ibyo yamize byose. Basangamo na rya saro, Mugunga ararijyana. Agitunguka kwa Bigega bavugiriza impundu icyarimwe. Mugunga ahereza wa mwana isaro rye, aherako arahora. Ahereza Mugunga amaboko, Mugunga aramuhagatira, amuha amata, umwana akira amarira.

Bigega ashima Mugunga n’Indongozi, atuma kuri Mibambwe, ati: “Guhera ubu tubaye inshuti kandi umenye ko abami b’i Rwanda barusha ab’ahandi ubupfura.”

(*Mnyr BIGIRUMWAMI Aloys, ibitekerezo, Nyundo1971*)

I. Ibibazo byo kumva no gusesengura umwandiko

Soma umwandiko, usubize ibibazo bikurikira:

1. Matama uvugwa muri uyu mwandiko yari muntu ki?
2. Ni iki cyabaye intandaro yo kurira kwa Matama ya Bigega?
3. Tanga ingero z’amakabyankuru agaragara muri uyu mwandiko.
4. Ni iki ushima umwami Mibambwe n’umugaragu we Mugunga?
5. Ni iki unenga muri uyu mwandiko ku ngingo yo gufata neza ibidukikije?
6. Ushingiye ku ndangagaciro za Mibambwe, umwami w’u Rwanda, ni izihe ndangagaciro zikwiye kuranga abayobozi?

II. Ibibazo by’inyunguramagambo

1. Sobanura amagambo cyangwa amatsinda y’amagambo akurikira yakoreshejwe mu mwandiko:
 - a) Kugishisha inka
 - b) Mu gikumba k’inka
 - c) Guhirahira
 - d) Kurambagira

2. Koresha amagambo akurikira mu nteruro zigaragaza ko wumva ibisobanuro byayo:
 - a) Kunyurwa
 - b) Kumena ijoro
 - c) Guhagatira
3. Uzurisha interuro zikurikira amwe muri aya magambo wubahiriza isanisha rikwiye: **abararizi, mu nkoko, guhirahira, kuvumbuka, kurambagira.**
 - a) Yaraye adasinziye bigeze.....arabyuka aragenda.
 - b) Mu ishyamba ingeragere maze abahigi barayica.
 - c) Abajura kujya kumwiba ariko bagasanga ku gipangu ke.
 - d) Ku mugoroba umwami yajyagaigihugu ke.

III. Ibibazo ku buvanganzo nyemvugo bwo muri rubanda

1. Rondora ingeri eshanu z'ubuvanganzo bwo muri rubanda.
2. Usanga ubuvanganzo nyemvugo bwo muri rubanda butumariye iki muri iki gihe?
3. Ni irihe tandukaniro riri hagati y'umugani muremure n'insigamigani?
4. Ica ibisakuzo bikurikira:
 - a) icyo nagutuma ntiwakizana.
 - b) Aho nagendaniye nawe wambwiye iki?
 - c) Nkubise urushyi rurumira.
 - d) Nagutega icyo utazi utabonye.
 - e) Abakobwa b'iwacu bicaye ku ntebe imwe.
5. Soma interuro zikurikira, ushake umugani w'umugenurano wahuza n'ibivugwamo.
 - a) Iminsi uyiteganyiriza hakiri kare, ukibishoboye, ibintu wazigamye bikazagutunga utakishoboye n'inshuti washatse zikazagufasha umaze gusaza cyangwa wamugaye.
 - b) Ntawukwiye kwishimira ibyago by'undi naho yaba ari umwanzi we kuko na we bishobora kumugeraho.
 - c) Ubwuzu n'ubuntu bw'umuntu ugukunda bumugaragaraho ukimubona, ntatindiganya kukwakira neza, aguhorana ku mutima n'iyoye ufite ibyago abigufashamo utabimusabye.

- d) Umurimo udakora wibwira ko woroshye, ukagaya abawukora ngo nta cyo bamaze kandi ubakomereye.
- e) Kwiharira ibyo utunze ntusangire n'inshuti utazi icyo iminsi iguteze.
- f) Ni uwuhe mugani wacira umuntu uvugwa muri iyi nkuru: Gatari akunda gusuzugura iby'abandi basubije mu ishuri akumva ko ibye ari byo bizima ko nta wundi wagira icyo asubiza. Bikarangira nyuma yo gukosorwa ari we ubonye amanota make.

6. Uzuza imigani y'imigenurano ikurikira:

- a) Imvura igwa
- b) azira inarabyaye.
- c) Agahwa kari ku wundi.....

7. Mu mibanire y'abantu urwenya na byendaguzetsa bifite akahe kamaro?

8. Himba ikivugo cy'amahomvu cyawe bwite wubahiriza uturango twa bene ibyo byivugo.

9. Ni uwuhe mumaro w'umuranga mu bukwe bwa Kinyarwanda?

10. Ni ibihe bikorwa by'ingenzi, byakorwaga mu muhango wo kwita izina?

Ubushobozi bw'ingenzi bugamijwe

- Gusesengura umwandiko uvuga ku burenganzira bwa muntu agaragaza ingingo z'ingenzi ziwukubiyemo.
- Gusesengura umuvugo uvuga ku burenganzira bwa muntu agaragaza ingingo z'ingenzi kandi atahura uturango twawo.
- Guhanga umuvugo yubahiriza uturango twawo no kuwuvuga imbere y'abandi.



Igikorwa cy'umwinjizo

Uhereye ku bumenyi usanzwe ufite kora ubushakashatsi:

- Ugaragaze amahame y'ingenzi y'uburenganzira y'uburenganzira bwa muntu
- Ugaragaze inshoza n'uturango by'umuvugo.

V.1. Gusoma no gusesengura umwandiko: Ese tubireke dutyo?




Igikorwa 5.1

Soma umwandiko ukurikira, ushakemo amagambo udasobanukiwe hanyuma uyasobanure wifashishije inkoranya cyangwa inyito afite mu mwandiko kandi usubize n'ibibazo byawubajijweho.

V.1.1 Gusoma umwandiko

Soma umwandiko ukurikira:

Ese tubireke dutyo?



Uriya mugore se yasaze ko mbona ari kwivugisha amagambo menshi, yiyesura, byamugendekeye bite? Cyore! Dore aricara, agahita ahaguruka, akajya kurunguruka mu idirishya, akongera akicara. Uriya ni umusazi pe! Noneho ndabona atangiye kwishima mu mutwe, ubanza yafashwe n'ibisazi! Yewe ubanza yataye umutwe, reka mwegere nankundira tukaganira ndareba icyo namufasha. Nkimara kugisha umutima inama, nibaza uko ngiye kumwegera ngo muganirize, ntarahaguruka, atangira kuvugira hejuru mu ijwi riranguruye, asakuza cyane.

Ubu koko turerere he? Mu ngo tubasigira abakozi bakabahohotera. Mu baturanyi na ho harimo inyangabirama zibahohotera. Ku mashuri na ho hari abarezi bamwe na bamwe babahohotera. Abana bacu tubahungishirize he? None n'abakabarinze barabahohotera! Ni ishyano! Ni ishyano nta we naribwira weee! Sinamutanga weee! Oya! Iki ni ikibazo gikomeye Leta igomba gukumira amazi atararenga inkombe!

Ibyo yabivugaga ubona ababaye ariko kubera ko nta muntu yavugishaga abari aho dukomeza kumuhanga amaso gusa dukeka ko ari umusazi. Uko yakomezaga gusakuza ni na ko yajyaga ahaguruka akongera agakubita ijisho mu idirishya ryari hejuru y'aho yari yicaye. Hashize akanya, hasohoka umuganga wari wambaye itaburiya y'umweru, tubona amuhereje imyenda yari asohokanye asa n'umwihanganisha. Umuganga arongera arinjira, wa mugore akomeza kwicara aho. Ngeze aho ndamwegera. Mugeze iruhande ndamusuhuza anyikirizanya ishavu n'agahinda. Yari yataye umutwe ku buryo ibyo namubazaga byose yansubizaga ijambo rimwe gusa.

- Ni se.
- Byagenze bite?
- Ni se! Ndeka mwana wange.

Nyuma yo kumara umwanya tunganira igisubizo ari “ni se” gusa, mpitamo kumuhagurutse aho yari yicaye ndamusindagiza mugeza aho batangira ubufasha ku bahungabanye. Mwinjiza mu nzu, tuhasanga umukobwa ubishinzwe, amwerekera aho yicara. Mu gihe atangiye kumuganiza nge ndasohoka.

Nkigera hanze mpahurira n’abagore babiri bari bavuye gukingiza, barimo baganira. Sininjiye mu kiganiro cyabo ariko nkomeza kugikurikira. Baganiraga bavuga umugabo wahohoteye umwana we, wiga mu mashuri y’inshuke, amusanze mu rugo, nyina yagiye mu murima. Nkimara kubyumva nsanisha iyo nkuru n’uko wa mugore yansubizaga, nibuka ko yasaga nk’uvuye mu murima nkeka ko umwana bavuga ari uwe. Nsubira mu nzu aho nari namusize nsanga yacururutse, aganira na wa mukobwa. Mpageze ashaka guceceka ariko wa mukobwa aramubwira ati:”Komeza nta kibazo uyu ni we wakuzanye aha.” Arakomeza aramutekerereza.

- Bahise bampamagara ndimo guhinga ngo Karake, uw’iwange, yaje avuye mu kabari yasinze kanyanga, amufata ku ngufu. Nahise mva mu murima aho nufiraga amasaka, nsanga umwana aravirirana ni ko kumuzana kwa muganga. Nongeye kugarura ubwenge nisanga aha tunganirira.
- None se Karake asanzwe anywa kanyanga?
- Yayinywaga ariko nta kindi gihe yigeze akora ishyano nk’iryo.

Wa mukobwa asa n’uguye mu kantu, aceceka akanya gato maze bimwanga mu nda akomeza kumuganiriza.

- Buriya rero sinaba ngushinyaguriye nkubwiye ko ishyano ryaguye iwanyu nawe warigizemo uruhare. Iyo ubonye uwo ari we wese akoresha ibiyobyabwenge ntabwo uba ukwiye kumuhishira. Kwinumira ni nko kureka igitambambuga iruhande rw’umunyotwe. Kigeraho kikawusandaguza boshye ivu. Nyamara iyo uba warabigejeje ku bayobozi bari kumugorora, bakamugira inama, akareka kanyanga. Ndakubwiza ukuri nta mubyeyi muzima wakorera umwana we ibya mfura mbi nka buriya. Ni ikibazo k’ingaruka z’ibiyobyabwenge. Ikindi ni ngombwa kuja tunganiriza abana bacu, tubigisha gutahura abantu bafite ingeso mbi, bashobora kubahohotera. Ibyo byatuma bamenya kuvumbura ufite umugambi mubisha wo kubahohotera bakamuhungira kure.

Wa mugore yari yagaruye akenge, yumva ibyo umukobwa amubwira atuje. Hashize akanya abaza wa mukobwa.

- None se ubwo Leta izamuhanisha iki? Si ukumufunga burundu ngahinduka umupfakazi?

- Leta nta nyungu iba ifite mu gufunga abantu burundu, icyo iba igamije ni ukugorora uwakoze icyaha. Iyo amaze kwigishwa imyitwarire ye ikagaragaza ko ibyatumye akora icyo cyaha atabisubira, baramufungura, akagaruka gufatanya n'abandi kubaka Igihugu. Si byiza rero guhishira uwakoze ishyano nk'iryo kuko uba umutesheje amahirwe yo kugororwa ngo ahinduke muzima. Umuzima arafungurwa naho umutindi unangira ntagaragaze ko yicuza ibyo yakoze ni we ufungwa burundu.
- Urakoze kubera ibisobanuro umpaye, reka nge kureba uko umwana ameze ubu muganga yanshatse arambura.

Akimara kumushimira, turasohokana twerekeza aho bakirira abarwayi baje ari indembe hamwe nari namukuye yataye umutwe. Tuhageze, umwe mu baganga bari bahari amubwira ko ategereza gato ko umwana bamujyanye muri raboratwari gufata ibizami ngo barebe niba nta bundi burwayi yaba yatewe n'ihohoterwa yakorewe.

V.1.2 Gusobanura amagambo

Sobanura amagambo n'amatsinda y'amagambo akurikira, wifashishije inkoranya cyangwa inyito afite mu mwandiko.

- a) Kugwa mu kantu,
- b) Kumusindagiza,
- c) Kumufasha,
- d) Kwinumira

V.1.3 Kumva no gusesengura umwandiko

Subiza ibibazo bikurikira:

1. Umugore uvugwa mu gika cya mbere cy'umwandiko yari he? Byari byamugendekeye bite? Kubera iki?
2. Ni irihe hohoterwa rivugwa muri uyu mwandiko?
3. Ni nde wahohoteye undi? Yabitewe n'iki?
4. Ni iki kigaragaza ko uriya mugore atari yiteguye gutanga umugabo we wari wahohoteye umwana we?
5. Nk'umufasha w'abaforomo, ni iki wakora kugira ngo ihohoterwa rikorerwa abana riranduke burundu?
6. Ni iyihe nama wagira umuntu wakorewe ihohoterwa rishingiye ku gitsina aje akugana?



Imyitozo

Kora imyitozo ikurikira:

1. Koresha amagambo akurikira mu nteruro zigaragaza ko wumva icyo asobanura: Gusindagiza, kufira, umunyotwe, kwinumira, igitambambuga, gukorera umuntu ibya mfura mbi
2. Ni izihe ngingo waganirizaho abana kugira ngo bage bashobora gutahura abashaka kubahohotera?

V.2 Gusoma no gusesengura umwandiko: Turyamagane twese



Igikorwa 5.2

Soma umwandiko ukurikira, ushakemo amagambo udasobanukiwe hanyuma uyasobanure wifashishije inkoranya cyangwa inyito afite mu mwandiko, usubize n'ibibazo byawubajijweho.

V.2.1 Gusoma umwandiko

Soma umwandiko ukurikira:

Turyamagane twese



Yewe muco gakondo
Twakondewe na Gihanga
Wowe uharaze imigenzo myiza
Indangagaciro na kirazira
Aho ihohoterwa ryo urarizi?

Iyaduhanze yaradukunze
Iduhundagazaho ubuhanga
Iduhaza urukundo rwayo
Ngo dukundane nk'uko yadukunze
Mu bwubahane buzira umwaga.

Reka ndenge imbibi z'urwacu
Ndenze amaso iyo riterwa inkingi
Ndetse ngere n'ibwotamasimbi
Mbaze bose uko bakabaye
Nti: "Aho ihohoterwa murarizi?"

Icyo kibazo ni cyo gitumye mpanga
Ushaka gukira indwara arayirata
Uwarikorewe wese ntabihishire
Ntagacibwe ngo yamennye ibanga
Ibanga ryakwica rizibukire!

Mu ngo riravuza ubuhuha
Mu kazi ntiryahatangwa
Mu itangwa ryako riraca ibintu
Mu micungire y'abakozi rirabacuzza
Si iryo gucecekwa ryadutsemba!

Hadutse icuruzwa ry'abantu
Baba abahungu ndetsen'abakobwa
Bagakurwa kuri gakondo
Bakabunzwa amahanga ahanda
Bababeshya amaronko.

Hari ihohoterwa ryo mu magambo
Atesha agaciro uwo mubana
Ngo nta mutungo yinjiza iwawe
Ndetse n'idini rye si ryo ryawe
Maze umutima we ukamungwa rwose!

Ingo zirubabakwa zigasenywa
Zizira icyo cyago k'icyorezo
Umugore ntiyubahe umugabo
Ngo ubugabo nyabwo ni mu mufuka
Kandi umwe ari urugingo rw'undi.

Ko mbona ihohoterwa riteye hose
Kandi twese turi abavandimwe
Uyu mutima mutindi tuwugenze dute?

Ko utesha agaciro abantu benshi
Twawutesheje ukava iwacu?

Abakurambere dukesha umuco
Baturaze kubana neza
Mu cyubahiro gikwiriye
Umuto akubaha umukuru
Tukubahirizanya twese.

Hari abahoraga bibeshya
Ngo umukobwa si umwana
Ibyo rwose bikaba intandaro
Yo kwimwa intango y'ubuzima
Akimwa umunani no mu muryango.

Babyara umuhungu ngo ni umutabazi
Amahoro agahinda mu muryango
Babyara umukobwa ngo ni agahinda
Ubwigunge bukarenga umubyeyi
Akaba igicibwa ngo aciye umuryango!

Ubwo umukobwa akaba arahejwe
Akabuzwa amahirwe ava mu mashuri
Agaharirwa gusa imirimo yo mu rugo
Basaza be bakaminuza abareba
Ubwo agashengurwa n'agahinda.

Ndanenga uwo muco rwose
Upfobya abo bari baziranenge
Ukababuza uburenganzira bwabo
Iryo hohoterwa ribatera ipfunwe
Niriranduke rwose mu rwatubyaye!

Reka twese tubigire ibyacu
Uyu muco ukocamye ucike rwose

Duhashye ayo mahano abera iwacu
Porisi ihagurukire ibyo birumbo
Imiryango mpuzamahanga na yo ibihoshe.

Reka ababizi dutoze abandi
Uburenganzira bwa muntu
Kuko buri wese afite agaciro
Duhashye ihohoterwa muri byose
Mu muco wacu ribe kirazira.

Twubahe umuco wacu
Ducenshuraibidakwiye
Bitakijyanye n'igihe turimo
Ariko ibyimakaza urukundo
Bihabwe umwanya mu rwatubyaye.

V.2.2 Gusobanura amagambo

Shaka mu mwandiko amagambo udasobanukiwe, uyasobanure wifashishije inkoranya cyangwa inyito afite mu mwandiko.

V.2.3 Kumva no gusesengura umwandiko

Subiza ibibazo bikurikira:

1. Ni hehe hagaragara ihohoterwa havuzwe mu mwandiko?
2. Ihohoterwa ryo mu muryango rigira izihe ngaruka?
3. Abantu bacuruzwa, babajyana babashukisha iki?
4. Ni nde ufite inshingano zo guhashya ihohoterwa?
5. Kubangamira uburenganzira bwa muntu bigira izihe ngaruka mu mibanire y'abantu?
6. Ni iki cyakorwa kugira ngo uburenganzira bwa muntu bwimakazwe hose?



Imyitozo

Ongera usome umwandiko maze ukore imyitozo ikurikira:

1. Uzurisha interuro zikurikira aya magambo yakuwe mu mwandiko: **umwaga, icyubahiro, umunani, ihohoterwa**
 - a) Abanyarwanda bose ni bamagane rikorerwa mu ngo.
 - b) Umuntu wese akwiye guhabwa gikwiye.
 - c) Abakobwa bari bararenganyijwe badahabwa.....iwabo.
 - d) Kugirantibikwiye.
2. Ni ibihe bikorwa byakwibandwaho kugira ngo ihohoterwe rirandurwe mu Rwanda.

V.3 Umuvugo



Igikorwa 5.2

Ongera usome umwandiko “Turyamagane twese?” witegereza imiterere yawo, uvuge aho ubona utandukaniye n’indi myandiko maze utahure inshoza n’uturango by’umuvugo.

V.3.1 Inshoza y’umuvugo

Umuvugo ni igihangano cy’ubuvanganzo kiri mu mvugo cyangwa mu nyandiko, cyuje ubwiza bunogeye amatwi n’umutima, gifite injyana n’amajwi meza, cyubatse ku buryo bw’imikarago kandi kigakoresha amagambo y’indobanure, aberanye n’ikivugwa.

V.3.2 Uturango tw’umuvugo

Umuvugo urangwa no kuba wanditse mu mikarago cyangwa intondeke, uba ugabanyijemo amabango agererenywa n’ibika byo mu myandiko isanzwe. Imikarago y’umuvugo iba ifite injyana nk’iyo mu ndirimbo. Ukarangwa kandi n’injyana y’isubirajwi n’isubirajambo n’ubundi bwoko bw’iminozanganzo.

V.3.3 Ikeshamvugo rikoreshwa mu mivugo

1. Injyana

Mu mivugo hakoreshwamo injyana ishingiyeye ku ipima ry'imikarago. Uhangana umuvugo agerageza gukoresha imikarago ireshya cyangwa yenda kureshya, bigatuma kuyivugaga hazamo injyana nk'iyi mu ndirimbo.

2. Isubirajwi

Ni ikeshamvugo rishingira ku kugenda basubira mu ijwi runaka ku buryo bunogeye amatwi. Amajwi ashobora gusubirwamo ku ntangiriro y'imikarago, kumpera zayo cyangwa se agakurikirana mu ijamba no mu mukarago.

Urugero rwo mu mvugo "Turyamagane twese"

Hadutse icuruzwa ry'**abantu**

Baba abahungu ndetse n'**abakobwa**

Bagakurwa kuri gakondo

Bakabunzwa amahanga ahahanda

Bababeshya amaronko.

3. Isubirajambo

Ni ikeshamvugo rishingira kumagambo agenda agaruka bidatinze cyangwa hakagaruka ayo bihuriye ku gicumbi.

Urugero rwo mu mvugo "Turyamagane twese"

Umugore ntiyubahe **umugabo**

Ngo **ubugabo** nyabwo ni mu mufuka

4. Imibangikanyo

Imibangikanyo ni ikeshamvugo rishingiyeye ku gukurikiranya imikarago iteye kimwe, ifite ingingo zuzuzanya cyangwa se zivuguruzanya.

Ingero mu mvugo "Turyamagane twese"

• Ingingo zuzuzanya :

Ibyo rwose bikaba intandaro

Yo **kwimwa intango y'ubuzima**

Akimwa umunani wo mu muryango.

- **Ingingo zivuguruzanya**

Ingo zirubabakwa zigasenywa

5. Igereranya

Igereranya ni ikeshamvugo rishingira ku kugereranya ibintu bifite icyo bihuriyeho ku buryo kimwe cyagufasha gusobanura ikindi ukoresheje uko bisangiye imisusire, imigenzereze, umumaro n'ibindi. Igereranya rikoresha ibyungo ngereranya: nka, na, kimwe, asa ...

Urugero rwo mu muvugo “Turyamagane twese”

Ngo dukundane **nk'uko** yadukunze.

6. Ihwanisha

Ihwanisha ni ikeshamvugo risa no kugereranya ariko nta kigereranyisho gikoreshejwe, ku buryo ibigereranywa ubinganyisha, kimwe kikaba cyafata umwanya w'ikindi cyangwa cyagihagararira.

Urugero rwo mu muvugo “Turyamagane twese”

Babyara **umuhungu** ngo ni **umutabazi**

Babyara **umukobwa** ngo ni **agahinda**

7. Iyitirira

Iyitirira ni ikeshamvugo rishingiye ku gufata ikintu ukagisimbuza ikindi bitewe n'uko ubona isano bifitanye. Icyo gihe ijamba rifata umwanya w'irindi rikagira inyito nshya kandi n'iyi ryari risanganywe ritayitakaje. Ikintu gishobora kwitirirwa icyo gikozemo, kikitirirwa agace kamwe mu bikigize cyangwa kikitirirwa icyo kirimo.

Urugero rwo mu muvugo “Turyamagane twese”

Ndetse ngere n'**ibwotamasimbi**(i Burayi)

V.3.3 Akamaro k'imivugo

Imivugo ifasha abahanzi gutambutsa imbamutima zabo babinyujije mu bihangano.

Bifasha umuhanzi kunoza ururimi no gukungahaza inyunguramagambo akoresheje amagambo y'intoranywa. Imivugo ifasha abantu gushima, gutaka, kunenga, kwigisha, gukosora ikintu cyangwa umuntu runaka binyujijwe mu bihangano.



Imyitozo

Kora imyitozo ikurikira:

1. Tanga urugero rw'ingingo zishobora kubangikana zikuzuzanya n'izishobora kubangikana zikavuguruzanya.
2. Ni akahe kamaro k'ikeshamvugo rishingiye ku njyana no ku majwi.



Umukoro

Hanga umuvugo mugufi utarengeje imikarago mirongo itatu ku nsanganyamatsiko wihitiyemo ijyanye n'uburenganzira bwa muntu hanyuma uwuvugire imbere y'abandi wubahiriza isesekaza ry'umuvugo rikwiye.

V.4. Isuzuma risoza umutwe wa gatanu

Umwandiko: Igihembo cy'amahoro kitiriwe Nobeli

Igihembo cy'amahoro kitiriwe Nobeli, gihabwa umuntu wagerageje cyangwa warushije abandi kunga abantu, guca cyangwa kugabanya imitwe y'inyeshyamba n'icuruzwa ry'intwari, kubumbatira no gusakaza iterambere ry'amahoro, hakurikijwe ingingo fatizo zashyizweho mu irage rya Aluferedi Nobeli (Alfred Nobel). Izo ngingo fatizo zirimo guharanira amahoro, uburenganzira bw'ikiremwa muntu, ibikorwa by'ubugiraneza bifasha abantu, no guharanira ubwigenge.

Igihembo cy'amahoro kitiriwe Nobeli cyatanzwe bwa mbere mu mwaka wa 1901. Gishobora kugabanywa abantu babiri, cyangwa batatu cyangwase amashyirahamwe n'imiryango yaba yarakoreye abantu ubuvugizi cyangwa ikabarengera. Nta gihembo kigeze gitangwa mu gihe k'intambara ebyiri z'isi uretse mu wa 1917 no mu wa 1945, ndetse no mu myaka aho nta mukandida wemejwe ko agikwiye mu babaga bagenwe ngo batoranywemo abagihabwa. Igihembo kitiriwe Nobeli cyabanje kuba umwihariko w'ibihugu byo mu Burayi na Amerika y'amajyaruguru, nyuma kiza gukwira isi yose. Abanyafurika bamaze kugihabwa barimo: Anuware Sadate (Anouar el-Sadate), Nerisoni Manderu (Nelson Mandela), na Peteri Bota (Peter Bota), Musenyeri Desimoni Tutu (Desmond Tutu), ...

Muri rusange igihembo Nobeli cy'amahoro cyagiye gihabwa abantu bakoze ibikorwa bifitiye abantu akamaro cyangwa abarwanije ugukandamizwa mu bya politiki n'abaharaniye guca ubusumbane mu bantu nk'Albert Schweitzer, Martin Luther King, Mama Tereza w'i Karikuta, na Aung San Suu Kyi.

Nk'uko Aluferedi Nobeli (Alfred Nobel) yasize abigennye, abahabwa icyo gihembo batoranywa na komite ishyirwaho n'Inteko Ishinga Amategeko y'igihugu cya Noruveji abandi bagahitwamo n'ikigo gishinzwe umuco n'ubumenyi cyo muri Suwedi. Impamvu ni uko mu gihe cya Aluferedi Nobeli (Alfred Nobel) ibyo bihugu byombi byari bikiri igihugu kimwe. Igihembo cy'amahoro kitiriwe Nobeli kijyana n'akayabo ka miriyoni icumi z'amafaranga y'amakuroni akoreshwa muri Suedi. Ni amafaranga arenga gato miriyoni y'amayero akoreshwa mu Muryango w'Ubumwe bw'Ibihugu by'i Burayi.

Abatera amahoro barahirwa rero, kuko usibye ko ubwami bw'Imana ari ubwabo, no mu isi ntibazabaho nabi.

I. Ibibazo byo kumva no gusesengura umwandiko

1. Igihembo cy'amahoro kitiriwe Nobeli cyatanzwe bwa mbere ryari?
2. Ni bande bagomba guhabwa Igihembo cy'Amahoro Kitiriwe Nobeli?
3. Kuki abahabwa Igihembo cy'Amahoro Kitiriwe Nobeli batoranywa n'abantu bo muri Wuwedi no muri Noruveji?
4. Sobanura akamaro, Igihembo cy'Amahoro Kitiriwe Nobeli gishobora kugira mu gusigasira no guteza imbere uburenganzira bwa muntu ku isi.

II. Ibibazo by'inyunguramagambo

Sobanura amagambo akurikira ukurikije inyito afite mu mwandiko:

- a) Inyeshyamba
- b) Irage
- c) Umwihariko
- d) Akayabo

III. Ibibazo ku muvugo

1. Garagaza uturango tw'ingenzi dutandukanya umuvugo n'ubundi bwoko bw'umwandiko.
2. Ikeshamvugo rishingiye ku igereranya ritandukaniyeho n'irishingiye ku ihanisha?

IV. Ihangamwandiko

Hanga umuvugo mugufi utarengeje imikarago cumi n'itanu, ku nsanganyamatsiko y'uburenganzira bw'umwana.

Ubushobozi bw'ingenzi bugamijwe

- Gusesengura umwandiko uvuga ibijyanye n'ikoranabuhanga n'itumanaho agaragaza ingingo z'ingenzi.
- Gutahura, gukoresha neza ntera n'izina ntera n'igisantera.
- Gukoresha neza inshinga mu bihe byayo no mu buryo bwayo.



Igikorwa cy'umwinjizo

Uhereye ku bumenyi usanzwe ufite kora ubushakashatsi:

- Ugaragaze akamaro k'ikoranabuhanga n'itumanaho mu iterambere;
- Utandukanye ntera, izina ntera n'igisantera;
- Utahure inshoza, ubwoko, ibihe n'uburyo by'inshinga.

VI.1. Gusoma no gusesengura umwandiko: Ikoranabuhanga ryaragikemuye




Igikorwa 6.1

Soma umwandiko ukurikira, usobanure amagambo wahawe wifashishije inkoranya cyangwa inyito afite mu mwandiko kandi usubize n'ibibazo byawubajijweho.

VI.1.1 Gusoma umwandiko

Soma umwandiko ukurikira:

Ikoranabuhanga ryaragikemuye



Ikoranabuhanga rigaragarira mu nzego nyinshi z'imirimo. Rikoreshwa mu kunoza no kwihutisha ubushakashatsi, itumanaho, imitunganyirize y'imirimo itandukanye bityo bikihutisha iterambere uko bwije n'uko bukeye.

Abakambwe kimwe n'abandi badutanze kubona izuba, bavuga ko Abanyarwanda bo hambere bari bafite ubumenyi bwo kwirwanaho ngo babone ibyo bakeneye nk'umuriro, ibikoresho binyuranye, imiti ivura indwara n'ibindi. Si ibyo gusa, bashoboraga no gutumanaho bakoresheje uburyo bunyuranye burimo gutuma intumwa, umurishyo w'ingoma cyangwa ihembe.

Vuba aha, aho abazungu badukaniye ibibiriti, imyenda ikorerwa mu nganda, itumanaho rikoresha murandasi, iradiyo, terefone, indege zitagira abapirote (drone), ibaruwa n'ibindi nk'ibyo bitabagaho, ibikoresho n'imiti bigezweho, Abanyarwanda ntibakita ku bumenyi bari basanganywe. Kwihamurira umuti w'ishyamba cyangwa gukoresha ibikoresho gakondo byagiye bikendera. Ntibongeye guhugira mu bya kera ahubwo batangiye kujyana n'ibigezweho. Mu gihe tugezemo ndetse n'ikizaza, usanga ikoranabuhanga ari ingenzi mu mirimo inyuranye no mu buzima bwa buri muni.

Abantu b'ingeri zinyuranye bifashisha ikoranabuhanga n'itumanaho mu kwihutisha no kunoza imirimo yabo. Urugero nko mu buvuzi, mu burezi, mu bucuruzi, mu bwikorezi, mu buyobozi no mu mirimo inyuranye. Mu gukoresha ikoranabuhanga, imirimo ikorwa neza kandi mu gihe gito bityo bikihutisha iterambere mu Gihugu. Igihugu kidakoresha ikoranabuhanga n'itumanaho ntigishobora gutera imbere kuko

abagituye batamenya ibikorera ahandi cyangwa ngo bashobore kumenyekanisha ibyo bakora n'ibyiza bigititse mu ruhando mpuzamahanga.

Mu buvuzi, ikoranabuhanga n'itumanaho byarakataje. Kuri ubu basigaye babaga umuntu batamwegereye kandi bakabaga ahantu hatwo buryo kuhavura byihuta. Ikindi kandi ubu umuntu ashobora kwivuzako akoresheje telefoni, akavugaga uko arwaye, umuganga akamwandikira imiti cyangwa akamwohereza ku ivuriro runaka. Ubu hari utudege tutagira abapirote (drone) tugeza amaraso ku bayakenera ku buryo bwihuse. Nanone kandi muri za raboratwari ntibikiri ngombwa gutegereza iminsi n'iminsi kugira ngo ubone igisubizo. Iyo utanze ikizami, mu minota mike uhita ubona igisubizo. Ibyo byose biterwa n'ikoranabuhanga ndetse n'itumanaho byateye imbere mu Rwanda.

Mu burezi, abarimu n'abanyeshuri bararurashe aka wa mugani w'Abanyarwanda. Kuri bo, ikoranabuhanga n'itumanaho bituma babasha gukora ubushakashatsi bwimbitse ku bijyanye n'amasomo agomba kwigishwa cyangwa kwigwa, bikanabafasha guhanahana amakuru hagati yabo. Abarimu n'abanyeshuri kandi bifashisha ikoranabuhanga bagira ngo bamenye ibigezweho bikenerwa mu mashuri. Ikoranabuhanga rinabafasha kwigisha abanyeshuri bari ahantu hatandukanye atari ngombwa ko bahurira mu ishuri.

Mu bucuruzi, abaguzi n'abacuruzi bifashisha ikoranabuhanga bagura cyangwa bagurisha ibicuruzwa byabo batiriwe bakora ingendo. Mu buryo bwo kwishyurana, ntibikiri ngombwa kugendana amafaranga kuko bikorwa bifashishije telefoni. Mu gihe cyo gutanga imisoro abasoreshwa ntibakirwa bajya gutonda imirongo, babikorera aho bari bakoresheje telefoni cyangwa mudasobwa. Kuri ubu ushobora kubitsa, kubikuzako cyangwa kohereza amafaranga aho ushaka hose ukoresheje telefoni cyangwa amakarita yabugenewe.

Mu bwikorezi, ntibikiri ngombwa gufata urugendo ubitse amafaranga mu mufuka ngo ni ay'urugendo. Ubu ni ukuyashyira ku ikarita yitwa kozaho wigendere, maze iyo karita ukayikoza ku kamashini kabugenewe kaba kari mu modoka maze ukinjira mu modoka ukagenda.

Mu buyobozi, abasaba serivisi babikora kandi bakayihabwa mu buryo bw'ikoranabuhanga batiriwe bajya ku biro runaka. Ikoreshwa ry'impapuro ryaragabanutse kuko hasigaye hakoreshwa mudasobwa mu ibiko ry'amakuru anyuranye mu mirimo myinshi. Mu nzego zinyuranye inama zisigaye zitabirwa n'abantu bitabaye ngombwa ko baba bari hamwe.

Muri make, ikoranabuhanga n'itumanaho ni ingenzi mu kunoza imikorere no kwihutisha serivisi. Ibyo bituma iterambere ry'abaturage n'igihugu muri rusange riyongera. Ni ngombwa rero gushishikarira gukoresha ikoranabuhanga n'itumanaho kuko byoroshye imikorere.

VI.1.2 Gusobanura amagambo

Sobanura amagambo n'amatsinda y'amagambo akurikira, wifashishije inkoranya cyangwa inyito afite mu mwandiko.

- Kubona izuba
- Guhamura umuti
- Uruhandu mpuzamahanga
- Murandasi
- Bwimbitse
- Abasheshe akanguhe
- Gukendera
- Kunoza

VI.1.3 Kumva no gusesengura umwandiko

Subiza ibibazo bikurikira:

1. Iterambere ritaraza Abanyarwanda bakoreshaga ubuhe buryo?
2. Ni hehe hakoreshwa ikoranabuhanga mu buvuzi havuzwe mu mwandiko?
3. Ukurikije ibivugwa mu mwandiko sobanura uko ikoranabuhanga rishobora kwihutisha iterambere.
4. Garagaza igihombo Igihugu kigira iyo kidafite ikoranabuhanga.
5. Vuga ahandi ikoranabuhanga rikoreshwa mu Rwanda hatavuzwe mu mwandiko.
6. Garagaza ingingo z'ingenzi zikubiye muri uyu mwandiko.



Imyitozo

Kora imyitozo ikurikira

1. Simbuza amagambo atsindagiye impuzanyito zayo zakoreshejwe mu mwandiko kandi wubahirize isanisha rikwiye.
 - a) **Abasaza** ba kera bari bafite ikoranabuhanga n'itumanaho bakoreshaga.
 - b) Abanyarwanda bakoreshaga uburyo **butandukanye** mu buvuzi.
 - c) Abantu b'**ibyiciro** binyuranye bakoresha ikoranabuhanga.
2. Shaka muri iki kinyatuzu, mu merekezo yacyo yose, amagambo ikenda afitanye isano n'ikoranabuhanga n'itumanaho yakoreshejwe mu mwandiko "Ikoranabuhanga ryaragikemuye" hanyuma uyandukure.

T	E	R	E	F	O	N	E	A	I
A	E	C	F	I	R	I	M	I	B
W	I	R	A	D	I	Y	O	R	A
B	N	I	E	B	M	E	H	I	R
O	P	M	N	V	M	W	I	O	U
S	U	A	B	G	I	A	K	B	W
A	W	Z	A	K	O	Z	U	I	A
D	A	O	V	E	J	M	I	E	T
U	I	H	E	M	B	E	A	Y	N
M	U	R	A	N	D	A	S	I	O

3. Ikoranabuhanga n’itumanaho ni inkingi ikomeye mu kwihutisha iterambere. Nyamara iyo rikoreshejwe nabi risenya aho kubaka. Uhereye ku bumenyi bwawe, sobanura uko ikoranabuhanga n’itumanaho rikoreshejwe nabi ryasenya aho kubaka.

VI.2 Ntera, izina ntera n’igisantera



Igikorwa 6.2

Uhereye ku bumenyi usanzwe ufite, wifashishije ingero, tanga inshoza kandi utandukanye ntera, izina ntera n’igisantera.

VI.2.1 Ntera

1. Inshoza ya ntera n’uturango twayo

Ntera ni ijambo rigaragira izina rigasobanura imiterere, imimerere n’ingano by’ibyo iryo zina rivuga. Ntera yeagerana n’izina ifutura cyangwa bigahuzwa n’inshinga “ni”, “si”, “ri”, “kuba” n’izindi zivuga imimerere. Ntera yisanisha mu nteko zose z’amazina. Ntera yifashishwa mu kugaragaza indanganteko y’izina igaragiye iyo indanganteko yaryo itagaragaza. Ntera ishobora gusimbura izina igaragiye igafata indomo yaryo, bityo ikitwara nk’izina.

Ingero:

- Uyu mwana **muremure** ni **mwiza**.
- Ihohoterwa si ryiza mu muryango nyarwanda.
- Wa mukobwa wari **muto** yabaye **munini** aho amariye gushaka.

- Kamanzi ni **umusore munini** kandi **muremure**.
- Uru **rukweto** ni **rushyashya**.
- Uyu mukobwa yiga mu ishuri **rikuru**.
- **Abakuru n'abato** bunganirane.
- Imana ivubira imvura **ababi n'abeza**.

2. Urutonde rwa ntera z'Ikinyarwanda

- nini: umwana **munini**
- inshi: ibishyimbo **byinshi**
- bi: ibirayi **bibi**
- tindi: agapfunyika **gatindi**
- gari: inzu **ngari**
- iza: umunsi **mwiza**
- sa/sa-sa: ibijumba **bisa/** amazi **masamasa**
- zima: urukwavu **ruzima**
- to/-to-to/-toya: amasaka **mato**, umuhungu **mutomuto**, ishyamba **ritoya**
- toto: igiti **gitoto**
- ke/keya/ke-ke: ibiryo **bike**, amazi **makeya**, umuti **mukemuke**
- kuru: inka **nkuru**
- bisi: ibishyimbo **bibisi**
- shyashyashya: amakanzu **mashya**, igitambaro **gishyashya**
- gufi/gufiya: insina **ngufi**, urugo **rugufiya**
- re-re: umusozi **muremure**
- tagatifu: ahantu **hatagatifu**
- hire: urugo **ruhire**
- taraga: umukecuru **mutaraga**
- nzinya, nzunyu, nuya, niniya, nzuzunya, nunuya, niniriya, nziginya, nzuguronyu: uburo **bunzinya**, uturayi **tunziginya**

VI 2.2 Izina ntera

Izina ntera ni izina rifite umumaro wo gusobanura irindi zina riherekeje cyangwa risimbura. Izina ntera rigaragaza ubwoko, akarere, ibara cyangwa inkomoko y'ikivugwa. Amazina ntera yisanisha mu nteko nyinshi ugereranyije n'amazina asanzwe. Izina ntera n'izina risobanura bihuzwa n'ikinyazina ngenera, inshinga **ni, si, -ri** cyangwa **kuba**. Ntera yafashe indomo na yo ihinduka izina ntera kuko rigumana umumaro wo gusobanura izina risimbura.

Ingero:

- Abagabo b'**abarerabakunda** guhiga amasaka.
- Amasuka y'**amaberuka** ntakiboneka.
- Yaguze inkweto z'**umutuku**.
- Umwenda w'**umutirano** ntumara imbeho.
- Uyu muceri si **umushinwa**.
- Wa mukobwa wange yashatswe n'umusore w'**umurundi** biganye.
- Indagara z'**intanzaniya**.
- Umushyitsi abaye **umuzungu** yahagerera ku gihe.
- Iyi shati ari **umutuku** ni ho nayigura.
- Inka z'**inzungu** zirakamwa: **Inzungu** zirakamwa.
- Uyu mwarimu ni **umunyarwanda**
- Umunyeshuri mwiza agira ishyaka. **Umwiza** agira ishyaka.

VI.2.3 Igisantera

Igisantero ni ijamba rifite umumaro nk'uwa ntera wo kugaragira izina no kurisobanura ariko ku rwego rw'intego ntirimera nka ntera kuko ritisanisha mu nteko kimwe na yo.

Ingero:

- Umusaza **rukukuri** /abasaza **rukukuri**
- Umugore **gito**
- Umuco **gakondo**
- Inama **mpuzamahanga**.
- Ishuri **nderabarezi**
- Itegeko **teka**

Ikitonderwa

Hari ibisantera bimwe bijyana n'amagambo yagenwe ku buryo ayo magambo yitwara nk'inyumane.

Ingero :

- Umuhoro **muhanya** utema ibizarama.
- Umurimo **mwitumo** ukiza nyirawo.
- Inyoni **nyoro** ntitora mu ruhuri.
- Umwana **murizi** ntakurwa urutozi.
- Nta wutagira marayika **murinzi**.

- Amazi **masabanonta** mara inyota.
- Umutima **muhanano** ntiwuzura igituza.
- Inyandiko **mvugo**



Imyitozo

1. Garagaza ntera, amazina ntera n'ibisantera biri mu nteruro zikurikira:
 - a) Nasuye inzu ndangamurage y'u Rwanda.
 - b) Amazi menshi cyane yangiza imyaka.
 - c) Amatama masa ntasabira inka igisigati.
 - d) Amagi y'amazungu agura make.
 - e) Umwenda w'umukara urashyuha.
 - f) Imikino mpuzamahanga irahimbaza.
 - g) Abana bato bakenera kwitabwaho.
 - h) Nkunda imbyino gakondo.
2. Tanga ingero ebyirebyiri z'interuro zirimo zirimo: ntera, izina ntera n'igisantera.
3. Gereranya igisantera, ntera n'izina ntera ugaragaze icyo bihuriyeho n'itandukaniro ryabyo.

VI.3 Inshinga



Igikorwa 6.3

Ushingiye ku bumenyi ufite, kora ubushakashatsi ugaragaze

- Inshoza y'inshinga,
- Ubwoko bw'inshinga,
- Ibihe bikuru by'inshinga
- Uburyo by'inshinga

VI.3.1 Inshoza

Inshinga ni ijambo ryumvikanisha igikorwa, imiterere/ imimerere n'imico bya ruhamwa mu nteruro. Muri make, inshinga ni yo itanga ubutumwa bw'ibanze mu nteruro.

Ingero:

- Minani **arahinga** mu gishanga.
- Mukamusoni **aritonda**.
- Uyu musore **arabyibushye**.

VI.3.2 Ubwoko bw'inshinga

Inshinga z'Ikinyarwanda ziri mu matsinda abiri. Inshinga isanzwe n'inshinga idasanzwe. Inshinga isanzwe ni inshinga ijya mu buryo bw'imbundo kandi igatondagurwa mu bihe bitandukanye naho inshinga idasanzwe ni inshinga itajya mu buryo bw'imbundo ntinatondagurwe mu bihe byose. Inshinga idasanzwe isimbuzwa izindi nshinga bihuje inyizo mu bihe idatondagurwamo. Inshinga idasanzwe initwa kandi inshinga nkene cyangwa mburabuzi.

1. Inshinga idasanzwe

Inshinga zidasanzwe, inshinga nkene cyangwa inshinga mburabuzi mu Kinyarwanda ni esheshatu gusa ari zo: **ni**, **si**, **-ri**, **-fite**, **-ruzi**, **-zi**. Mu bihe zidatondagurwamo, **"ni"** isimburwa no **"kuba"**, **"si"** isimburwa no **"kutaba"**, **"-ri"** isimburwa no **"kuba"**, **"-fite"** isimburwa no **"kugira"**, **"-ruzi"** isimburwa no **"kubona"** cyangwa **"kureba"** naho **"-zi"** igasimburwa no **"kumenya"**.

Ingero:

- Amasaka **si** amasunzu.
- Mahoro **ni** umuganga.
- Gasore **afite** imyaka itanu.
- **Ndamuruzi** nguriya.
- **Muzi** ubwenge.

2. Inshinga isanzwe

Inshinga isanzwe iyo idatondaguwe iba iri mu mbundo kuko iba itagaragaza ngenga irimo cyangwa ikerekezaho igikorwa, imimerere cyangwa imico bivugwa n'inshinga. Inshinga isanzwe iyo itondaguwe iba igaragaza ngenga itondaguwemo, ngenga irimo n'igihe itondaguwemo.

Ingero:

- **Nzakora** ikizami ejo.
- **Kwiga birashimisha**.
- **Oga** vuba **tugende**.
- **Twaratsinze** twese.

VI.3.3 Ibihe by'inshinga

Inshinga ishobora kuvuga ibirikuba aka kanya, ibiba ubusanzwe, ibigiye kuba, ibizaba bitinze, ibyabaye uyu muni cyangwa ibyabaye kera. Ibi byose bikubirwa mu bihe bitatu by'ingenzi ari byo indagihe, impitagihe n'inzagihe.

1. Indagihe

Indagihe ivuga ibiba muri aka kanya, ibiba ubusanzwe n'ibyabaye kera bivugwa mu nkuru. bityo ikagabanywamo indagihe y'ubu, indagihe y'ubusanzwe, indagihe y'imbarankuru.

a) Indagihe y'ubu

Indagihe y'ubu cyangwa indagihe y'aka kanya yumvikanisha ikirimo gukorwa ubu mu kanya ko kuvuga.

Ingero

- **Ndahinga** mu rutoki.
- **Turarya** ibishyimbo.
- **Baratetse**.

b) Indagihe y'ubusanzwe

Indagihe y'ubusanzwe yumvikanisha igikorwa gisanzwe gikorwa, gihora kiba. Ntawamenya intangiriro n'iherezo ryacyo.

Ingero

- Izuba **rirasa** mu gitondo.
- **Nkunda** gusoma ibitabo.
- Uyu muti **uvura** inzoka.

c) Indagihe y'imbarankuru

Indagihe y'imbarankuru ikoreshwa havugwa ibyabaye kera nk'aho ari iby'ubu.

Ingero

Umwarimu **arahaguruka, arababwira** ati: "Mwigane umwete bizabafasha".

2. Impitagihe

Impitagihe ivuga ibintu byahise kare cyangwa ibyabaye kera. Igabanyijemo impitakare n'impitakera.

a) Impitakare

Impitakare yumvisha igikorwa kirangiye cyangwa icyakozwe uyumuni.

Ingero

- Uyu munsu nateye urubingo.
- Mu gitondo baharuraga umuhanda.

b) Impitakera

Impitakera yumvisha igikorwa cyarangiyeye mu gihe cyahise uhereye ejo hashize.

Ingero

- **Nabyinaga** mu itorerero Indangamuco.
- Umwaka ushize **nasomye** ibitabo byinshi.
- **Yize** Bibiliya akiri muto.
- **Twarakoraga** tugataha.

3. Inzagihe

Inzagihe ivuga ibiza kuba cyangwa ibizaba nyuma y'igihe cyo kuvuga. Igabanyijemo inzahato n'inzakera.

a) Inzahato

Inzahato ivuga ibiri bube nyuma yo kuvuga ariko ntibifatire undi munsu.

Ingero

- - Ku gicamunsi **uratera** umupira.
- - Mu kanya **uramperekeza** ku isoko.
- - **Araza** kukubwira igikenewe.

b) Inzakera

Inzakera ivuga ibizaba ejo cyangwa mu bihe bizakurikiraho.

Ingero

- **Tuzaririmba** indirimbo z'agakiza.
- **Muzadusura** ryari?
- **Muzagera** ku iterambere mu itumanaho.

VI.3.4 Uburyo bw'inshinga

Uburyo ni imigendekere y'inshinga igaragaza imiterere y'ubwumvane iri hagati y'uvuga n'ubwirwa kimwe n'uko uvuga yitwara mu magambo ye. Uburyo bw'inshinga mu Kinyarwanda ni ubu bukurikira: ikirango, imbundo, integeko, inyugo, ikigombero, inyifurizo, inziganyo n' insano.

1. Ikirango

Inshinga iri mu uburyo bw'ikirango iyo igaragaza igikorwa cyangwa imimerere by'ihame, mu buryo budashidikanya.

Ingero :

- **Turiga** isomo ryo kubungabunga ibidukikije.
- **Ntibatema** ibiti bikiri bitoto.
- Ejo **wasomaga** inkuru isekeje.
- Kanyana **yagiye** i Kigali gusura mubyara we Kayitesi.

2. Integeko

Integeko ni uburyo bw'inshinga butanga itegeko.

Ingero:

- **Vuga** inshamake y'inkuru wasomye
- **Mwandike** inkuru ndende ku nsanganyamatsiko mwihitiyemo.
- **Bivuge** neza uko byagenze.
- **Wivuga** inkuru utahagazeho.

3. Inyungo

Inshinga iba itondaguye mu buryo bw'inyungo iyo ikoreshejwe nk'icyuzuzo k'indi nshinga itondaguye maze ibikorwa cyangwa imimerere bikaza biherekeje ibindi.

Ingero:

- Amusanga mu nzira **ahagaze**.
- Yagiye **atamuhaye** ibyo guteka.
- Mwatashye **bwije**.
- Baje **banyerera**.
- Uryama **witambitse**.

4. Imbundo

Imbundo ni uburyo inshinga ibamo ikavuga igikorwa cyangwa imimerere bitagize uwo bicirirwaho cyangwa icyo byerekezaho.

Ingero:

- Ngiye **kuvoma**.
- **Kurya** cyane si ko **kubyibuha**.

5. Ikigombero

Ikigombero ni uburyo inshinga ibamo ikavuga igikorwa gishingiye ku kindi kikagaragaza ikifuzo cyangwa inkurikizi. Ikigombero kivuga igikorwa ngombwa kuko kifujwe.

Ingero:

- Namubwiye ngo **avuge** amakuru yakuye mu itorero.
- Nagende **yihane** kujya ashuka abana bato.
- Ndagira ngo **utahe**.
- Muzasya **mvome**.
- Nimuze **mbatume**.
- Murekure **agende**.

6. Inziganyo

Inziganyo ni uburyo buvuga igikorwa buteganya ko cyabaho ari uko habaye ikindi. Ni ukuvuga igikorwa gishingira ku kindi kugira ngo kibeho.

Ingero:

Mukoranye umwete **mwakira** vuba.

Mbonye ubushobozi **nakwiga**.

Ubonye umwanya **wazadusura**.

Mukurikije inama z'ababyeyi **ntimwahura** n'ingorane.

7. Inyifurizo

Inyifurizo ni uburyo buvuga icyo umuntu yiyifuriza cyangwa yifuriza nyakubwirwa cyangwa nyakuvugwa. Hashobora kwifuzwa ibyiza cyangwa ibibi. Kwifuza ibibi ni ugutukana.

Ingero

- **Kabyare** hungu na kobwa!
- **Muragakira!**
- **Muragwira!**
- **Mwogahirwa** mwe!

8. Insano

Insano cyangwa insobanuzi ni uburyo inshinga itondagurwamo igasobanura izina cyangwa irindi jambo ririsimbura.

Ingero:

- Umurimo **dushinzwe** tuwukorane umwete.
- Imirima **bahinga** ni iyabo.
- Urusaku **numva** ni urw'iki?
- Ibyo **naguhaye** uzabimuhe.



Imyitozo

Kora imyitozo ikurikira:

1. Tanga urugero rw'interuro irimo inshinga itondagye:
 - a) mu ndagihe y'ubusanzwe
 - b) mu mpitagihe y'impitakera
 - c) mu nzagihe y'inzavuba.
2. Vuga uburyo bw'inshinga ziri mu ibara ry'umukara.
 - a) Mbonye imbuto **natera**.
 - b) Igihe nari mu ishuri **wansakurizaga**._
 - c) Ibyo **yakoze** bizamukoraho.
 - d) Bateka **bicaye**.
3. Koresha izi nshinga mburabuzi mu nteruro wishakiye:
 - a) -ruzi
 - b) -ri
 - c) -fite

VI.4. Isuzuma risoza umutwe wa gatandatu

Umwandiko: Yarazikabije!

Mu nzozi ze, Uwineza yahoraga atekereza kuzavamo umuntu ukomeye cyane. Agitangira ishuri ry'inshuke yihatiye kwita ku burere n'inyigisho yahabwaga n'abarezi be. Azamukana umwete udasanzwe mu masomo ye ku ishuri, yagera no mu rugo ababyeyi be bakabimufashamo.

Akiri mu mashuri abanza, uyu mwana w'umukobwa yajyaga abona indege zihita mu kirere k'iwabo akabwira ababyeyi be ko yifuza ko bagura indege. Ababyeyi be

bakamusubiza ko indege ihenda cyane ku buryo kuyisukira bitaba iby'ubonetse wese. Cyokora Uwineza akababaza impamvu batagana banki ibegereye ngo bayiguze ayo mafaranga menshi maze bihahire iyo nyamibwa.

Mu gutekereza ku ndege, Uwineza yifuzaga kuyitunga ariko akanasobanukirwa imiterere n'imikorere yayo. Buri gihe yahoranaga amatsiko y'ibikoresho by'ikoranabuhanga yabonaga mu rugo iwabo, mu baturanyi babo ndetse no ku ishuri. Igihe babaga bagiye kwiga isomo ryerekeye ikoranabuhanga agatega amatwi ibisobanuro byose bahabwa n'umwarimu wabo, akanabaza ibibazo byinshi rwose! Uko yagendaga azamuka mu myigire ye, ni ko yarushagaho gusobanukirwa ko ya ndege yahoraga arota ifite imikorere ishingiyeye ku ikoranabuhanga kandi ko abayigendamo baba bakomeza kugenzura umurongo w'itumanaho hagati yabo n'abo basize aho baturutse tutibagiwe n'abari aho iyo ndege igana.

Kubera umwete yakurikiranaga amasomo ye, byatumaga agira amanota y'indashyikirwa. Iwabo bamuguriye mudasobwa akajya ayifashisha mu kongera ubumenyi n'ubushobozi mu ikoranabuhanga n'itumanaho byunganira ibyo yigira mu ishuri.

Ntibyatizze ikizamini cya Leta kiraza maze si ukugitsinda arakihanangiriza. Ahabwa ishami ririmo ikoranabuhanga n'itumanaho. icyo kiciro yakiganye umwete n'ikinyabupfura bidasanzwe rwose nuko na cyo akinywa nk'unywa amazi, maze akirangizanya amanota y'agahebuzo yo ku rwego rwo hejuru. Ahabwa umwanya muri kaminuza y'ikoranabuhanga n'itumanaho maze si ukubicukumbura abiva imuzungu. Ibi byamuhesheje amahirwe yo kwiga ishuri ry'ibijyanye no gutwara indege. Uko yagendaga arushaho kubiminuza, yageze ku rwego rwo gutwara ndetse no kuzikanika.

Umwuga wo gutwara indege, Uwineza yawukoranye ubushake n'ubwitange, akora imishinga imuteza imbere, aba umwe mu bagore b'abaherwe, ashinga ikigo cy'ubwikorezi bwo mu kirere. Ubu inzozo ze yarazikabije, kuko afite indege nziza rwose.

I. Ibibazo byo kumva no gusesengura umwandiko

1. Umunyarubuga mukuru muri iyi nkuru afite iyihe ntego?
2. Garagaza uruhare rw'ababyeyi mu gufasha uwineza kugera ku nzozo ze.
3. Wifashishije umwandiko sobanura ubutwari bwa Uwineza.
4. Garagaza ingingo z'ingenzi ziri muri uyu mwandiko.
5. Ukeka ko ikoranabuhanga ryaba ryarafashije iki Uwineza mu rugendo rwo kugera ku nzozo ze.

II. Ibibazo by'inyunguramagambo

1. Sobanura amagambo akurikira ukurikije inyito afite mu mwandiko:

- a) Inyamibwa
- b) Arakihanangiriza
- c) Umuherwe
- d) Abiva imuzingo

2. Ubaka interuro iboneye ukoresheje buri jambo muri aya akurikira:

- a) NK'unywa amazi
- b) Kubicukumbura
- c) Indashyikirwa
- d) Agahebuzo

III. Ibibazo ku kibonezamvugo

1. Tandukanya ntera, izina ntera n'igisantera wifashishije ingero.

2. Koresha mu nteruro inshinga zikurikira mu bihe byasabwe

- a) -ruzi (inzagihe)
- b) kubiba (impitagihe y'impitakera)
- c) kudoda (indagihe y'ubusanzwe)
- d) gukoresha (inzagihe y'inzavuba)

3. Koresha inshinga "**gutsinda**":

- a) mu nyifuzo
- b) Mu ntegeko
- c) mu nziganyo
- d) mu nyungo

Ubushobozi bw'ingenzi bugamijwe

- Gusesengura umwandiko uvuga ku kubungabunnga ibidukikije hagaragazwa ingingo z'ingenzi ziwugize.
- Kugaragaza amazina akomoka ku yandi n'amazina akomoka ku nshinga.



Igikorwa cy'umwinjizo

Uhereye ku bumenyi usanzwe ufite kora ubushakashatsi:

- Ugaragaze uruhare rw'ibidukikije ku mibereho myiza ya muntu
- Ugaragaze amazina y'Ikinyarwanda akomoka ku yandi moko y'amagambo.

VII.1. Gusoma no gusesengura umwandiko: Kariza mu butayu




Igikorwa 7.1

Soma umwandiko ukurikira, ushakemo amagambo udasobanukiwe hanyuma uyasobanure wifashishije inkoranya cyangwa inyito afite mu mwandiko kandi usubize n'ibibazo byawubajijweho.

VII.1.1 Gusoma umwandiko

Soma umwandiko ukurikira:

Kariza mu butayu



Amapfa yibasiye amajyaruguru y’Afurika, abimukira bakajya bava mu bihugu binyuranye bakambuka ubutayu bwa Sahara berekeza ku mugabane w’i Burayi. Muri urwo rugendo bambuka ubutayu, bagendaga bahura n’ibizazane bikomeye. Umuryango wa Gahigi ni umwe mu miryango yahuye n’akaga muri urwo rugendo.

Umugabo Gahigi, umugore we Nyiramana n’abana babo Kariza na Ngabo babaga muri kimwe mu bihugu by’amajyaruguru ya Afurika. Uyu muryango, wari umaze imyaka isaga makumyabiri ubayeho neza, hanyuma mu gihugu haza gutera amapfa. Aho amapfa atereye, bafashe umwanzuro wo gusuhukira mu bihugu by’i Burayi, abana bata amashuri kuko nta kundi bagombaga kubigenza.

Mbere yo gufata urugendo, biteguye uko bashoboye kuko bagombaga kunyura mu butayu bunini butagira amazi n’ibiribwa. Bazindutse mu ruturuturu, bafata utwangushye, bashyira nzira baragenda. Mu nzira, bahahuriye n’abandi bimukira bavaga hirya no hino, bafatanya urugendo, bagenda basangira ibyo bari bafite.

Bacagashije urugendo, impamba bari bitwaje yarashize maze Gahigi atangira kuzenguruka ubutayu ashakisha aho yabona amazi n’icyatunga umuryango we. Yaje kubona akazenga k’amazi mabi. Mbere yo kuvoma ngo ashyire umugore n’abana, yagotomeye amazi menshi bimuviramo urupfu kubera ko umwuma wari umugeze habi. Umuryango wategereje ko Gahigi agaruka, uraheba.

Bukeye, umuhungu we Ngabo afata umwanzuro wo kujya gushaka irengero rya se. Akomeza kugenda arorogotana, cyane ko nta n’imbaraga yari agifite. Burya koko arimo gishegesha ntavura, yaje guhura n’inkubi y’umuyaga iramuzibiranya, umusenyi umurenga hejuru, inzogera irirenga.

Nyiramana amaze kubura umugabo n'umuhungu we, arashoberwa. Akomeza gukurikira abandi afite intege nke n'agahinda kenshi. Bakomeza urugendo ariko rubabana rurerure dore ko hari n'igihe basubiraga aho bavuye kubera ko kubona amerekezo mu butayu bigoranye.

Hashize icyumweru kimwe, kubera agahinda, gucika intege no kubura amazi n'ibiryo, Nyiramana na we yaje gupfa azize umwuma n'inzara, hasigara wa mukobwa Kariza. Ubwo Kariza yisunze umuryango bari kumwe, bakomeza urugendo. Baje kwambuka ubutayu bagera hafi y'Inyanja ya Mediterane, bahasanga ibiribwa n'amazi, bararya, baranywa, barahembuka.

Kariza amaze gutora agatege, atangira kuganira n'umugabo wo mu muryango yisunze. Yamubajije ibibazo byinshi ashaka kumenya impamvu aho banyuze hose nta mazi bigeze bahabona. Uwo mugabo yari umuhanga, agwa neza kandi agakunda kuganira. Yamusobanuriye birambuye bimwe mu biranga ubutayu n'impamvu zibutera.

- Ahantu twanyuze ni mu butayu. Nk'uko wabyiboneye, mu butayu ni ahantu h'umucanga, hataba amazi, ntihahe ibinyabuzima, byaba ibimera cyangwa inyamaswa. Nta mvura ihagwa, n'iyi ihaguye, iba ari nke cyane.
- Kubera iki se mu butayu haba ibyo bibazo byose birimo no kubura amazi ?
- Uretse imiterere kamere y'ahantu, abantu na bo bagiye bafata nabi ibidukikije, amashyamba barayatsembe, imvura irabura, amasoko n'imigezi birakama, amapfa aratera. Abari bahatuye barasuhuka, berekeza ishyamba. Abashatse kugundira ngo bigumire mu bikingi byabo barapfa, bazira umwuma no kubura umwuka mwiza wo guhumeka. Aho bari batuye, hahinduka ubutayu hatyo.
- Ushatse se kuvuga ko amazi ari yo soko y'ubuzima bw'ibinyabuzima byose ?
- Ni byo rwose wabimenye. Amazi ni ubuzima. Wabonye ko abantu bagiye bapfira mu butayu kubera kubura amazi. Nyamara, aho tuboneye amazi, abantu baranzamutse ntihagira abongera kwicwa n'umwuma. Iyo imvura iguye, abantu bahinga imyaka ikera. Ibiyaga, imigezi n'inzuzi bifatiye runini abatariye isi. Amazi yabyo akoreshwa mu kuhira imyaka mu turere tutabonekamo imvura ihagije. Mu biyaga n'inzuzi kandi habamo ibinyabuzima bifatiye abantu akamaro kanini nk'amafi, inyamaswa zitandukanye ndetse n'ibimera. Amazi kandi afasha abantu mu kubaka ibikorwa remezo binyuranye. Abubaka bifashisha amazi, ingufu nyinshi z'amashanyarazi zikoreshwa ku isi, zikomoka ku mazi. Mu kamaro k'amazi kandi ntitwakwibagirwa ko hamwe na hamwe, amazi ari yo mipaka y'ibihugu n'imigabane.

Wa mugabo yakomeje gusobanurira Kariza ibijyanye n'ubutayu maze avuga no ku mashyamba.

- Amashyamba ni isoko y'umwuka mwiza duhumeka, ni na yo akurura imvura. Amashyamba afata ubutaka ntibutwarwe n'isuri, bigatuma hataba ubutayu. Amashyamba ni intaho y'ibindi binyabuzima binyuranye birimo inyamaswa

n'ibiguruka. Amashyamba kandi ni isoko y'ubukerarugendo buzanira ibihugu amadovize. Ibiti bimwe na bimwe biboneka mu mashyamba, cyanecyane aya kimeza, bivamo imiti inyuranye ikoreshwa mu buvuzi.

- Burya koko byose byicwa no kutabimenya. Urakoze cyane ku bisobanuro umpaye. Ubu se koko ni iki twakora kugira ngo tubungabunge ibidukikije?
- Birakwiye ko buri muntu wese, agira uruhare mu kubungabunga ibidukikije. Nk'uko bikunze kuvugwa ngo: «Nutema kimwe uge utera bibiri», ni ngombwa kongera amashyamba dutera ibiti aho bitari, twirinda gusarura amashyamba ateze kandi twamagana ba rutwitsi. Ni byiza ko abantu bose babungabunga ibiti, amashyamba na za pariki. Ni ngombwa kandi ko buri muntu wese abungabunga amasoko y'amazi, imigezi, inzuzi, ibiyaga n'inyanja.
- Ubwo amazi yabungwabungwa ate?
- Amazi yabungwabungwa twirinda kubaka hafi yayo, kuyasesagura no kuyajugunyamo imyanda inyuranye. Tugomba kandi kuyasukura tuyavanamo ibimera biyagiza nk'amarebe.

Muri iki kiganiro, Kariza yasobanukiwe akamaro ko kubungabunga ibidukikije maze bakomeza urugendo, bambuka inyanja, bagera i Burayi. Bageze i Burayi, Kariza yakomerejeyo amashuri maze ahitamo kwiga ibijyanye no kurengera ibidukikije. Yabitewe n'uko yari yarababajwe cyane no kuba ababyeyi be n'abandi bantu, baraguye mu butayu biturutse ku ngaruka z'uko ibidukikije bitabungabunzwe uko bikwiye.

VII.1.2 Gusobanura amagambo

Sobanura amagambo n'amatsinda y'amagambo akurikira, wifashishije inkoranya cyangwa inyito afite mu mwandiko.

Ubutayu

Gusuhukira

Uruturuturu

Utwangushye

Inzogera irirenga

Kwisunga abandi

Kurorongotana

Kuzibiranya

Ibikingi

Umwuma

Amarebe

Gufatira runini

Kuzanzamuka

VII.1.3 Kumva no gusesengura umwandiko

Subiza ibibazo bikurikira:

1. Ni ubuhe butayu abimukira bambukaga buri mu majyaruguru ya Afurika?
2. Aba bimukira bafashe umwanzuro wo gusuhuka, berekeza i Burayi. Ni iyi he nyanja bambutse mbere yo kugerayo?
3. Ni iki cyatumye Kariza ahitamo kwiga ibijyanye no kurengera ibidukikije?
4. Sobanura akamaro k'ibidukikije ku buzima bwa mu ntu?
5. Garagaza ingingo z'ingenzi ziri mu mwandiko.
6. Iyo bavuze ngo "Nutema kimwe uge utera bibiri" baba bashatse kuvuga iki?



Imyitozo

1. Simbuza amagambo yanditse atsindagiye andi bivuga kimwe dusanga mu mwandiko wubahiriza isanisha.
 - a) **Ukuva kw'izuba ryinshi kandi rikabije** byateye ikama ry'ibiyaga n'ibishanga.
 - b) Amage arisha umugabo ikivuza, inzara se ntiyatumye **duhunga** tukerekeza i Bushi!
 - c) Amazi yarabuze mu mudugudu wacu **icyaka gikabije** gituma benshi batakaza ubuzima.
 - d) Gahigi na Mpwerazikamwa bamaze iminsi **bijajaye** basubiye mu kibuga.
 - e) Amazi n'amashyamba **bidufitiye akamaro kanini**, ntawarota yangiza ibyo bidukikije.
 - f) Amazi n'amashyamba **bidufitiye akamaro kanini**, ntawarota yangiza ibyo bidukikije.
 - g) **Amafaranga y'amahanga** dusigirwa na ba mukerarugendo afasha Igihugu cyacu muri byinshi.
 - h) Ni byiza kuvana **ibyatsi bimera** mu mazi mu rwego rwo kuyabungabunga no kuyarinda umwanda.
2. Koresha amagambo akurikira mu nteruro wihimbiye ukurikije uko yakoreshejwe mu mwandiko.

Kora imyitozo ikurikira:

- a) Gusuhuka
- b) Ubutayu
- c) Amapfa
- d) Igikingi



Umukoro

Sobanura wifashishije ingero, ukuntu umuntu n'ibimukikije ari magirirane.

VII.2 Ikomorazina



Igikorwa 7.2

Uhereye ku nkomoko y'amagambo ari mu ibara ry'umukara tsiri, tahura inshoza n'amoko y'ikomorazina hanyuma utange n'ingero z'amazina akomoka ku yandi moko y'amagambo.

- **Umukozi** mwiza ashimisha **umukoresha** we.
- **Umunyarwanda** mwiza atungira **agatoki** abashinzwe **umutekano** aho abonye ibiyobyabwenge.
- **Amashusho** akoreshwa mu **biganiro** ku bubu bw' ibiyobyabwenge afasha ababiteze amatwi gusobanukirwa.
- **Ibigorigori** babigaburira amatungo.

VII.2.1 Inshoza y'ikomorazina

Ni uburyo bwo kubaka amazina mashya uhereye ku bundi bwoko bw'amagambo cyangwa se ku yandi mazina. Amazina menshi y'Ikinyarwanda usanga akomoka ku yandi mazina no kunshinga.

VII.2.2 Ikomorazina mvazina

Ikomorazina mvazina ni uburyo bwo kurema amazina mashya uhereye ku yandi mazina.

Ingero :

- Rwanda → Abanyarwanda
- Intobo → Umutobotobo
- Umwami → Umwamikazi
- Izuba → Ikizubazuba
- Intama → Amatamatama
- Igiti → uduti

- Imana → Nyiramana
- Amahoro → Mahoro
- Ururimi → Uburimi
- Inyamaswa → Ubunyamaswa

VII.2.3 Ikomorazina mvanshinga

Ikomorazina mvanshinga ni uburyo bwo guhimba amazina mashya afatiye ku mizi y'inshinga.

Ingero

- Gutaha → Itaha, itahe, intaho
- Guhinga → umuhinzi, ihinga, ubuhinge
- Gukira → ubukire, umukiro
- Gutete → ubutesi, umutesi, gatesi
- Gukina → abakinnyi, umukino
- Kudoda → umudozi, ubudozi, undodo
- Kubaza → ububaji, ababaji, imbazo
- Gusya → urusyo, umusyi
- Kurera → uburere umurezi
- Kuneka → umuneke
- Gukora → umukozi, umukoro
- Guhaha → umuhashyi, ihaho
- Guhemuka → igihemu
- Kwandura → ubwandu
- Kwererana → urwererane
- Kugenda → ukugenda, urugendo, abagenzi

Ikitonderwa

Rimwe na rimwe n'ubundi bwoko bw'amagambo bushobora gukomorwaho amazina.

Ingero :

Ntera : Umwiza, umubi, ibyinshi

Imigereka: Ineza, umunabi



Imyitozo

1. Tahura amazina ashingiye ku ikomorazina mu nteruro zikurikira:
 - a) Cyuzuzo, Gatete na Cyurinyana ni bitangiye kurengera ibidukikije.
 - b) Bamwe mu rubyiruko bagira imyumvire mibi ku bijyanye n'akamaro k'ibidukikije.
2. Garagaza amagambo amazina akurikira akomokaho:
 - a) Abanyarwanda
 - b) Abanywi
 - c) Imyumvire
 - d) Umunaniro
 - e) Amatamatama
3. Tanga ingero eshatu z'amazina akomoka ku ikomorazina mvazina n'ingero eshatu z'amazina akomoka ku ikomorazina mvanshinga.

VII.3 Isuzuma risoza umutwe wa karindwi

Umwandiko : Ibidukikije, inkingi y'ubuzima

Kuva kera na kare, umuntu azi ko yarazwe kuba umutware w'isi. Yahawe ubwenge bwo kuyigenga no kwifashisha ibimukikije mu mibereho ye ya buri muni. Uko amajyambere agenda yiyongera ni ko ikitwa umutungo kamere muntu yasigiwe n'abakurambere ugenda ukoresha neza cyangwa nabi, akenshi ku buzima bw'ejo hazaza. Byumvikana bite ukuntu ba rutwitsi bagiye kuzahindura isi ubutayu? Byumvikana bite ukuntu imyanda ivuye mu nganda irohwa mu nzuzi, mu biyaga no mu nyanja kandi amazi ari isoko y'ubuzima? Ni gute inganda zikomeza kohereza ibyuka mu kirere kandi ari ikigega cy'umwuka duhumumeka? Byumvikana bite ukuntu ba gashozantambara bahora mu myiyereko yo kugerageza ibitwaro bya kimbuzi kandi bijunditse ubumara bwangiza ibiremwa?

Kwibasira ibimera n'amashyamba bidukikije ni nko gutema ishami wicayeho. Ibimera bifite akamaro k'ibanze mu buzima bw'abantu. Uretse kuba ibimera bigize igice kinini k'ibiribwa bitunze umuntu,biyungurura umwuka duhumeka, bigafasha gukomeza kubungabunga ibyoko by'amazi bikatuzanira imvura dukeneye, bifata kandi ubutaka, ntibutembanwe n'isuri. Uko ibimera bigenda bikendera rero, isi dutuye izaba ubutayu, ikirere cyuzure ibyuka byica. Ubwo se iherezo rya muntu rizaba irihe? Ibimera n'amashyamba nibungwabungwe, barutwitsi bisubireho, abacukura amabuye y'agaciro basane ibyo bangije maze aka wa muririmbyi ngo: "Nutema kimwe uge utera bibiri."

Iterambere ry'inganda ni ngombwa cyane, gukoresha ibinyabiziga, amato n'indege byihutisha itumamanaho, gutwara abantu n'ibintu ariko bititondewe byashyira muntu mu kanga. Ibyuka byoherezwa mu isanzure n'inganda, ibinyabiziga, amato n'indege byangiza bikomeye akayunguruzo k'izuba maze isi dutuye ikarushaho gushyuha, ihindagurika ry'ibihe rikiyongera, bigashyira mu kaga ubuzima bwa muntu. Si ugushyuha kw'isi gusa kuko bihumanya n'umwuka maze indwara zo mu myanya y'ubuhumekero zikaba nyinshi kandi zigahita imbaga y'abantu. Kugabanya ibyo byuka birakwiye, ndetse hagashakishwa ingufu zitangiza ikirere zakwifashishwa kugira ngo tube mu isi itekanye, ubuzima bwa muntu butugarijwe.

Burya abatabizi bicwa no kutabimenya. Abantu baroha imyanda mu nzuzi, mu biyaga no munyanja, bibwira ko babihambye, ko uburozi bibumbatiye bugiye nyamara amazi dutunze ni amwe, ahora azenguruka isi n'ikirere. Abanyarwanda baciye umugani bati: "Agapfunyika ka kabutindi urakajugunya kakakugarukira". Iyo myanda duta mu mazi, igenda izenguruka isi yose, itaretse ndetse no mu kirere, ihumanya aho igeze hose, ibinyabuzima byose ihasanze, ikarenga na none ikatugarukira. Ubwo icyo wangaga kikaba ari cyo ubona. Uretse kandi n'ibyo, uburozi bw'iyi myanda bwangiza ibikoko byinshi byituriye mu mazi, Ibyo nibicike burundu, hafatwe ingamba z'iyi myanda twoye kuba nka cya gisiga cy'urwara rurerure kimennye inda.

Hanyuma nanone by'agahebuzo, ibyo bihangange mu by'urugamba, bihora bihiganwa ubutwari, ntibasiba kugerageza ibitwari, bibumbatiye ubumara bw'inshi, bugamije kurimbura inyoko muntu. Uburozi bwabyo bujya mu mwuka, bukatugarukira bidatinze bitaretse na ba nyiri kubihanga. Ntibibagirwe kandi ko igihe kimwe ibyo bigega byabyo babundarayeho, bishobora gufatwa n'inkongi maze ibyo bifuzaga kugirira abandi bikaba ari bo bigirirwaho kuko ngo urucira mukaso rugatwara nyoko. Ntihacibwe rero ibyo bitwari by'ubumara, bicike ku isi inzira zikigendwa hato tutazibuka ibitereko twasheshe.

Umuntu n'ibidukikije rero ni magirirane. Kubibungabunga ni byo bikwiye. Nihafatwe ingamba ku isi hose, tugire iterambere rirambye, ridasenyanya inyoko muntu n'ibinyabuzima byo ku isi maze uyu mubumbe wacu usigasirwe uko bikwiye.

I. Ibibazo byo kumva no gusesengura umwandiko

1. Garagaza akamaro k'ibimera kavuzwe mumwandiko.
2. Andika ibintu byangiza ikirere byavuzwe mu mwandiko.
3. Ni gute imyanda itawe mu nzuzi, ibiyaga n'inyanja igarukira mwene muntu?
4. Ni izihe ngingo z'ingenzi zavuzweho muri uyu mwandiko?
5. Uretse ingamba zavuzwe mu mwandiko, ni izihe ngamba zindi wumva zafatwa kugira ngo isi ikangukire kubungabunga ibidukikije uko bikwiye?

II. Ibibazo by'inyunguramagambo

1. Sobanura amagambo cyangwa amatsinda y'amagambo akurikira yakoreshejwe mu mwandiko
 - a) Umutungo kamere
 - b) Ubumara
 - c) Isanzure
 - d) Kwibuka ibitereko washeshe
 - e) Kubundarara
2. Huza amagambo yo mu ruhushya A n'ibisobanuro byayo biri mu ruhushya B

A	B
1. Guhumanya	a) ibibazo bikomeye.
2. akaga	b) ibyemezo bifatika kandi bihamye
3. Ingamba	c) gutera indwara, kwanduza indwara

III. Ibibazo ku ikomorazina

1. Tanga amazina abarabiri akomoka ku magambo akurikira:
 - a) Kugura
 - b) Imana
 - c) Neza
 - d) Amahoro
2. Tahura amazina akomoka ku yandi magambo mu nteruro ikurikira, ugaragaze n'amagambo yakomotseho.

“Mukahirwa yatubwiye ko abanyenganda bahagurukiye kugabanya ibyuka byinjira mu isanzure.”

IBITABO N'INYANDIKO BYIFASHISHIJE

1. IKIGÔ CY'ÛBUSHAAKASHAATSI MU BY'ÛBUHAÂNGA N'ÏKÔRANABÛHAÂNGA (n.d), Inkoranya y'Ïkinyarwaanda mu Kinyarwaanda, IRST Butare, Igitabo cya 1
2. IKIGO K'IGIHUGU GISHINZWE INTEGANYANYIGISHO NCDC (2008). Imyandiko mfashanyigisho, Umwaka wa gatanu w'amashuri yisumbuye.
3. IKIGO K'IGIHUGU GISHINZWE INTEGANYANYIGISHO NCDC (2008), Imyandiko mfashanyigisho, Umwaka wa gatandatu w'amashuri yisumbuye.
4. INTEKO NYARWANDA Y'URURIMI N'UMUCO (2014). Amabwiriza ya Minisitiri no 001/2014 yo ku wa 08/10/2014 agenga imyandikire yemewe y'Ïkinyarwanda, Kigali.
5. NSANZABERA, J.D. (2013) Ikeshamvugo mu Kinyarwanda: imvugo isukuye, ikeshamvugo ry'amagambo akwiye n'inshoberamahanga zisobanuye. Kigali
6. JACOB I. (1985). Dictionnaire Rwandais-Français en 3 volumes, Tome troisième, I.N.R.S, Butare.
7. Mgr BIGIRUMWAMI, A. (1984). Imihango n'Imigenzo n'Imiziririzo mu Rwanda, Nyundo, Troisième édition.
8. COUPEZ, A. 1980. Abrégé de Grammaire Rwanda, Tome 1,2. Butare : INRS.
9. BIZIMANA, S., 2002, Imiteêrere y'Ïkinyarwaanda II, IRST, Butare.
10. MINISITERI Y'AMASHURI ABANZA N'AYISUMBUYE: Ïkinyarwanda: umwaka wa munani Gashyantare 1988.
11. MUTAKE, T., 1990, Ikibonezamvugo k'Ïkinyarwanda: lyigamajwi n'iyigamvugo les Editions de la Regie de l'Imprimerie scolaire.
12. MBONIMANA G. Na NKEJABAHIZI J.C, 2011. Amateka y'ubuvanganzo nyarwanda, kuva mu kinyejana cya XVII kugeza magingo aya, Editions de l'Université Nationale du Rwanda.

Imbuga nkoranyambaga zifashishijwe

1. www.irembo.gov.rw
2. www.imirasire.com

IMIGEREKA

1. Twiyungure amagambo

Abacengeri: ni abantu b'ibikomangoma babaga berewe n'indagu z'ibwami bakajya mu gihugu bashaka gutera bakagenda batarwana ariko biyenza bakagwayo bikabaha uburyo bwo kukigarurira.

Abahigi: abantu b'abahanga mu guhiga

Abatabazi: ni abantu bagenewe kujya ku rugamba. Ahandi bishobora kuvuga abantu batabara abandi.

Amaso si aya: si ubwa mbere nkubonye.

Amwime ikico: amwime umwanya wo gukora ikintu runaka

Aratinya: aguma mu rugo kuko yari akiri umugeni

Baduhekere: batuzanire umugeni. Aha twibuke ko kera bamuhekaga mu ngobyi akaba ari ho iyo mvugo ikoreshwa mu misango y'ubukwe ikomoka.

Bamuhwitura: bamwibutsa ari nako bamutera umwete wo gukora ibyo ashinzwe

Barahwanya: barahuza neza

Basakiranye: bahuye, umwe atabonye undi

Bazabafate mpiri: gufata umuntu umutunguye/ kugwa gitumo

Bimwanga mu nda: ntiyatuza.

Gucurwa inkumbi n'indwara: kwicwa n'indwara

Gufata ingamba: gushaka uburyo bwo kurwanya ikintu runaka.

Gufora umuheto: Gukurura injishi n'umuheto cyanecyane ushaka kurasa.

Gukinga ingabo: kwikinga igikoresho bakoresha bikingira amacumu n'imyambi mu gihe barwana

Gukumira: guhagarika ikintu ukakibuza gukwirakwira cyangwa guheza kure yawe ikintu udashaka ntikigere aho uri.

Gupfundura amabere: gutangira kumera amabere

Gusubira ku kawe: kugaruka ku byo wari usanzwe ukora.

Gutebutsa: kujya mu muryango mwasabyemo umugeni mukumvikana ku munsu w'ubukwe.

Igikatsi: ibyatsi bengesheje ibitoki maze bakabikamuramo umutobe wose. Bivugwa kandi ku kintu cyose cyashizemo amazi.

Ikiremo: igice cy'umwenda basanisha umwambaro wacitse

Impuzu: umwambaro ukozwe mu gishishwa cy'umuvumu aba kera bambaraga

Indiri: aho ikintu kiba (kirara)

Ingaramakirambi: umusore watinze gushaka.

Ingimbi: umwana w'umuhungu uri mu kigero kiri hagati y'imyaka cumi n'itatu na cumi n'itandatu

Inkingi yitwa kanagazi: inkingi yo mu nzu ya kinyarwanda yashyigikiraga uruhamo rw'umuryango.

Insanganyamatsiko: ingingo nyamukuru iba igiye kuvugwaho.

Intandaro: inkomoko y'ikintu runaka

Intere: umuntu warembye wenda gupfa

Intore: abantu bafite umuco mbese buje indangagaciro na kirazira.

Inyana zirara imfizi mu mahembe: inyana zigeze igihe cyo kwima.

Ise: indwara ifata uruhu rukagenda rusa n'urweruruka.

Ishyo: ikoraniro ry'inka nyinshi zororerwa hamwe zigasangira imfizi./Umubare w'inyamaswa zimwe na zimwe nk'inzovu, imbogo cyangwa imparage ziba hamwe ari nyinshi zihuje ubwoko.

Kudashakira ubwinshi mu mazi: kudashyira amazi menshi mu kintu.

Kugondoza: gusabwa ibirenze ibyaboneka

Kumasha: kwitoza kuboneza ahantu runaka by'abarasa

Kutizigamira : kutagira amafaranga ushyira muri banki cyangwa ikigo k'imari iciriritse ngo uzayakoreshe mu bihe bizaza.

Kuzibukira: kwitwaza ikintu ngo kitakugeraho.

Kwibasira imbaga: gufata abantu benshi cyane.

Uburanganire: kudasumbana, kuba ku rwego rumwe

Ubuziranenge: ubudakemwa bw'ikintu.

Ubwuzuzanye : ugushyirahamwe, ugushyigikirana ukunganirana

Umuhigo: inyamaswa bishe bahiga

Umuranga: umuntu w'inyangamugayo, w'inararibonye waterwaga n'umuryango w'umusore akajya kubashakira amakuru mu muryango ufite umukobwa ukwiye gusabirwa uwo musore.

Umutsindo: insinzi cyangwa ubuneshe bw'icyarwanaga n'ikindi

Umwangavu: umukobwa umaze gupfundura amabere

Uruhanga ruharaze imvi: umutwe urimo imvi.

Urusika rw’umugendo: urusika abantu batari bene urugo batari bemerewe kurenga ngo bakomeze mu nzu.

Urusika: wari umwanya utandukanya ibice bitandukanye byo mu nzu ya Kinyarwanda. Kuri ubu ni urukuta rutandukanya ibyumba by’inzu.

2. Imyandiko y’inyongera

2.1. Insigamugani: Akebo kajya iwa mugarura.

Uyu mugani waturutse ku muntu witwaga Mugarura wakuranye imico myiza nyane, akubitiraho n’ubukire bw’imyaka n’ubw’amatungo. Abantu baza kumucaho inshuro, akabereka ikibo cya mugerwa w’umuhinzi, umuhingiye yahingura akamuha inshuro y’umuhinzi muri icyo kibo, hanyuma akamushyiriramo n’indi y’ubuntu. Abigenza atyo imyaka myinshi, n’uje kumusaba inka na we akayimuha ndetse byarimba akamuheta n’indi ya kabiri. Byibera aho, bukeye inshuti ze n’abana be baramukuba, bamubwira ko yangiza inka ze n’imyaka ye. Bati: “Dore urimaraho ibintu, ubyangiza, nihacaho iminsi uzasigara umeze ute? Ejo uzasanga rubanda bakunnye nta wukureba n’irihumye.” Mugarura akumva amagambo yabo akabihorera, ntagire icyo abasubiza; ntihagire uwumva ururimi rwe, biba bityo igihe kirekire.

Bishyize kera, haza umuntu amugerageresha kumushuka, aramubwira ati: “Mugarura, ubuntu bwawe bwo gutanga utabaze turabwishimira, ariko n’ubwo tugushima bwose, gewu nta cyo urampa, none nje kugusaba inka eshanu zo kubaga.” Mugarura aramwemerera amuha inka eshanu araziyana. Azigejeje iwe aho kuzibaga arazorora; zirakunda zirororoka, ziba amashyo atanu. Rubanda babibonye batyo, barega mugarura ibwami ko yangiza ibintu dore ko ibwami uwangizaga inka ze bavugaga ko amara inka z’umwami.

Ibyo bituma umwami amugabiza rubanda baramunyaga ariko inka n’ibintu bye nta muntu wabigabanye, byatwawe na rubanda rubyigabanyije.

Nuko ibwami bategeka ko Mugarura atazahabwa umuriro kuko yabaye umupfu mu bintu by’ibwami. Mugarura amaze kunyagwa ahinduka umukene cyane, abura aho aba n’umugore n’abana be aragumya arazerera. Hanyuma atunguka ku muntu wigeze kumuhingira ava mu nzu ya kambere ayiha mugarura, asigara mu nzu yo mu gikari. Mugarura amaze kubona inzu abamo, rubanda bamenyako yabonye icumbi, abo yagiriye neza batangira kujya bagenda nijoro, bamushyira ibintu.

Ubwo kugenda nijoro batinyaga ibwami. Baramugoboka, bamuzanira amafunguro, bamwe mu twibo, abandi mu bitebo. Bigize aho abenshi mu bo yagiriye neza bajya kumuhakirwa ibwami baremera bamuha inka y’umuriro, rubanda barishima, noneho baza ku mugaragarar bamuzanira ibintu byo kumushimira ineza yabagiriye.

Bukeye wa mugabo wazaga kumushuka ngo amuhe inka eshanu zo kubaga yumvise ko Mugarura yabonye umuriro arishima cyane. Arazinduka ajya aho Mugarura acumbitse, aramubwira ati: “Ngize amahirwe kuko wabonye umuriro; za nka wampaga zo kubaga uko ari eshanu narazoroye, zabaye amashyo atanu, none ngayo amashyo atatu nkwituye, nange ndasigarana abiri.” Mugarura amushimana na rubanda. Barakomeza bamuzanira amaturo y’inka n’imyaka; abadafite imyaka myinshi bakamuzanira mu twibo, yubaka imitiba n’ibigega.

Kuva ubwo umuntu wituye uwamugiriye neza, bati: “Akebo kajya iwa Mugarura.”

2.2. Insigamugani: Burya si bunu!

Uyu mugani Abanyarwanda badatuza guca, cyanecyane iyo bacyurirana. Umuntu awuca iyo abonye urwaho rwo kwigaranzura uwari wamuzambije akamubuza amahwemo, cyangwa se iyo ashaka kumvisha ko umuntu ari “Mutima ukwe”; ni bwo avuga ngo “Burya si Bunu!” Wakomotse kuri Burya na Bunu bene Rugomwa rwa Maronko mu Gisaka (Intara y’Iburasirazuba); ahagana mu mwaka wa 1400.

Abo bahungu bombi bari impanga, bakaba bene Rugomwa rwa Muronko na Barakagwira ba Numugabo. Rugomwa yari umugesera w’umuzirankende; akaba umutware w’umutoni mu b’ingenzi kwa Kimenyi Musaya, umwami w’ i Gisaka. Bukeye Kimenyi atoresha abakobwa beza bo mu Gisaka, babazana mu rugo rwe rw’i Remera ry’i Mukiza (muri Komini Kigarama: Ubu ni mu Karere ka Ngoma) mu Gisaka i Mukiza hari nk’ibwami mu Rwanda). Bamaze kuhateranira, yohereza abagore bakuru ngo bahitemo abarusha abandi ubwiza, kugira ngo bamwe azabarongore, abandi abashyngire abahungu akunda. N’i Rwanda ni ko byagendaga; ni ko ibwami barambagizaga.

Nuko abagore bajya kurobanura abakobwa; babakenyeza impu z’imikane babareba imbere n’inyuma, babambika ubusa barabahindagura bareba intantu n’ibibero. Umukobwa wa mbere aba Barakagwira ba Numugabo. Igihe bakibisiganira, Kimenyi aba arahageze na wa muhungu Rugomwa; dore ko yamukundaga cyane. Ba bagore n’abakobwa bamubonye abatunguye barikanga. Arabasatira arabaramutsa n’abakobwa bose. Ubwo abagore bari bakikije Barakagwira. Kimenyi arababaza, ati: “Ko nduzi mukikije uyu mukobwa mwese ni ibiki?”

Abagore batinya kumubwira ko ari we uruta abandi mu bwiza kugira ngo bagenzi be batagira ipfunwe n’ishyari. Kimenyi na we arabimenya aroroshya; ati: “Nimuze mbabaze”. Abajyana mu yindi ngobe; dore ko ibyo byagirwaga mu gikari. Bahageze babona kumutekereza ko Barakagwira aruta bagenzi be bandi mu bwiza. Ubwo wa muhungu Rugomwa akaba arimo aho. Kimenyi arashimikira; ati: “Arabaruta bose koko?” Bati: “Arabaruta turakakuroga!” Kimenyi akebuka Rugomwa; ati: “Muguhaye wanshima?” Rugomwa ati: “Nagushima mba nkuroga”. Kimenyi ati: “Ndamuguhaye uzamurongore”.

Rugomwa rero arongora Barakagwira, atahirira i Mukiza kwa Kimenyi. Barakagwira amaze kurongorwa ntiyazuyaza, ahera ko asama. Igihe cyo kubyara kigeze, yibaruka abahungu b'impanga: umwe bamwita Burya, undi bamwita Buno. Bamaze gukambakamba, Kimenyi atesha Rugomwa ubutware; aramusezerera ajya kuburereramo abana be. Bamaze kuba ingaragu, Kimenyi abajyana iwe bareranwa n'abe. Bamaze kugimbuka arabashyiringira, abaha inka n'imisozi.

Baba aho, bishyize kera Rugomwa arapfa. Abahungu be basigara mu bye babitungana n'ibyabo. Bitinze abantu bo mu Gisaka babagirira ishyari barabanga; babateranya na Kimenyi. Na we atangira kubareba nabi. Burya na Buno babibonye bagira ubwoba baracika; bamucikira i Bujinja. Bamaze kugerayo bakeza umwami waho. Arabakira arabahaka. Hagati aho Abanyagisaka bayoberwa aho bacikiye. Birarambanya hashira umwaka ariko bageze aho barabimenya. Babwira Kimenyi, bati: "Burya na Buno bari i Bujinja". Kimenyi yohereza abantu bo kujya kubagarura kuko yabakundaga cyane. Bagezeyo barabaririza barababona; bararamukanya barashyikirana. Bari bamaze kuba ibikwerere. Intumwa zibabwira ubutumwa bwa Kimenyi bw'uko bagaruka iwabo. Bamaze kubyumva, Burya arabyemera, Buno araricurika ararahira; yanga kugaruka. Burya agarukana n'intumwa, Kimenyi amusubiza ibyabo byose na we Buno yigumira iyo.

Nuko atindaharirayo, kugeza igihe agwiriye yiseguye ubutindi. Rubanda rero rumaze kubona uko izo mpanga zanyuranyije ibitekerezo byari mahwi amambere, babikurizaho imvugo yahindutse umugani baca bagira ngo: "Burya si Buno!" Bawuca bashaka kuvuga ko umuntu ari mutima ukwe nk'uko abo bahungu babusanyije ibitekerezo kandi bari akara kamwe. Ku ruhande baba bashima Burya ku rundi baba bagaya Buno. Ariko mu mvugo, bisobanura ko ibihe biha ibindi; ni nk'aho umuntu yagize ati: "Burya wangiriraga burya ntubishoboye, ubu noneho byahindutse!"

Naho rero iyo umuntu abajije undi ati: "Mbese ni Burya na Buno!" Ubwo aba ashaka kumubaza ngo: "Mbese biracyari kwa kundi?" Burya si Buno bisobanura umuntu ni mutima ukwe cyangwa se ibihe biha ibindi; nta gahora gahanze. Burya na Buno = biracyari kwa kundi ntacyahindutse.